

諸郡守十餘人皆坐度田不實下獄死。後上從容謂虎賁中郎將馬援曰：吾甚恨前殺守相多也。對曰：死得其罪，何多之有？但死者既往，不可復生也。上大笑。○郡國羣盜處處竝起，郡縣追討，到則解散，去復屯結。青徐幽冀四州尤甚。冬十月，遣使者下郡國聽羣盜自相糾擿，五人共斬一人者，除其罪。吏雖逗留，避故縱者，皆勿問。聽以禽討為效。其牧守令長坐界內有盜賊而不收捕者，又以畏懦捐城委守者，皆不以為負，但取獲賊多少為殿。最唯蔽匿者，乃罪之。於是更相追捕，賊竝解散。徙其魁帥於它郡，賦田受粟，使安生業。自是牛馬放牧不收，邑門不閉。○盧芳與閔堪使使請降，帝立芳為代王，堪為代相，賜繒二萬匹。因使和集匈奴。芳上疏謝，自陳失望闕庭，詔報芳，朝明年正月。初，匈奴聞漢購求芳，貪得財帛，故遣芳還降。既而芳以自歸為功，不稱匈奴所遣，單于復恥言其計，故賞遂不行。由是大恨，入寇尤深。○馬援奏：宜如舊鑄五銖錢，上從之。天下賴其便。○盧芳入朝，南及昌平，有詔止，令更朝明歲。

十七年春正月，趙孝公良薨，初懷縣大姓李子春二孫殺人，懷令趙熹窮治其姦，二孫自殺。收繫子春，京師貴戚為請者數十，熹終不聽。及良病，上臨視之，問所欲言，良曰：素與李子春厚，今犯罪，懷令趙熹欲殺之，願乞其命。帝曰：吏奉法律，不可枉也。更道它所欲，良無復言。既薨，上追思良，乃貫出子春，遷熹為平原太守。○二月乙未晦，日有食之。○夏四月乙卯，上行幸章陵。五月乙卯，還宮。○六月癸巳，臨淮懷公衡薨。○妖賊李廣攻沒皖城，遣虎賁中郎將馬援驃騎將軍段志討之。秋九月，破皖城，斬李廣。○郭后寵衰，數懷怨對，上怒之。冬十月辛巳，廢皇后郭氏，立貴人陰氏為皇后。詔曰：異常之事，非國休福，不得上壽稱慶。鄧擘言於帝曰：臣聞夫婦之好，父不能得之於子，況臣能得之於君乎？是臣所不敢言。雖然，願陛下念其可否之計，無令天下有議社稷而已。帝曰：擘善，恕己量主，知我必不有所左右，而輕天下也。

帝進郭后子右翊公輔，為中山王，以常山郡益中山國。郭后為中山太后，其餘九國公皆為王。○甲申，帝幸章陵，修園廟祠舊宅，觀田廬，置酒作樂，賞賜時宗室諸母，因酣悅，相與語曰：文叔少時謹信，與人不款曲，唯直柔耳。今乃能如此，帝聞之，大笑曰：吾治天下，亦欲以柔道行之。十二月，還自章陵。○是歲，莎車王賢復遣使奉獻，請都護。帝賜賢西域都護印綬，及車旗黃金錦繡，敦煌太守裴遵上言：夷狄不可假以大權，又令諸國失望。詔書收還都護印綬，更賜賢以漢大將軍印綬，其使不肯易，遵迫奪之。賢由是始恨，而猶詐稱大都護，移書諸國，諸國悉服屬焉。○匈奴鮮卑赤山烏桓數連兵入塞，殺略吏民，詔拜襄賁令祭彤為遼東太守，彤有勇力，虜每犯塞，常為士卒鋒，數破走之。彤遵之從弟也。○徵側等寇亂連年，詔長沙合浦交趾具車船修道橋通障谿，儲糧穀，拜馬援為伏波將軍，以扶樂侯劉隆為副，南擊交趾。

十八年二月，蜀郡守將史歆反，攻太守張穆，穆踰城走。宕渠楊偉等起兵以應歆，帝遣吳漢等將萬餘人討之。○甲寅，上行幸長安。三月，幸蒲坂祠后土。○馬援緣海而進，隨山刊道，千餘里，至浪泊上，與徵側等戰，大破之。追至禁谿，賊遂散走。○夏四月甲戌，車駕還宮。○戊申，上行幸河內，戊子，還宮。○五月旱。○盧芳自昌平還，內自疑懼，遂復反，與閔堪相攻連月。匈奴遣數百騎迎芳出塞，芳留匈奴中十餘年，病死。○吳漢發廣漢巴蜀三郡兵圍成都，百餘日。秋七月，拔之，斬史歆等，漢乃乘桴沿江下巴郡。楊偉等惶恐解散，漢誅其渠帥，徙其黨與數百家於南郡長沙而還。○冬十月庚辰，上幸宜城，還祠章陵。十二月，還宮。○是歲，罷州牧，置刺史。○五官中郎將張純與太僕朱浮奏議禮為人子事太宗，降其私親，當除今親廟四，以先帝四廟代之。大司徒涉等奏立元成哀平四廟，上自以昭穆次第，當為元帝後。十九年春正月庚子，追尊宣帝曰中宗，始祠昭帝元帝於太廟，成帝哀帝平帝於長安春陵。

節侯以下於章陵其長安章陵皆太守令長侍祠○馬援斬徵側徵貳○妖賊單臣傅鎮等相聚入原武城自稱將軍詔太中大夫臧宮將兵圍之數攻不下士卒死傷帝召公卿諸侯王問方略皆曰宜重其購賞東海王陽獨曰妖巫相劫執無久立其中必有悔欲亡者但外圍急不得走耳宜小挺緩令得逃亡逃亡則一亭長足以禽矣帝然之即敕宮撤圍緩賊賊衆分散夏四月拔原武斬臣鎮等○馬援進擊徵側餘黨都陽等至居風降之嶠南悉平援與越人申明舊制以約束之自後略越奉行馬將軍故事○閏月戊申進趙齊魯三公爵皆爲王○郭后既廢太子彊意不自安郅憚說太子曰久處疑位上違孝道下近危殆不如辭位以奉養母氏太子從之數因左右及諸王陳其懇誠願備藩國上不忍遲回者數歲六月戊申詔曰春秋之義立子以貴東海王陽皇后之子宜承大統皇太子彊崇執謙退願備藩國父子之情重久違之其以彊爲東海王立陽爲皇太子改名莊

袁宏論曰夫建太子所以重宗統一民心也非有大惡於天下不可移也世祖中興漢業宜遵正道以爲後法今太子之德未虧於外內寵既多嫡子遷位可謂失矣然東海歸藩謙恭之心彌亮明帝承統友子之情愈篤雖長幼易位與廢不同父子兄弟至性無間夫以三代之道處之亦何以過乎

帝以太子舅陰識守執金吾陰興爲衛尉皆輔導太子識性忠厚入雖極言正議及與賓客語未嘗及國事帝敬重之常指識以戒戒貴戚激厲左右焉與雖禮賢好士而門無遊俠與同郡張宗上谷鮮于真不相好知其有用猶稱所長而達之友人張汜杜禽與厚善以爲華而少實但私之以財終不爲言是以世稱其忠上以沛國桓榮爲議郎使授太子經車駕幸太學會諸博士論難於前榮辨明經義每以禮讓相厭不以辭長勝人儒者莫之及特加賞賜又詔諸生雅歌擊磬盡日乃罷帝使左中郎將汝南鍾興授皇太子及宗室諸侯春秋

賜與爵關內侯與辭以無功帝曰生教訓太子及諸侯王非大功耶與曰臣師少府丁恭於是復封恭而與遂固辭不受○陳留董宣爲雒陽令湖陽公主蒼頭白日殺人因匿主家吏不能得及主出行以奴驂乘宣於夏門亭候之駐車叩馬以刀畫地大言數主之失叱奴下車因格殺之主即還宮訴帝帝大怒召宣欲笞殺之宣叩頭曰願乞一言而死帝曰欲何言宣曰陛下聖德中興而縱奴殺人將何以治天下乎臣不須笞請得自殺即以頭擊楹流血被面帝令小黃門持之使宣叩頭謝主宣不從彊使頓之宣兩手據地終不肯俯主曰文叔爲白衣時藏亡匿死吏不敢至門今爲天子威不能行一令乎帝笑曰天子不與白衣同因敕彊項令出賜錢三十萬宣悉以班諸吏由是能搏擊豪彊京師莫不震慄○九月壬申上行幸南陽進幸汝南南頓縣舍置酒會賜吏民復南頓田租一歲父老前叩頭言皇考居此日久陛下識知寺舍每來輒加厚恩願賜復十年帝曰天下重器常恐不任日復一日安敢遠期十歲乎吏民又言陛下實惜之何言謙也帝大笑復增一歲進幸淮陽梁沛○西南夷棟蠶反殺長吏詔武威將軍劉尚討之路由越嶲邛穀王任貴恐尚既定南邊威法必行己不得自放縱即聚兵起營多釀毒酒欲先勞軍因襲擊尚尚知其謀即分兵先據邛都遂掩任貴誅之

二十年春二月戊子車駕還宮○夏四月庚辰大司徒戴涉坐入故太倉令奚涉罪下獄死帝以三公連職策免大司空竇融○廣平忠侯吳漢病篤車駕親臨問所欲言對曰臣愚無所知識惟願陛下慎無赦而已五月辛亥漢薨詔送葬如大將軍霍光故事漢性彊力每從征伐帝未安常側足而立諸將見戰陳不利或多惶懼失其常度漢意氣自若方整厲器械激揚吏士帝時遣人觀大司馬何爲還言方修戰攻之具乃歎曰吳公差彊人意隱若一敵國矣每當出師朝受詔夕則引道初無辦嚴之日及在朝廷斤斤謹質形於體貌漢嘗出征

妻子在後。買田業。漢還讓之曰。軍師在外。吏士不足。何多買田宅乎。遂盡以分與昆弟外家。故能任職。以功名終。○匈奴寇上黨天水。遂至扶風。○帝苦風眩。疾甚。以陰興領侍中。受顧命於雲臺。廣室。會疾瘳。召見興。欲以代吳漢為大司馬。興叩頭流涕。固讓曰。臣不敢惜身。誠虧損聖德。不可苟昌。至誠發中。感動左右。帝遂聽之。太子太傅張湛。自郭后之廢。稱疾不朝。帝彊起之。欲以為司徒。湛固辭。疾篤。不能復任朝事。遂罷之。六月庚寅。以廣漢太守河內蔡茂為大司徒。太僕朱浮為大司空。○壬辰。以左中郎將劉隆為驃騎將軍。行大司馬事。○乙未。徙中山王輔為沛王。以郭況為大鴻臚。帝數幸其第。賞賜金帛。豐盛莫比。京師號況家為金穴。○秋。九月。馬援自交阯還。平陵孟冀迎勞之。援曰。方今匈奴烏桓尚擾北邊。欲自請擊之。男兒要當死於邊野。以馬革裹尸還葬耳。何能臥牀上。在兒女子手中邪。冀曰。諒為烈士當如是矣。○冬。十月。甲午。上行幸魯。東海。楚。沛國。○十二月。匈奴寇天水。扶風。上黨。○壬寅。車駕還宮。○馬援自請擊匈奴。帝許之。使出屯襄國。詔百官祖道。援謂黃門郎梁松。竇固曰。凡人富貴。當使可復賤也。如卿等。欲不可復賤。居高墜自持。勉思鄙言。松統之子。固友之子也。○劉向進兵。與棟蠶等連戰。皆破之。

二十一年春正月。追至不韋。斬棟蠶帥西南諸夷悉平。○烏桓與匈奴鮮卑連兵為寇。代郡以東尤被烏桓之害。其居止近塞。朝發穹廬。暮至城郭。五郡民庶家受其辜。至於郡縣損壞。百姓流亡。邊陲蕭條。無復人迹。○秋。八月。帝遣馬援與謁者分築堡塞。稍興立郡縣。或空置太守令長。招還人民。烏桓居上谷塞外白山者。最為彊富。援將三千騎擊之。無功而還。○鮮卑萬餘騎寇遼東。太守祭彤率數千人迎擊之。自被甲陷陳。虜大犇。投水死者過半。遂窮追出塞。虜急。皆棄兵。裸身散走。是後鮮卑震怖。畏彤不敢復闕塞。○冬。匈奴寇上谷中山。○莎車王賢浸以驕橫。欲兼并西域。數攻諸國。重求賦稅。諸國愁懼。車師前王鄯善焉耆等十八國。

俱遣子入侍。獻其珍寶。及得見。皆流涕稽首。願得都護。帝以中國初定。北邊未服。皆還其侍子。厚賞賜之。諸國聞都護不出。而侍子皆還。大憂恐。乃與敦煌太守檄願留侍子。以示莎車。

言侍子見留。都護尋出。冀且息其兵。表遵以狀聞。帝許之。二十二年春。閏正月。丙戌。上幸長安。二月。己巳。還雒陽。○夏。五月。乙未。晦。日有食之。○秋。九月。戊辰。地震。○冬。十月。壬子。大司空朱浮免。○癸丑。以光祿勳杜林為大司空。○初。陳留劉昆為江陵令。縣有火災。昆向火叩頭。火尋滅。後為弘農太守。虎皆負子渡河。帝聞而異之。徵昆代林為光祿勳。帝問昆曰。前在江陵。反風滅火。後守弘農。虎北渡河。行何德政。而致是事。對曰。偶然耳。左右皆笑。帝歎曰。此乃長者之言也。願命書諸策。○是歲。青州蝗。○匈奴單于與死。子左賢王烏達鞮侯立。復死。弟左賢王蒲奴立。匈奴中連年旱蝗。赤地數千里。人畜饑疫。死耗太半。單于畏漢乘其敝。乃遣使詣漁陽。求和親。帝遣中郎將李茂報命。○烏桓乘匈奴之弱。擊破之。匈奴北徙數千里。幕南地空。詔罷諸邊郡亭候吏卒。以幣帛招降烏桓。○西域諸國侍子久留敦煌。皆愁思亡歸。莎車王賢知都護不至。擊破鄯善。攻殺龜茲王。鄯善王安。上書願復遣子入侍。更請都護。都護不出。誠迫於匈奴。帝報曰。今使者大兵。未能得出。如諸國力不從心。東西南北。自在也。於是鄯善車師復附匈奴。

班固論曰。孝武之世。圖制匈奴。患其兼從西國。結黨南羌。乃表河曲。列四郡。開玉門。通西域。以斷匈奴右臂。隔絕南羌。月氏。單于失援。由是遠遁。而幕南無王庭。遭值文景玄默。養民五世。財力有餘。士馬彊盛。故能睹犀布瑋瑁。則建珠厓七郡。感蒟醬竹杖。則開牂牁越。馮聞天馬蒲萄。則通大宛安息。自是殊方異物。四面而至。於是開苑囿。廣宮室。盛帷帳。美服玩。設酒池肉林。以饗四夷之客。作魚龍角抵之戲。以觀視之。及賂遺贈送。萬里相奉。師旅之費。不可勝計。至於用度不足。乃權酒酤。筦鹽鐵。鑄白金。造皮幣。算至車船。租及六畜。

民力屈財用竭因之以凶年寇盜竝起道路不通直指之使始出衣繡杖斧斷於郡國然後勝之是以末年遂棄輪臺之地而下哀痛之詔豈非仁聖之所悔哉且通西域近有龍堆遠則葱嶺身熱頭痛懸度之阨淮南杜欽楊雄之論皆以為此地所以界別區域絕外內也西域諸國各有君長兵衆分弱無所統一雖屬匈奴不相親附匈奴能得其馬畜旃罽而不能統率與之進退與漢隔絕道里又遠得之不爲益棄之不爲損盛德在我無取於彼故自建武以來西域思漢威德咸樂內屬數遣使置質于漢願請都護聖上遠覽古今因時之宜辭而未許雖大禹之序西戎周公之讓白雉太宗之卻走馬義兼之矣

資治通鑑卷第四十三

資治通鑑卷第四十四

漢紀三十六

世祖光武皇帝下

建武二十三年春正月南郡蠻叛遣武威將軍劉尚討破之○夏五月丁卯大司徒蔡茂薨○秋八月丙戌大司空杜林薨○九月辛未以陳留玉況爲大司徒○冬十月丙申以太僕張純爲大司空○武陵蠻精夫相單程等反遣劉尚發兵萬餘人泝沅水入武谿擊之尙輕敵深入蠻乘險邀之尙一軍悉沒○初匈奴單于與弟右谷蠡王知牙師以次當爲左賢王左賢王次卽當爲單于單于欲傳其子遂殺知牙師烏珠留單于有子曰比爲右莫鞬日逐王領南邊八部比見知牙師死出怨言曰以兄弟言之右谷蠡王次當立以子言之我前單于長子我當立遂內懷猜懼庭會稀闊單于疑之乃遣兩骨都侯監領比所部兵及單于蒲奴立比益恨望密遣漢人郭衡奉匈奴地圖詣西河太守求內附兩骨都侯頗覺其意會五月龍祠勸單于誅比比弟漸將王在單于帳下聞之馳以報比比遂聚八部兵四五萬人待兩骨都侯還欲殺之骨都侯且到知其謀亡去單于遣萬騎擊之見比衆盛不敢進而還○是歲鬲侯朱祐卒祐爲人質直尙儒學爲將多受降以克定城邑爲本不存首級之功又禁制士卒不得虜掠百姓軍人樂放縱多以此怨之

二十四年春正月乙亥赦天下○匈奴八部大人共議立日逐王比爲呼韓邪單于款五原塞願永爲藩蔽扞禦北虜事下公卿議者皆以爲天下初定中國空虛夷狄情僞難知不可

許五官中郎將耿國獨以爲宜如孝宣故事受之令東扞鮮卑北拒匈奴率厲四夷完復邊郡帝從之○秋七月武陵蠻寇臨沅遣謁者李嵩中山太守馬成討之不克馬援請行帝愍其老未許援曰臣尙能被甲上馬帝令試之援據鞍顧眄以示可用帝笑曰矍鑠哉是翁遂遣援率中郎將馬武耿舒等將四萬餘人征五溪援謂友人杜愔曰吾受厚恩年迫日索常恐不得死國事今獲所願甘心瞑目但畏長者家兒或在左右或與從事殊難得調介介獨惡是耳○冬十月匈奴日逐王比自立爲南單于遣使詣闕奉藩稱臣上以問朗陵侯臧宮宮曰匈奴飢疫分爭臣願得五千騎以立功帝笑曰常勝之家難與慮敵吾方自思之二十五年春正月遼東徼外貊人寇邊太守祭彤招降之彤又以財利撫約鮮卑大都護偏何使招致異種駱驛款塞彤曰審欲立功當歸擊匈奴斬送頭首乃信耳偏何等即擊匈奴斬首二千餘級持頭詣郡其後歲歲相攻輒送首級受賞賜自是匈奴衰弱邊無寇警鮮卑烏桓竝入朝貢彤爲人質厚重毅撫夷狄以恩信故皆畏而愛之得其死力○南單于遣其弟左賢王莫將兵萬餘人擊北單于弟莫鞬左賢王生獲之北單于震怖卻地千餘里北部莫鞬骨都侯與右骨都侯率衆三萬餘人歸南單于三月南單于復遣使詣闕貢獻求使者監護遣侍子修舊約○戊申晦日有食之○馬援軍至臨鄉擊破蠻兵斬獲二千餘人初援嘗有疾虎賁中郎將梁松來候之獨拜牀下援不答松去後諸子問曰梁伯孫帝婿貴重朝廷公卿已下莫不憚之大人奈何獨不爲禮援曰我乃松父友也雖貴何得失其序乎援兄子嚴敦竝喜譏議通輕俠援前在交趾還書誡之曰吾欲汝曹聞人過失如聞父母之名耳可得聞口不可得言也好論議人長短妄是非政法此吾所大惡也寧死不願聞子孫有此行也龍伯高敦厚周慎口無擇言謙約節儉廉公有威吾愛之重之願汝曹效之杜季良豪俠好義愛人之憂樂人之樂父喪致客數郡畢至吾愛之重之不願汝曹效也效伯高不得

猶爲謹敕之士所謂刻鵠不成尙類鶩者也效季良不得陷爲天下輕薄子所謂畫虎不成反類狗者也伯高者山都長龍述也季良者越騎司馬杜保也皆京兆人會保仇人上書訟保爲行浮薄亂羣惑衆伏波將軍萬里還書以誡兄子而梁松竇固與之交結將屬其輕僞敗亂諸夏書奏帝召責松固以訟書及援誡書示之松固叩頭流血而得不罪詔免保官擢拜龍述爲零陵太守松由是恨援及援討武陵蠻軍次下雋有兩道可入從壺頭則路近而水險從充則塗夷而運遠耿舒欲從充道援以爲棄日費糧不如進壺頭益其喉咽充賊自破以事上之帝從援策進營壺頭賊乘高守隘水疾船不得上會暑甚士卒多疫死援亦中病乃穿岸爲室以避炎氣賊每升險鼓譟援輒曳足以觀之左右哀其壯意莫不爲之流涕耿舒與兄好時侯弇書曰前舒上書當先擊充糧雖難運而兵馬得用軍人數萬爭欲先奮今壺頭竟不得進大衆怫鬱行死誠可痛惜前到臨鄉賊無故自致若夜擊之即可殄滅伏波類西域賈胡到一處輒止以是失利今果疾疫皆如舒言弇得書奏之帝乃使梁松乘驛責問援因代監軍會援卒松因是構陷援帝大怒追收援新息侯印綬初援在交趾常餌葷葷益怒援妻孥惶懼不敢以喪還舊塋囊葬城西賓客故人莫敢弔會嚴與援妻子草索相連詣闕請罪帝乃出松書以示之方知所坐上書訴冤前後六上辭甚哀切前雲陽令扶風朱勃詣闕上書曰竊見故伏波將軍馬援拔自西州欽慕聖義間關險難觸冒萬死經營隴冀南討立陷臨鄉師已有業未竟而死吏士雖疫援不獨存夫戰或以久而立功或以速而致敗深入未必爲得不進未必爲非人情豈樂久屯絕地不生歸哉惟援得事朝廷二十二年北出塞漠南渡江海觸冒害氣僵死軍事名滅爵絕國土不傳海內不知其過衆庶未聞其

毀家屬杜門葬不歸墓。怨隙竝興。宗親怖慄。死者不能自列。生者莫爲之誣。臣竊傷之。夫明主醜於用賞。約於用刑。高祖嘗與陳平金四萬斤。以問楚軍。不問出入所爲。豈復疑以錢穀間哉。願下公卿。平援功罪。宜絕宜續。以厭海內之望。帝意稍解。初。勃年十二。能誦詩書。常候援兄況。辭言嫺雅。援裁知書。見之自失。況知其意。乃自酌酒。慰援曰。朱勃。小器速成。智盡此耳。卒當從汝稟學。勿畏也。勃未二十。右扶風請試守渭城宰。及援爲將軍。封侯。而勃位不過縣令。援後雖貴。常待以舊恩。而卑侮之。勃愈身自親。及援遇讒。唯勃能終焉。謁者南陽宗均。監援軍。援既卒。軍士疫死者太半。蠻亦飢困。均乃與諸將議曰。今道遠士病。不可以戰。欲權承制降之。何如。諸將皆伏地莫敢應。均曰。夫忠臣出竟。有可以安國家。專之可也。乃矯制。調伏波司馬呂种守沅陵長。命种奉詔書入虜營。告以恩信。因勒兵隨其後。蠻夷震怖。冬十月。共斬其大帥而降。於是均入賊營。散其衆。遣歸本郡。爲置長吏而還。羣蠻遂平。均未至。先自効。矯制之罪。上嘉其功。迎賜以金帛。令過家上冢。○是歲。遼西烏桓大人郝旦等。率衆內屬。詔封烏桓渠帥爲侯王。君長者八十一人。使居塞內。布於緣邊諸郡。令招來種人。給其衣食。遂爲漢偵候。助擊匈奴。鮮卑時司徒掾班彪上言。烏桓天性輕黠。好爲寇賊。若久放縱。而無總領者。必復掠居人。但委主降掾吏。恐非所能制。臣愚以爲宜復置烏桓校尉。誠有益於附集。省國家之邊慮。帝從之。於是始復置校尉於上谷。寧城。開營府。并領鮮卑。賞賜質子。歲時互市焉。

二十六年。正月。詔增百官奉。其千石已上。減於西京舊制。六百石已下。增於舊秩。○初。作壽陵。帝曰。古者帝王之葬。皆陶人瓦器。木車茅馬。使後世之人不知其處。太宗識終始之義。景帝能述遵孝道。遭天下反覆。而霸陵獨完。受其福。豈不美哉。今所制地不過二三頃。無爲山陵。陂池裁令流水而已。使迭興之後。與丘隴同體。○詔遣中郎將段郴。副校尉王郁。使南匈奴。立其庭。去五原西部塞八十里。使者令單于伏拜受詔。單于願望。有頃。乃伏稱臣。拜訖。令譯曉使者曰。單于新立。誠慙於左右。願使者衆中無相屈折也。詔聽。南單于入居雲中。始置使匈奴中郎將。將兵衛護之。○夏。南單于所獲北虜莫鞬左賢王。將其衆。及南部五骨都侯。合三萬餘人。畔歸去北庭。三百餘里。自立爲單于。月餘日。更相攻擊。五骨都侯皆死。左賢王自殺。諸骨都侯子各擁兵自守。○秋。南單于遣子入侍。詔賜單于冠帶璽綬。車馬金帛。甲兵什器。又轉河東米糴二萬五千斛。牛羊三萬六千頭。以贍給之。令中郎將將弛刑五十人。隨單于所處。參辭訟。察動靜。單于歲盡。輒遣奉奏。送侍子入朝。漢遣謁者。送前侍子。還單于庭。賜單于及闕氏。左右賢王以下。繒綵合萬匹。歲以爲常。於是雲中。五原。朔方。北地。定襄。鴈門。上谷。代。八郡民。歸於本土。遣謁者分將弛刑。補治城郭。發遣邊民在中國者。布還諸縣。皆賜以裝錢。轉給糧食。時城郭丘墟。掃地更爲上。乃悔前徙之。○冬。南匈奴五骨都侯子。復將其衆三千人。歸南部。北單于使騎追擊。悉獲其衆。南單于遣兵拒之。逆戰不利。於是復詔單于。徙居西河美稷。因使段郴王郁。留西河。擁護之。令西河長史。歲將騎二十弛刑五百人。助中郎將衛護單于。冬。屯夏罷。自後以爲常。南單于既居西河。亦列置諸部王。助漢。扞戍北地。朔方。五原。雲中。定襄。鴈門。代。郡。皆領部衆。爲郡縣偵邏耳目。北單于惶恐。頗還所掠漢民。以示善意。鈔兵每到南部。下還過亭候。輒謝曰。自擊亡虜。莫鞬日逐耳。非敢犯漢民也。二十七年。夏。四月。戊午。大司徒王況薨。○五月。丁丑。詔司徒司空。竝去大名。改大司馬爲太尉。驃騎大將軍行大司馬。劉隆即日罷。以太僕趙熹爲太尉。大司農馮勤爲司徒。○北匈奴遣使詣武威。求和親。帝召公卿廷議。不決。皇太子言曰。南單于新附。北虜懼於見伐。故傾耳而聽。爭欲歸義耳。今未能出兵。而反交通北虜。臣恐南單于將有二心。北虜降者。且不復來矣。帝然之。告武威太守。勿受其使。○朗陵侯臧宮。揚虛侯馬武。上書曰。匈奴貪利。無有禮信。

窮則稽首。安則侵盜。虜今人畜疫死。旱蝗赤地。疲困乏力。不當中國一郡。萬里死命。縣在陛下。福不再來。時或易失。豈宜固守文德。而墮武事乎。今命將臨塞。厚縣購賞。喻告高句驪。烏桓。鮮卑。攻其左。發河西四郡。天水。隴西。羌胡擊其右。如此。北虜之滅。不過數年。臣恐陛下。仁恩不忍。謀臣狐疑。令萬世刻石之功。不立於聖世。詔報曰。黃石公記曰。柔能制剛。弱能制強。舍近謀遠者。勞而無功。舍遠謀近者。逸而有終。故曰。務廣地者荒。務廣德者彊。有其者安。貧人有者殘。殘滅之政。雖成必敗。今國無善政。災變不息。百姓驚惶。人不自保。而復欲遠事。能舉天下之半。以滅大寇。豈非至願。苟非其時。不如息民。自是諸將莫敢復言兵事者。○上問趙熹。以久長之計。熹請遣諸王就國。冬。上始遣魯王興。齊王石。就國。○是歲。帝舅壽張恭侯樊宏薨。宏爲人謙柔畏慎。每當朝會。輒迎期先到。俯伏待事。所上便宜。手自書寫。毀削草本。公朝訪逮。不敢衆對。宗族染其化。未嘗犯法。帝甚重之。及病困。遣令薄葬。一無所用。以爲棺柩一藏。不宜復見。如有腐敗。傷孝子之心。使與夫人同墳異藏。帝善其令。以書示百官。因曰。今不順壽張侯意。無以彰其德。且吾萬歲之後。欲以爲式。

二十八年春正月己巳。徙魯王興爲北海王。以魯益東海。帝以東海王彊。去就有禮。故優以大封。食二十九縣。賜虎賁旄頭。設鍾虬之樂。擬於乘輿。○夏六月丁卯。沛太后郭氏薨。○初。馬援兄子壻王磐。平阿侯仁之子也。王莽敗。磐擁富貴。爲游俠。有名江淮間。後游京師。與諸貴戚友善。援謂姊子曹訓曰。王氏廢姓也。子石當屏居自守。而反游京師長者。用氣自行。多所陵折。其敗必也。後歲餘。磐坐事死。磐子肅復出入王侯邸第。時禁罔尚疏。諸王皆在京師。競脩名譽。招游士。馬援謂司馬呂种曰。建武之元。名爲天下重開。自今以往。海內日當安耳。但憂國家。諸子竝壯。而舊防未立。若多通賓客。則大獄起矣。卿曹戒慎之。至是有上書告肅。

等。受誅之家。爲諸王賓客。慮因事生亂。會更始之子壽光侯鯉。得幸於沛王。怨劉盆子。結客殺故式侯恭。帝怒。沛王坐繫詔獄三日。乃得出。因詔郡縣收捕諸王賓客。更相牽引。死者以千數。呂种亦與其禍。臨命歎曰。馬將軍誠神人也。○秋八月戊寅。東海王彊。沛王輔。楚王英。濟南王康。淮陽王延。始就國。○上大會羣臣。問誰可傳太子者。羣臣承望上意。皆言太子舅執金吾原鹿侯陰識可。博士張佚正色曰。今陛下立太子。爲陰氏乎。爲天下乎。卽爲陰氏。則陰侯可。爲天下。則固宜用天下之賢才。帝稱善。曰。欲置傳者。以輔太子也。今博士不難正朕。況太子乎。卽拜佚爲太子太傅。以博士桓榮爲少傅。賜以輜車乘馬。榮大會諸生。陳其車馬。印綬。曰。今日所蒙。稽古之力也。可不勉哉。○北匈奴遣使貢馬及裘。更乞和親。并請音樂。又求率西域諸國胡客。俱獻見。帝下三府議。酬答之宜。司徒掾班彪曰。臣聞孝宣皇帝。敕邊守尉曰。匈奴大國。多變詐。交接得其情。則卻敵折衝。應對入其數。則反爲輕欺。今北單于。見南單于來附。懼謀其國。故數乞和親。又遠驅牛馬。與漢合市。重遣名王。多所貢獻。斯皆外示富彊。以相欺誑也。臣見其獻益重。知其國益虛。歸親愈數。爲懼愈多。然今既未獲助南。則亦不宜絕北。羈縻之義。禮無不答。謂可頗加賞賜。略與所獻相當。報答之辭。令必有適。今立橐草并上。曰。單于不忘漢恩。追念先祖舊約。欲修和親。以輔身安國。計議甚高。爲單于嘉之。往者匈奴。數有乖亂。呼韓邪。郅支。自相讎隙。竝蒙孝宣帝垂恩救護。故各遣侍子。稱藩保塞。其後郅支忿戾。自絕皇澤。而呼韓附親。忠孝彌著。及漢滅郅支。遂保國傳嗣。子孫相繼。今南單于攜衆向南。款塞歸命。自以呼韓嫡長。次第當立。而侵奪失職。猜疑相背。數請兵將。歸掃北庭。策謀紛紜。無所不至。惟念斯言。不可獨聽。又以北單于比年貢獻。欲修和親。故拒而未許。將以成單于忠孝之義。漢秉威信。總率萬國。日月所照。皆爲臣妾。殊俗百蠻。義無親疎。服順者褒賞。畔逆者誅罰。善惡之效。呼韓郅支是也。今單于欲修和親。款誠已達。何嫌而欲率西域。

諸國俱來獻見。西域國屬匈奴，與屬漢何異？單于數連兵亂，國內虛耗，貢物裁以通禮，何必獻馬裘？今齋雜繪五百匹，弓韃、鞮、丸一矢四發，遺單于。又賜獻馬左骨都侯、右谷蠡王、雜繪各四百匹，斬馬劍各一。單于前言：先帝時所賜呼韓邪等，悉空侯，皆敗。願復裁賜，念單于國尚未安，方厲武節，以戰攻為務，等瑟之用，不如良弓利劍，故未以齋。朕不愛小物於單于，便宜所欲，遣驛以聞，帝悉納從之。

二十九年春二月，丁巳朔，日有食之。

三十年春二月，車駕東巡，羣臣上言：即位三十年，宜封禪泰山。詔曰：即位三十年，百姓怨氣滿腹，吾誰欺？欺天乎？曾謂泰山不如林放乎？何事污七十二代之編錄？若郡縣遠遣吏上壽，盛稱虛美，必覺令屯田。於是羣臣不敢復言。甲子，上幸魯。濟南閏月癸丑，還宮。○有星孛于紫宮。○夏四月，戊子，徙左翊王焉為中山王。○五月，大水。○秋七月，丁酉，上行幸魯。冬十一月，丁酉，還宮。○膠東剛侯賈復薨，復從征伐，未嘗喪敗，數與諸將潰圍解急，身被十二創，帝以復敢深入，希令遠征，而壯其勇節，常自從之，故復少方面之勳。諸將每論功伐，復未嘗有言。帝輒曰：賈君之功，我自知之。

三十一年夏五月，大水。○癸酉晦，日有食之。○蝗。○京兆掾第五倫領長安市，公平廉介，市無姦枉。每讀詔書，常嘆息曰：此聖主也。一見決矣，等輩笑之曰：爾說將尚不能下，安能動萬乘乎？倫曰：未遇知己，道不同故耳。後舉孝廉，補淮陽王醫工長。

中元元年春正月，淮陽王入朝，第五倫隨官屬得會見，帝問以政事，倫因此酬對，帝大悅。明日，復特召入，與語至夕。帝謂倫曰：聞卿為吏，笏婦公，不過從兄飯，寧有之邪？對曰：臣三娶妻，皆無父，少遭飢亂，實不敢妄過人食。衆人以臣愚蔽，故生是語耳。帝大笑，以倫為扶夷長。未到官，追拜會稽太守，為政清而有惠，百姓愛之。○上讀河圖會昌符曰：赤劉之九，會命岱宗。

上感此文，乃詔虎賁中郎將梁松等按索河雒讖文，言九世當封禪者，凡三十六事。於是張純等復奏請封禪，上乃許焉。詔有司求元封故事，當用方石再累，玉檢金泥，上以石功難就，欲因孝武故封石，置玉牒其中。梁松等爭以為不可，乃命石工取完青石，無必五色。丁卯，車駕東巡。二月己卯，幸魯，進幸泰山。辛卯晨，燎祭天於泰山下南方，羣神皆從，用樂如南郊事畢。至食時，天子御輦登山，日中後到山上更衣。晡時，升壇北面，尚書令奉玉牒檢，天子以寸二分璽親封之。訖，太常命騶騎二千餘人發壇上方石，尚書令藏玉牒。已復石覆訖，尚書令以五寸印封石檢事畢，天子再拜，羣臣稱萬歲，乃復道下。夜半後，上乃到山下，百官明旦乃訖。甲午，禪祭地於梁陰，以高后配。山川羣神從，如元始中北郊故事。○三月戊辰，司空張純薨。○夏四月癸酉，車駕還宮。己卯，赦天下。改元。○上行幸長安。五月乙丑，還宮。○六月辛卯，以太僕馮魴為司空。○乙未，司徒馮勤薨。○京師醴泉湧出，又有赤草，生於水崖，郡國頻上甘露。羣臣奏言：靈物仍降，宜令太史撰集，以傳來世。帝不納，帝自謙無德，每郡國所上，輒抑而不當。故史官罕得記焉。○秋，郡國三蝗。○冬十月辛未，以司隸校尉東萊李訢為司徒。○甲申，使司空告祠高廟，上薄太后尊號曰高皇后，配食地祇。遷呂太后廟主于園，四時上祭。○十一月甲子晦，日有食之。○是歲起明堂靈臺，辟雍，宣布圖讖於天下。初，上以赤伏符即帝位，由是信用讖文，多以決定嫌疑。給事中桓譚上疏諫曰：凡人情忽於見事而貴於異聞，觀先王之所記述，咸以仁義正道為本，非有奇怪虛誕之事。蓋天道性命，聖人所難言也。自子貢以下，不得而聞，況後世淺儒能通之乎？今諸巧慧小才，伎數之人，增益圖書，矯稱讖記，以欺惑貪邪，誣誤人主，焉可不抑遠之哉？臣譚伏聞陛下窮折方士黃白之術，甚為明矣。而乃欲聽納讖記，又何誤也。其事雖有時合，譬猶卜數隻偶之類。陛下宜垂明聽，發聖意，屏羣小之曲說，述五經之正義，疏奏，帝不悅。會議靈臺所處，帝謂譚曰：吾欲以讖決之，何如？譚默

然良久曰。臣不讀讖。帝問其故。譚復極言讖之非經。帝大怒曰。桓譚非聖無法。將下斬之。譚叩頭流血。良久乃得解。出爲六安郡丞。道病卒。

范曄論曰。桓譚以不善讖流亡。鄭興以遜辭僅免。賈逵能傳會文致。最差貴顯。世主以此論學。悲哉。遂扶風人也。

南單于比死。弟左賢王莫立。爲丘浮尤鞬單于。帝遣使齎璽書。拜授璽綬。賜以衣冠及繒綵。是後遂以爲常。

二年春正月辛未。初立北郊祀后土。○二月戊戌。帝崩於南宮前殿。年六十二。帝每旦視朝。日昃乃罷。數引公卿。將講論經理。夜分乃寐。皇太子見帝勤勞不怠。承間諫曰。陛下有禹湯之明。而失黃老養性之福。願頤愛精神。優游自寧。帝曰。我自樂此。不爲疲也。雖以征伐濟大業。及天下既定。乃退功臣。而進文吏。明慎政體。總攬權綱。量時度力。舉無過事。故能恢復前烈。身致太平。太尉趙熹典喪事。時經王莽之亂。舊典不存。皇太子與諸王雜坐同席。藩國官屬出入宮省。與百僚無別。熹正色橫劍殿階。扶下諸王。以明尊卑。奏遣謁者將護官屬。分止他縣。諸王竝令就邸。唯得朝哺入臨。整禮儀。嚴門衛。內外肅然。○太子卽皇帝位。尊皇后曰皇太后。○山陽王荆哭臨不哀。而作飛書。令蒼頭詐稱大鴻臚郭況書。與東海王彊言其無罪被廢。及郭后黜辱。勸令東歸。舉兵以取天下。且曰。高祖起亭長。陛下與白水。何況於王。陛下長子。故副主哉。當爲秋霜。母爲檻羊。人主崩亡。閭閻之伍。尙爲盜賊。欲有所望。何況王邪。彊得書。惶怖。卽執其使。封書上之。明帝以荆母弟。祕其事。遣荆出止河南宮。○三月丁卯。葬光武皇帝於原陵。○夏四月丙辰。詔曰。方今上無天子。下無方伯。若涉淵水。而無舟楫。夫萬乘至重。而壯者慮輕。實賴有德左右小子。高密侯禹元功之首。東平王蒼寬博有謀。其以禹爲太傅。蒼爲驃騎將軍。蒼懇辭。帝不許。又詔驃騎將軍置長史掾史員四十人。位在三公

上蒼嘗薦西曹掾齊國吳良。帝曰。薦賢助國。宰相之職也。蕭何舉韓信。設壇而拜。不復考試。今以良爲議郎。○初燒當羌豪滇良擊破先零。奪居其地。滇良卒。子滇吾立。附落轉盛。秋滇吾與弟滇岸率衆寇隴西。敗太守劉盱於允街。於是守塞諸羌皆叛。詔謁者張鴻領諸郡兵擊之。戰於允吾。鴻軍敗沒。冬十一月復遣中郎將竇固監捕虜將軍馬武等二將軍四萬人討之。○是歲南單于莫死。弟汙立爲伊伐於慮鞬單于。

顯宗孝明皇帝上

永平元年春正月。帝奉公卿已下。朝于原陵。如元會儀。乘輿拜神坐。退坐東廂。侍衛官皆在神坐後。太官上食。太常奏樂。郡國上計吏。以次前當神軒。占其郡穀價及民所疾苦。是後遂以爲常。○夏五月。高密元侯鄧禹薨。○東海恭王彊病。上遣使者太醫乘驛視疾。駱驛不絕。詔沛王輔濟南王康淮陽王延詣魯省疾。戊寅彊薨。臨終。上書謝恩。言身旣天命。孤弱復爲皇太后陛下憂慮。誠悲誠慙。息政小人也。猥當襲臣後。必非所以全利之也。願還東海郡。今天下新罹大憂。惟陛下加供養。皇太后數進御餐。臣彊困劣。言不能盡。意願竝謝。諸王不意永不復相見也。帝覽書。悲慟從太后出。幸津門亭。發哀。使太司空持節護喪事。贈送以殊禮。詔楚王英趙王栩北海王興及京師親戚皆會葬。帝追惟彊深執謙儉。不欲厚葬。以違其意。於是特詔。遣送之物。務從約省。衣足斂形。茅車瓦器。物減於制。以彰王卓爾獨行之志。將作大匠留起陵廟。○秋七月。馬武等擊燒當羌。大破之。餘皆降散。○山陽王荆私迎能爲星者。與謀議冀天下有變。帝聞之。徙封荆廣陵王。遣之國。○遼東太守祭彤使偏何討赤山烏桓。大破之。斬其魁帥。塞外震讐。西自武威。東盡玄菟。皆來內附。野無風塵。乃悉罷緣邊屯兵。○東平王蒼以爲中興三十餘年。四方無虞。宜修禮樂。乃與公卿共議。定南北郊冠冕車服制。

度及光武廟登歌八佾舞數上之。○好時愍侯耿弇薨。二年春正月辛未宗祀光武皇帝於明堂帝及公卿列侯始服冠冕玉佩以行事禮畢登靈臺望雲物赦天下。○三月臨辟雍初行大射禮冬十月壬子上幸辟雍初行養老禮以李躬爲三老桓榮爲五老三老服都紵大袍冠進賢扶玉杖五更亦如之。不杖乘輿到辟雍禮殿御坐東廂遣使者安車迎三老五更於太學講堂天子迎于門屏交禮道自阼階三老升自賓階至階天子揖如禮三老升東面三公設几九卿正履天子親袒割牲執醬而饋執爵而酌祝饌在前祝體在後五更南面三公進供禮亦如之禮畢引桓榮及弟子升堂上自爲下說諸儒執經問難於前冠帶縉紳之人圍橋門而觀聽者蓋億萬計於是下詔賜祭爵關內侯三老五更皆以二千石祿養終厥身賜天下三老酒人一石肉四十斤上自爲太子受尚書於桓榮及卽帝位猶尊榮以師禮嘗幸太常府令榮坐東面設几杖會百官及祭門生數百人上親自執業諸生或避位發難上謙曰大師在是旣罷悉以太官供具賜太常家榮每疾病帝輒遣使者存問太官太醫相望於道及篤上疏謝恩讓還爵土帝幸其家問起居入街下車擁經而前撫榮垂涕賜以牀茵帷帳刀劍衣被良久乃去自是諸侯將軍大夫問疾者不敢復乘車到門皆拜牀下榮卒帝親自變服臨喪送葬賜家瑩于首山之陽子郁當嗣讓其兄子汎帝不許郁乃受封而悉以租入與之帝以郁爲侍中。○上以中山王馮郭太后少子太后尤愛之故獨留京師至是始與諸王俱就國賜以虎賁官騎恩寵尤厚獨得往來京師帝禮待陰郭每事必均數受賞賜恩寵俱渥。○甲子上行幸長安十一月甲申遣使者以中牢祠蕭何霍光帝過式其墓進幸河東癸卯還宮。○十二月護羌校尉竇林坐欺罔及臧罪下獄死林者融之從兄子也於是竇氏一公兩侯三公主四二千石相與並時自祖及孫官府邸第相望京邑於親戚功臣中莫與爲比及林誅帝數下詔切責融融惶恐乞骸骨

詔令歸第養病。○是歲初迎氣於五郊。○新陽侯陰就子豐尙鄴邑公主公主驕妬豐殺之被誅父母皆自殺。○南單于汗死單于比之子適立爲醯僮尸逐侯鞬單于。三年春二月甲寅太尉趙熹司徒李訢免。○丙辰以左馮翊郭丹爲司徒。○己未以南陽太守虞延爲太尉。○甲子立貴人馬氏爲皇后皇子爲烜太子后援之女也光武時以選入太子宮能奉承陰后傍接同列禮則脩備上下安之遂見寵異及帝卽位爲貴人時后前母姊女賈氏亦以選入生皇子烜帝以后無子命養之謂曰人未必當自生子但患愛養不至耳后於是盡心撫育勞悴過於所生太子亦孝性淳篤母子慈愛始終無纖介之間后常以皇嗣未廣薦達左右若恐不及後宮有進見者每加慰納若數所寵引輒加隆遇及有司奏立長秋宮帝未有所言皇太后曰馬貴人德冠後宮卽其人也后旣正位宮闈愈自謙肅好讀書常衣大練裙不加緣朔望諸姬主朝請望見后袍衣疎曠以爲綺縠就視乃笑后曰此綰特宜染色故用之耳羣臣奏事有難平者帝數以試后后輒分解趣理各得其情然未嘗以家私干政事帝由是寵敬始終無衰焉。○帝思中興功臣乃圖畫二十八將於南宮雲臺以鄧禹爲首次馬成吳漢王梁賈復陳俊耿弇杜茂寇恂傅俊岑彭堅鐔馮異王霸朱祐任光祭遵李忠景丹萬修蓋延邳彤銚期劉植耿純臧宮馬武劉隆又益以王常李通竇融卓茂合三十二人馬援以椒房之親獨不與焉。○夏四月辛酉封皇子建爲千乘王羨爲廣平王。○六月丁卯有星孛於天船北。○帝大起北宮時天旱尙書僕射會稽鍾離意詣闕免冠上疏曰昔成湯遭旱以六事自責曰政不節邪使民疾邪宮室營邪女謁盛邪苞苴行邪讒夫昌邪竊見北宮大作民失農時自古非苦宮室小狹但患民不安寧宜且罷止以應天心帝策詔報曰湯引六事答在一人其冠履勿謝又勅大匠止作諸宮減省不急詔因謝公卿百僚遂應時澍雨意薦全椒長劉平詔徵拜議郎平在全椒政有恩惠民或增貲就賦或減年

從役刺史太守行部獄無繫囚人自以得所不知所問唯班詔書而去帝性褊察好以耳目
 隱發為明公卿大臣數被詆毀近臣尚書以下至見提曳常以事怒郎藥崧以杖撞之崧走
 入牀下帝怒甚疾言曰郎出崧乃曰天子穆穆諸侯皇皇未聞入君自起撞郎帝乃赦之是
 時朝廷莫不悚慄爭為嚴切以避誅責唯鍾離意獨敢諫爭數封還詔書臣下過失輒救解
 之會連有變異上疏曰陛下敬畏鬼神憂恤黎元而天氣未和寒暑違節者咎在羣臣不能
 宣化治職而以苛刻為俗百官無相親之心吏民無雍雍之志至於感逆和氣以致天災百
 姓可以德勝難以力服鹿鳴之詩必言宴樂者以人神之心洽然後天氣和也願陛下垂聖
 德緩刑罰順時氣以調陰陽帝雖不能時用然知其至誠終愛厚之○秋八月戊辰詔改太
 樂官曰太子用識文也○壬申晦日有食之詔曰昔楚莊無災以致戒懼魯哀禍大天不降
 譴今之動變儻尚可救有司勉思厥職以匡無德○冬十月甲子車駕從皇太后幸章陵荆
 州刺史郭賀官有殊政上賜以三公之服黼黻冕旒敕行部去櫓帷使百姓見其容服以章
 有德戊辰還自章陵○是歲京師及郡國七大水○莎車王賢以兵威逼奪于寘大宛媯塞
 王國使其將守之于寘人殺其將君德立大人休莫霸為王賢率諸國兵數萬擊之大為休
 莫霸所敗脫身走還休莫霸進圍莎車中流矢死于寘人復立其兄子廣德為王廣德使其
 弟仁攻賢廣德父先拘在莎車賢乃歸其父以女妻之與之和親

資治通鑑卷第四十四

資治通鑑卷第四十五

漢紀三十七

顯宗孝明皇帝下

永平四年春帝近出觀覽城第欲遂校獵河內東平王蒼上書諫帝覽奏即還宮○秋九月
 戊寅千乘哀王建薨無子國除○冬十月乙卯司徒郭丹司空馮魴免以河南尹沛國范滂
 為司徒太僕伏恭為司空恭湛之兄子也○陵鄉侯梁松坐怨望縣飛書誹謗下獄死初上
 為太子太中大夫鄭興子衆以通經知名太子及山陽王荆因梁松以維帛請之衆曰太子
 儲君無外交之義漢有舊防藩王不宜私通賓客松曰長者意不可逆衆曰犯禁觸罪不如
 守正而死遂不往及松敗賓客多坐之唯衆不染於辭○于寘王廣德將諸國兵三萬人攻
 莎車誘莎車王賢殺之并其國匈奴發諸國兵圍于寘廣德請降匈奴立賢質子不居徵為
 莎車王廣德又攻殺之更立其弟齊黎為莎車王○東平王蒼自以至親輔政聲望日重意
 不自安前後累上疏稱自漢興以來宗室子弟無得在公卿位者乞上驃騎將軍印綬退就
 藩國辭甚懇切帝乃許蒼還國而不聽上將軍印綬
 五年春二月蒼罷歸藩帝以驃騎長史為東平太傅掾為中大夫令史為王家郎加賜錢五
 千萬布十萬匹○冬十月上行幸鄴是月還宮○十一月北匈奴寇五原十二月寇雲中南單
 于擊卻之○是歲發遣邊民在內郡者賜裝錢人二萬○安豐戴侯寶融年老子孫縱誕多
 不法長子穆尚內黃公主矯稱陰太后詔令六安侯劉盱去婦以女妻之盱歸家上書言狀

帝大怒。盡免穆等官。諸竇爲郎吏者。皆將家屬歸故郡。獨留融京師。融尋薨。後數歲。穆等復坐事。與子勳。宣。皆下獄死。久之。詔還融夫人。與小孫一人。居雒陽。六年春。二月。王雒山出寶鼎。獻之。夏。四月。甲子。詔曰。祥瑞之降。以應有德。方今。政化多僻。何以致茲。易曰。鼎象三公。豈公卿奉職。得其理邪。其賜三公帛五十匹。九卿二千石半之。先帝詔書。禁人上事言聖。而間者章奏。頗多浮詞。自今。若有過稱虛譽。尙書皆宜抑而不省。示不爲諂子蚩也。○冬。十月。上行幸魯。十二月。還幸陽城。壬午。還宮。○是歲。南單于適死。單于莫之子蘇立。爲丘除車林鞮單于。數月。復死。單于適之弟長立。爲湖邪尸逐侯鞮單于。七年春。正月。癸卯。皇太后陰氏崩。二月。庚申。葬光烈皇后。○北匈奴猶盛。數寇邊。遣使求合市。上冀其交通。不復爲寇。許之。○以東海相宗均爲尙書令。初。均爲九江太守。五日一聽事。悉省掾史。閉督郵府內。屬縣無事。百姓安業。九江舊多虎暴。常募設檻筭。而猶多傷害。均下記屬縣曰。夫江淮之有猛獸。猶北土之有鷄豚也。今爲民害。咎在殘吏。而勞動張捕。非憂恤之本也。其務退姦貪。思進忠善。可一去檻筭。除削課制。其後。無復虎患。帝聞均名。故任以樞機。均謂人曰。國家喜文法。廉吏以爲足。以止姦也。然文吏習爲欺謾。而廉吏清在一己。無益百姓流亡。盜賊爲害也。均欲叩頭爭之。時未可改也。久。將自苦之。乃可言耳。未及言。會遷司隸校尉。後上聞其言。追善之。八年春。正月。己卯。司徒范滂薨。○三月。辛卯。以太尉虞延爲司徒。衛尉趙熹行太尉事。○越騎司馬鄭衆使北匈奴。單于欲令衆拜。衆不爲屈。單于圍守閉之。不與水火。衆拔刀自誓。單于恐而止。乃更發使。隨衆還京師。初。大司農耿國上言。宜置度遼將軍。屯五原。以防南匈奴。逃亡朝廷。不從。南匈奴須卜骨都侯等。知漢與北虜交使。內懷嫌怨。欲畔密使人詣北虜。令遣兵迎之。鄭衆出塞。疑有異。伺候。果得須卜使人。乃上言。宜更置大將。以防二虜交通。由是始置度遼營。以中郎將吳棠行度遼將軍事。將黎陽虎牙營士屯五原曼柏。○秋。郡國十四大水。○冬。十月。北宮成。○丙子。募死罪繫囚。詣度遼營。有罪亡命者。令贖罪。各有差。楚王英奉黃縑白紬詣國相曰。託在藩輔。過惡累積。歡喜大恩。奉送縑帛。以贖愆罪。國相以聞。詔報曰。楚王誦黃老之微言。尙浮屠之仁慈。潔齊三月。與神爲誓。何嫌疑。當有悔吝。其還贖。以助伊蒲塞桑門之盛饌。初。帝聞西域有神。其名曰佛。因遣使之天竺。求其道。得其書。及沙門以來。其書大抵以虛無爲宗。貴慈悲不殺。以爲人死。精神不滅。隨復受形。生時所行善惡。皆有應報。故所貴修煉精神。以至爲佛。善爲宏闊勝大之言。以勸誘愚俗。精於其道者。號曰沙門。於是中國始傳其術。圖其形像。而王公貴人。獨楚王英最先好之。○壬寅晦。日有食之。既。○詔羣司勉修職事。極言無諱。於是在位者。皆上封事。各言得失。帝覽章。深自引咎。以所上。班示百官。詔曰。羣僚所言。皆朕之過。民冤不能理。吏黠不能禁。而輕用民力。繕修宮宇。出入無節。喜怒過差。永覽前戒。竦然兢懼。徒恐薄德。久而致怠耳。○北匈奴雖遣使入貢。而寇鈔不息。邊城晝閉。帝議遣使報其使者。鄭衆上疏諫曰。臣聞北單于所以要致漢使者。欲以離南單于之衆。堅三十六國之心也。又當揚漢和親。誇示鄰敵。令西域欲歸化者。局促狐疑。懷土之人。絕望中國耳。漢使既到。便偃蹇自信。若復遣之。虜必自謂得謀。其羣臣駁議者。不敢復言。如是。南庭動搖。烏桓有離心矣。南單于久居漢地。具知形勢。萬分離析。旋爲邊害。今幸有度遼之衆。揚威北垂。雖勿報答。不敢爲患。帝不從。復遣衆往。衆因上言。臣前奉使。不爲匈奴拜。單于恚恨。遣兵圍臣。今復銜命。必見陵折。臣誠不忍持大漢節。對毘裘獨拜。如令匈奴遂能服臣。將有損大漢之彊。帝不聽。衆不得已。既行在路。連上書固爭之。詔切責衆。追還繫廷尉。會赦歸家。其後。帝見匈奴來者。聞衆與單于爭禮之狀。乃復召衆爲軍司馬。九年夏。四月。甲辰。詔司隸校尉部刺史。歲上墨綬。長吏視事三歲已上。治狀尤異者。各一人。

與計偕上。及尤不治者，亦以聞。○是歲，大有年。○賜皇子恭號曰靈壽王，黨號曰重熹王，未有國邑。○帝崇尚儒學，自皇太子諸王侯及大臣子弟，功臣子孫，莫不受經。又爲外戚樊氏、郭氏、陰氏、馬氏諸子立學於南宮，號四姓小侯。置五經師，搜選高能，以授其業。自期門羽林之士，悉令通孝經章句。匈奴亦遣子入學。○廣陵王荆復呼相工，謂曰：「我貌類先帝，先帝三十得天下，我今亦三十，可起兵未？」相者詣吏告之。荆惶恐，自繫獄。帝加恩，不考極其事。詔不得臣屬吏民唯食租如故，使相中尉謹宿衛之。荆又使巫祭祀祝詛，詔長水校尉樊儵等雜治其獄。事竟，奏請誅荆。帝怒曰：「諸卿以我弟，故欲誅之。卽我子，卿等敢爾邪？」儵對曰：「天下者，高帝天下，非陛下之天下也。春秋之義，君親無將，將而必誅。臣等以荆屬託母弟，陛下留聖心，加惻隱，故敢請耳。如令陛下子，臣等專誅而已。」帝歎息善之。儵，宏之子也。

十年春，二月，廣陵王荆自殺。國除。○夏，四月，戊子，赦天下。○閏月，甲午，上幸南陽，召校官弟子作雅樂。奏鹿鳴。帝自御塡籥，和之以娛嘉賓。還幸南頓。冬十二月，甲午，還宮。○初，陵陽侯丁綝卒，子鴻當襲封。上書稱病，讓國於弟盛，不報。旣葬，乃挂衰經於冢廬而逃去。友人九江鮑駿遇鴻於東海，讓之曰：「昔伯夷、吳札亂世，權行，故得申其志耳。春秋之義，不以家事廢王事。今子以兄弟私恩而絕父不滅之基，可乎？」鴻感悟，垂涕乃還。就國。鮑駿因上書薦鴻經學至行。上徵鴻爲侍中。

十一年春，正月，東平王蒼與諸王俱來朝，月餘還國。帝臨送歸宮，悽然懷思，乃遣使手詔賜東平國中傳曰：「辭別之後，獨坐不樂，因就車歸，伏軾而吟，瞻望永懷，實勞我心。誦及采菽，以增歎息。日者問東平王處家何等最樂，王言爲善最樂，其言甚大，副是要腹矣。今送列侯印十九枚，諸王子年五歲已上，能趨拜者，皆令帶之。」十二年春，哀牢王柳貌率其民五萬餘戶內附，以其地置哀牢、博南二縣，始通博南山。度蘭

倉水行者苦之，歌曰：「漢德廣，開不賓，度蘭倉爲它人。」○初，平帝時，河汴決壞，久而不修。建武十年，光武欲修之，浚儀令樂俊上言：「民新被兵革，未宜興役，乃止。其後，汴渠東侵，日月彌廣，兗豫百姓怨歎，以爲縣官恆興他役，不先民急。會有薦樂浪王景能治水者，夏四月，詔發卒數十萬，遣景與將作謁者王吳脩汴渠隄，自滎陽東至千乘海口，千餘里，十里立一水門，令更相洄注，無復潰漏之患。景雖減省役費，然猶以百億計焉。」○秋七月乙亥，司空伏恭罷，乙未，以大司農牟融爲司空。○是時天下安平，人無徭役，歲比登稔，百姓殷富，粟斛三十，牛羊被野。

十三年夏，四月，汴渠成，河汴分流，復其舊迹。辛巳，帝行幸滎陽，巡行河渠，遂度河登太行，幸上黨壬寅，還宮。○冬十月壬辰晦，日有食之。○楚王英與方士作金龜玉鶴，刻文字爲符瑞。男子燕廣告英與漁陽王平、顏忠等造作圖書，有逆謀。事下案驗，有司奏英大逆不道，請誅之。帝以親親不忍，十一月廢英，徙丹陽溼縣，賜湯沐邑五百戶，男女爲侯主者，食邑如故。許太后勿上璽綬，留住楚宮。先是，有私以英謀告司徒虞延者，延以英藩戚至親，不然其言，及英事覺，詔書切讓延。

十四年春，三月甲戌，延自殺。以太常周澤行司徒事，頃之，復爲太常。夏四月丁巳，以鉅鹿太守南陽邢穆爲司徒。○楚王英至丹陽，自殺。詔以諸侯禮葬於溼，封燕廣爲折姦侯。是時窮治楚獄，遂至累年。其辭語相連，自京師親戚諸侯州郡豪桀及考案吏阿附坐死徙者以千數。而繫獄者尚數千人。初，樊儵弟鮪爲其子賞，求楚王英女，儵聞而止之，曰：「建武中，吾家竝受榮寵，一宗五侯，時特進一言，女可以配王，男可以尙主，但以貴寵過盛，卽爲禍患，故不爲也。且爾一子，奈何棄之於楚乎？」鮪不從。及楚事覺，儵已卒，上追念儵謹恪，故其諸子皆得坐。英陰疏天下名士，上得其錄，有吳郡太守尹興名，乃徵興及掾史五百餘人，詣廷尉就考。

諸吏不勝掠治死者太半。唯門下掾陸績。主簿梁宏。功曹史駟勳。備受五毒。肌肉消爛。終無異辭。績母自吳來。雒陽作食。以饋績。績雖見。考辭色未嘗變。而對食悲泣。不自勝。治獄使者問其故。績曰。母來不得見。故悲耳。問何以知之。績曰。母截肉未嘗不方。斷葱以寸為度。故知之。使者以狀聞。上乃赦興等。禁錮終身。顏忠。王平辭。引隧鄉侯耿建。朗陵侯臧信。濩澤侯鄧鯉。曲成侯劉建。建等辭未嘗與忠不相見。是時上怒甚。吏皆惶恐。諸所連及。率一切陷入。無敢以情恕者。侍御史蹇朗。心傷其冤。試以建等物色。獨問忠。平。而二人錯愕。不能對。朗知其詐。乃上言。建等無姦。專為忠平所誣。疑天下無辜。類多如此。帝曰。即如是。忠平。何故引之。對曰。忠平自知所犯不道。故多有虛引。冀以自明。帝曰。即如是。何不早奏。對曰。臣恐海內別有發其姦者。帝怒曰。吏持兩端。促提下捶之。左右方引去。朗曰。願一言而死。帝曰。誰與共為章。對曰。臣獨作之。上曰。何以不與三府議。對曰。臣自知當必族滅。不敢多汗染人。上曰。何故族滅。對曰。臣考事一年。不能窮盡姦狀。反為罪人訟冤。故知當族滅。然臣所以言者。誠冀陛下。一覺悟而已。臣見考囚在事者。咸共言。妖惡大故。臣子所宜同疾。今出之。不如入之。可無後責。是以考一連十。考十連百。又公卿朝會。陛下問以得失。皆長跪言。舊制大罪。禍及九族。陛下大恩。裁止於身。天下幸甚。及其歸舍。口雖不言。而仰屋竊歎。莫不知其多冤。無敢悟陛下言者。臣今所陳。誠死無悔。帝意解。詔遣朗出。後二日。車駕自幸洛陽獄。錄囚徒。理出千餘人。時天旱。即大雨。馬后亦以楚獄多濫。乘間為帝言之。帝惻然感悟。夜起彷徨。由是多所降宥。任城令汝南袁安。遷楚郡太守。到郡不入府。先往按楚王英獄事。理其無明驗者。條上出之。府丞掾史皆叩頭爭。以為阿附反虜。法與同罪。不可安。安曰。如有不合。太守自當坐之。不以相及也。遂分別具奏。帝感悟。即報許。得出者四百餘家。○夏五月。封故廣陵王荆子元壽為廣陵侯。食六縣。又封寶融孫嘉為安豐侯。○初作壽陵制。令流水而已。無得起墳。萬年之後。掃地而祭。杆水。脯糒而已。過百日。唯四時設奠。置吏卒數人。供給灑掃。敢有所與作者。以擅議宗廟法從事。

十五年春二月。庚子。上東巡。癸亥。耕于下邳。三月。至魯。幸孔子宅。親御講堂。命皇太子諸王。說經。又幸東平。大梁。夏四月。庚子。還宮。○封皇子恭為鉅鹿王。黨為樂成王。衍為下邳王。暢為汝南王。昞為常山王。長為濟陰王。帝親定其封域。裁令半楚。淮陽。馬后曰。諸子數縣。於制不亦儉乎。帝曰。我子豈宜與先帝子等。歲給二十萬足矣。○乙巳。赦天下。○謁者僕射耿秉。數上言。請擊匈奴。上以顯親侯寶固。嘗從其世父融。在河西。明習邊事。乃使秉固與太僕祭彤。虎賁中郎將馬廖。下博侯劉張。好時侯耿忠等。共議之。耿秉曰。昔者匈奴。援引弓之類。并左衽之屬。故不可得而制。孝武既得河西四郡。及居延。朔方。虜失其肥饒畜兵之地。羌胡分離。唯有西域。俄復內屬。故呼韓邪單于。請事款塞。其勢易乘也。今有南單于。形勢相似。然西域尚未內屬。北虜未有釁隙。臣愚以為當先擊白山。得伊吾。破車師。通使烏孫諸國。以斷右臂。伊吾亦有匈奴。南呼衍一部。破此。復為折其左角。然後匈奴可擊也。上善其言。議者或以為今兵出白山。匈奴必并兵相助。又當分其東。以離其眾。上從之。十二月。以秉為駙馬都尉。固為奉車都尉。以騎都尉秦彭為秉副。耿忠為固副。皆置從事司馬。出屯涼州。秉國之子忠。奔之子。廖。援之子也。

十六年春二月。遣彤與度遼將軍吳棠。將河東西河。羌胡。及南單于兵。萬一千騎。出高闕塞。寶固。耿忠。率酒泉。敦煌。張掖甲卒。及盧水羌胡。萬二千騎。出酒泉塞。耿秉。秦彭。率武威。隴西。天水。募士。及羌胡。萬騎。出張掖居延塞。騎都尉來苗。護烏桓。校尉文穆。將太原。鴈門。代郡。上谷。漁陽。右北平。定襄郡兵。及烏桓。鮮卑。萬一千騎。出平城塞。伐北匈奴。寶固。耿忠。至天山。擊呼衍王。斬首千餘級。追至蒲類海。取伊吾。盧地。置宜禾都尉。留吏士屯田伊吾。盧城。耿秉。秦

彭擊匈奴林王絕幕六百餘里。至三木樓山而還。來苗文穆。至匈奴水上。虜皆奔走。無所獲。祭
 彤與南匈奴左賢王信不相得。出高闕塞。九百餘里。得小山。信妄言。以為涿邪山。不見虜而
 還。彤與吳棠坐逗留畏懦。下獄。免。彤自恨無功。出獄數日。歐血死。臨終。謂其子曰。吾蒙國厚
 恩。奉使不稱。身死誠慚。恨義不可以無功受賞。死後若悉簿上所得物。身自詣兵屯。效死前
 行。以副吾心。既卒。其子逢。上疏。具陳遺言。帝雅重彤。方更任用。聞之大驚。嗟嘆良久。烏桓鮮
 卑。每朝賀京師。常過彤冢拜謁。仰天號泣。遼東吏民為立祠。四時奉祭焉。寶固獨有功。加位
 特進。固使假司馬班超。與從事郭恂俱使西域。超行到鄯善。鄯善王廣奉超禮敬甚備。後忽
 更踈疎。超謂其官屬曰。寧覺廣禮意薄乎。官屬曰。胡人不能常久。無它故也。超曰。此必有北
 虜使來。狐疑未知所從故也。明者睹未萌。況已著邪。乃召侍胡詐之曰。匈奴使來數日。今安
 在乎。侍胡惶恐曰。到已三日。去此三十里。超乃閉侍胡。悉會其吏士三十六人。與共飲酒。酣
 因激怒之曰。卿曹與我俱在絕域。今虜使到。裁數日。而王廣禮敬即廢。如令鄯善收吾屬送
 匈奴。骸骨長為豺狼食矣。為之奈何。官屬皆曰。今在危亡之地。死生從司馬。超曰。不入虎穴
 不得虎子。當今之計。獨有因夜以火攻虜使。彼不知我多少。必大震怖。可殄盡也。滅此虜則
 鄯善破膽。功成事立矣。眾曰。當與從事議之。超怒曰。吉凶決於今日。從事文俗吏。聞此必恐
 而謀泄。死無所名。非壯士也。眾曰。善。初夜。超遂將吏士往犇虜營。會天大風。超令十人持鼓
 藏虜舍後。約曰。見火然。皆當鳴鼓大呼。餘人悉持兵弩。夾門而伏。超乃順風縱火。前後鼓噪。
 虜眾驚亂。超手格殺三人。吏兵斬其使。及從士三十餘級。餘眾百許人。悉燒死。明日。乃還告
 郭恂。恂大驚。既而色動。超知其意。舉手曰。掾雖不行。班超何心獨擅之乎。恂乃悅。超於是召
 鄯善王廣。以虜使首示之。一國震怖。超告以漢威德。自今以後。勿復與北虜通。廣叩頭願屬
 漢。無二心。遂納子為質。還白寶固。固大喜。具上超功效。并求更選使使西域。帝曰。吏如班超。

何故不遣。而更選乎。今以超為軍司馬。令遂前功。固復使超使于竇。欲益其兵。超願。但將本
 所從三十六人。曰。于竇國大而遠。今將數百人。無益於疆。如有不虞。多益為累耳。是時于竇
 王廣德。雄張南道。而匈奴遣使。監護其國。超既至于竇。廣德禮意甚疎。且其俗信巫。巫言神
 怒。何故欲向漢。漢使有駟馬。急求取以祠我。廣德遣國相私來比。就超請馬。超密知其狀。報
 許之。而令巫自來取馬。有頃。巫至。超即斬其首。收私來比。鞭笞數百。以巫首送廣德。因責讓
 之。廣德素聞超在鄯善。誅滅虜使。大惶恐。即殺匈奴使者。而降。超重賜其王以下。因鎮撫焉。
 於是諸國皆遣子入侍。西域與漢絕。六十五載。至是乃復通焉。超彪之子也。○淮陽王延。性
 驕奢。而遇下嚴烈。有上書告延。與姬兄謝弇。及姊婿韓光。招姦猾作圖讖。祠祭祝詛。事下案
 驗。五月。癸丑。弇光及司徒邢穆。皆坐死。所連及。死徙者甚眾。○戊午晦。日有食之。○六月。丙
 寅。以大司農西河王敏為司徒。○有司奏。請誅淮陽王延。上以延罪薄。於楚王英。秋七月。徙
 延為阜陵王。食二縣。○是歲。北匈奴大入雲中。雲中太守廉范。拒之。吏以眾少。欲移書傍郡
 求救。范不許。會日暮。范令軍士各交縛兩炬。三頭爇火。營中星列。虜謂漢兵救至。大驚。待旦
 將退。范令軍中蓐食。晨往赴之。斬首數百級。虜自相讎藉。死者千餘人。由此不敢復向雲中。
 范。丹之孫也。

十七年春正月。上當謁原陵。夜夢先帝太后。如平生歡。既寤。悲不能寐。即案曆。明旦日吉。遂
 率百官上陵。其日。降甘露於陵樹。帝令百官采取。以薦會畢。帝從席前伏。御牀視太后鏡。匱
 中物。感動悲涕。令易脂澤裝具。左右皆泣。莫能仰視。○北海敬王陸薨。陸少好學。光武及上
 皆愛之。嘗遣中大夫詣京師朝賀。召而謂之曰。朝廷設問寡人。大夫將何辭以對。使者曰。大
 王忠孝慈仁。敬賢樂士。臣敢不以實對。陸曰。吁。子危我哉。此乃孤幼時進趣之行也。大夫其
 對。以孤襲爵以來。志意衰惰。聲色是娛。犬馬是好。乃為相愛耳。其智慮畏慎如此。○二月。乙

已司徒王敏薨。○三月癸丑，以汝南太守鮑昱爲司徒。昱，永之子也。○益州刺史梁國朱輔宣示漢德，威懷遠夷。自汝山以西，前世所不至，正朔所未加，白狼槃木等百餘國，皆舉種稱臣奉貢。白狼王唐菽作詩三章，歌頌漢德，輔使犍爲郡掾由恭譯而獻之。○初，龜茲王建爲匈奴所立，倚恃虜威，據有北道，攻疏勒王，立其臣兜題爲疏勒王。班超從間道至疏勒，去兜題所居槃橐城九十里，逆遣吏田慮先往降之，敕慮曰：「兜題本非疏勒種，國人必不用命。若不卽降，便可執之。慮既到，兜題見慮輕弱，殊無降意。慮因其無備，遂前劫縛兜題，左右出其不意，皆驚懼奔走。慮馳報超，超卽赴之，悉召疏勒將吏，說以龜茲無道之狀，因立其故王兄子忠爲王。國人大悅，超問忠及官屬當殺兜題邪？生遣之邪？咸曰：「當殺之。超曰：「殺之無益於事，當令龜茲知漢威德，遂解遣之。」○夏五月戊子，公卿百官以帝威德懷遠，祥物顯應，並集朝堂，奉觴上壽，制曰：「天生神物，以應王者，遠人慕化，實由有德。朕以虛薄，何以享斯。唯高祖光武聖德所被，不敢有辭。其敬舉觴，太常擇吉日，策告宗廟，仍推恩賜民爵及粟，有差。○冬十一月，遣奉車都尉竇固、駙馬都尉耿秉、騎都尉劉張，出敦煌，昆侖塞，擊西域。秉、張皆去符傳，以屬固。合兵萬四千騎，擊破白山虜於蒲類海上，遂進擊車師。車師前王卽後王之子也，其廷相去五百餘里，固以後王道遠，山谷深，士卒寒苦，欲攻前王，秉以爲先赴後王，并力根本，則前王自服。固計未決，秉奮身而起，請行前，乃上馬，引兵北入，衆軍不得已，並進，斬首數千級。後王安得震怖，走出門迎，秉脫帽抱馬足降。秉將以詣固，其前王亦歸命。遂定車師而還。於是固奏復置西域都護，及戊己校尉，以陳睦爲都護，司馬耿恭爲戊己校尉。屯後王部金蒲城，謁者關寵爲己校尉，屯前王部柳中城，屯各置數百人。恭，況之孫也。

匈奴曰：漢家箭神，其中瘡者必有異，虜中矢者視瘡皆沸。大驚，會天暴風雨，隨雨擊之，殺傷甚衆。匈奴震怖，相謂曰：漢兵神，真可畏也。遂解去。○夏六月己未，有星孛於大微。○耿恭以疏勒城傍有澗水，可固，引兵據之。秋七月，匈奴復來攻，擁絕澗水，恭於城中穿井十五丈，不得水。吏士渴乏，至笮馬糞汁而飲之。恭身自率士輓籠，有頃，水泉奔出，衆皆稱萬歲。乃令吏士揚水以示虜，虜出不意，以爲神明，遂引去。○八月壬子，帝崩於東宮前殿。年四十八。遺詔無起寢廟，藏主於光烈皇后更衣別室。帝遵奉建武制度，無所變更。后妃之家不得封侯與政。館陶公主爲子求郎，不許，而賜錢千萬，謂羣臣曰：「郎官上應列宿，出宰百里，苟非其人，則民受其殃，是以難之。公車以反支日不受章奏。帝聞而怪曰：「民廢農桑，遠來詣闕，而復拘以禁忌，豈爲政之意乎？於是遂蠲其制，尙書閭章二妹爲貴人，章精力曉舊典，久次當遷重職。帝爲後宮親屬，竟不用，是以吏得其人。民樂其業，遠近畏服。戶口滋殖焉。○太子卽位。年十八。尊皇后曰皇太后。明帝初崩，馬氏兄弟爭欲入宮，北宮衛士令楊仁被甲持戟，嚴勒門衛，人莫敢輕進者。諸馬乃共譖仁於章帝，言其峻刻。帝知其忠，愈善之，拜爲什邡令。○壬戌葬孝明皇帝于顯節陵。○冬十月丁未，赦天下。○詔以行太尉事節鄉侯熹爲太傅，司空融爲太尉，竝錄尙書事。○十一月戊戌，以蜀郡太守第五倫爲司空。倫在郡公清，所舉吏多得其人。故帝自遠郡用之。○焉耆、龜茲攻沒都護陳睦。北匈奴圍關龍於柳中城，會中國有大喪，救兵不至，車師復叛，與匈奴共攻耿恭。恭率厲士衆禦之，數月，食盡窮困，乃煮鎧弩食，其筋革，恭與士卒推誠同死生，故皆無二心。而稍稍死亡，餘數十人。單于知恭已困，欲必降之，遣使招恭曰：「若降者當封爲白屋王，妻以女子，恭誘其使，上城，手擊殺之。炙諸城上，單于大怒，更益兵圍恭，不能下。關龍上書求救，詔公卿會議。司空倫以爲不宜救。司徒鮑昱曰：「今使人於危難之地，急而棄之，外則縱蠻夷之暴，內則傷死難之臣，誠令權時，後無邊事，可也。匈奴

如復犯塞為寇。陛下將何以使將。又二部兵人。裁各數十。匈奴圍之。歷旬不下。是其寡弱力盡之效也。可令敦煌酒泉太守。各將精騎二千。多其幡幟。倍道兼行。以赴其急。匈奴疲極之。兵必不敢當。四十日間。足還入塞。帝然之。乃遣征西將軍耿秉屯酒泉。行太守事。遣酒泉太守段彭與謁者王蒙。皇甫援。發張掖酒泉敦煌三郡。及鄯善兵。合七千餘人。以救之。○甲辰晦。日有食之。○太后兄弟。虎賁中郎廖。及黃門郎防。光。終明帝世。未嘗改官。帝以廖為衛尉。防為中郎將。光為越騎校尉。廖等傾身交結。冠蓋之士。爭赴趣之。第五倫上疏曰。臣聞書曰。臣無作威作福。其害于而家。凶于而國。近世光烈皇后。雖友愛天至。而抑損陰氏。不假以權勢。其後梁竇之家。互有非法。明帝即位。竟多誅之。自是洛中。無復權威。書記請託。一皆斷絕。又諡諸外戚曰。苦身待士。不如為國。戴盆望天。事不兩施。今之議者。復以馬氏為言。竊聞衛尉廖。以布三千匹。城門校尉防。以錢三百萬。私贍三輔衣冠。知與不知。莫不畢給。又聞臘日。亦遣其在雒中者。錢各五千。越騎校尉光。臘用羊三百頭。米四百斛。肉五千斤。臣愚以為不應經義。惶恐不敢不以聞。陛下情欲厚之。亦宜所以安之。臣今言此。誠欲上忠陛下。下全后家也。○是歲。京師及兗豫徐州大旱。

資治通鑑卷第四十五

資治通鑑卷第四十六

漢紀三十八

肅宗孝章皇帝上

建初元年春正月。詔兗豫徐三州。稟贍饑民。上問司徒鮑昱。何以消復旱災。對曰。陛下始踐天位。雖有失得。未能致異。臣前為汝南太守。典治楚事。繫者千餘人。恐未能盡當其罪。夫大獄一起。冤者過半。又諸徙者。骨肉離分。孤魂不祀。宜一切還諸徙家。蠲除禁錮。使死生獲所。則和氣可致。帝納其言。校書郎楊終上疏曰。問者北征匈奴。西開三十六國。百姓頻年服役。轉輸煩費。愁困之民。足以感動天地。陛下宜留念省察。帝下其章。第五倫亦同終議。牟融。鮑昱。皆以為孝子無改父之道。征伐匈奴。屯戍西域。先帝所建。不宜回異。終復上疏曰。秦築長城。功役繁興。胡亥不革。卒亡四海。故孝元棄珠厓之郡。光武絕西域之國。不以介鱗易我衣裳。魯文公毀泉臺。春秋譏之曰。先祖為之。而已毀之。不如勿居而已。以其無妨害於民也。襄公作三軍。昭公舍之。君子大其復古。以為不舍。則有害於民也。今伊吾之役。樓蘭之屯。兵久而未還。非天意也。帝從之。○丙寅。詔二千石。勉勸農桑。罪非殊死。須秋案驗。有司明慎選舉。進柔良。退貪猾。順時令。理冤獄。是時承永平故事。吏政尚嚴切。尚書決事。率近於重。尚書沛國陳寵。以帝新即位。宜改前世苛俗。乃上疏曰。臣聞先王之政。賞不僭。刑不濫。與其不得已。寧僭無濫。往者斷獄嚴明。所以威懲姦慝。姦慝既平。必宜濟之以寬。陛下即位。率由此義。數詔羣僚。弘崇晏晏。而有司未悉奉承。猶尚深刻。斷獄者。急於筭格。酷烈之痛。執憲者。煩於詆欺。

放濫之文。或因公行私。逞縱威福。夫為政。猶張琴瑟。大絃急者。小絃絕。陛下宜隆先王之道。蕩滌煩苛之法。輕薄筮楚。以濟羣生。全廣至德。以奉天心。帝深納寵言。每事務於寬厚。○酒泉太守段彭等兵。會柳中擊車師。攻交河城。斬首三千八百級。獲生口三千餘人。北匈奴驚走。車師復降。會關寵已歿。謁者王蒙等欲引兵還。耿恭軍吏范羌時在軍中。固請迎恭。諸將不敢前。乃分兵二千人與羌。從山北迎恭。遇大雪。丈餘。軍僅能至。城中夜聞兵馬聲。以為虜來。大驚。羌遙呼曰。我范羌也。漢遣軍迎校尉耳。城中皆稱萬歲。開門。共相持涕泣。明日。遂相隨俱歸。虜兵追之。且戰且行。吏士素飢困。發疏勒時。尚有二十六人。隨路死沒。三月。至玉門。唯餘十三人。衣履穿決。形容枯槁。中郎將鄭衆為恭以下。洗沐易衣冠。上疏奏恭。以單兵守孤城。當匈奴數萬之衆。連月踰年。心力困盡。鑿山為井。煮弩為糧。前後殺傷醜虜數百千計。卒全忠勇。不為大漢恥。宜蒙顯爵。以厲將帥。恭至雒陽。拜騎都尉。詔悉罷戍。已校尉及都護官。徵還班超。超將發還。疏勒舉國憂恐。其都尉黎弇曰。漢使棄我。我必復為龜茲所滅耳。誠不忍見漢使去。因以刀自剄。超還。至于賓王侯以下。皆號泣曰。依漢使如父母。誠不可去。互抱超馬脚。不得行。超亦欲遂其本志。乃更還疏勒。疏勒兩城已降龜茲。而與尉頭連兵。超捕斬反者。擊破尉頭。殺六百餘人。疏勒復安。○甲寅。山陽東平地震。○東平王蒼上便宜三事。帝報書曰。間吏民奏事。亦有此言。但明智淺短。或謂儻是復慮為非。不知所定。得王深策。恢然意解。思惟嘉謀。以次奉行。特賜王錢五百萬。後帝欲為原陵。顯節。起縣邑。蒼上疏諫曰。竊見光武皇帝躬履儉約之行。深觀始終之分。勤勤懇懇。以葬制為言。孝明皇帝大孝無違。承奉遵行。謙德之美。於斯為盛。臣愚以園邑之興。始自彊秦。古者丘隴。且不欲其著明。豈況築郭邑。建都郭哉。上違先帝聖心。下造無益之功。虛費國用。動搖百姓。非所以致和氣。祈豐年也。陛下履有虞之至性。追祖禰之深思。臣蒼誠傷二帝純德之美。不暢於無窮也。帝乃止。

自是朝廷每有疑政。輒驛使諮問。蒼悉心以對。皆見納用。○秋。八月。庚寅。有星孛于天市。○初。益州西部都尉廣漢鄭純為政清潔。化行夷貊。君長感慕。皆奉珍內附。明帝為之置永昌郡。以純為太守。純在官十年。而卒。後人不能撫循夷人。九月。哀牢王類牢殺守令。反攻博南。○阜陵王延數懷怨望。有告延與子男魴造逆謀者。上不忍誅。冬十一月。貶延為阜陵侯。食一縣。不得與吏民通。○北匈奴阜林溫禹犢王將衆還居涿邪山。南單于與邊郡及烏桓共擊破之。是歲。南部大饑。詔贍給之。二年。春。三月。甲辰。罷伊吾盧屯兵。匈奴復遣兵守其地。○永昌。越嶲。益州。三郡兵。及昆明夷。鹵承等。擊哀牢王類牢於博南。大破斬之。○夏。四月。戊子。詔還坐楚淮陽事徙者。四百餘家。○上欲封爵諸舅。太后不聽。會大旱。言事者以為不封外戚之故。有司請依舊典。太后詔曰。凡言事者。皆欲媚朕。以要福耳。昔王氏五侯。同日俱封。黃霧四塞。不聞澍雨之應。夫外戚貴盛。鮮不傾覆。故先帝防慎。舅氏不令在樞機之位。又言。我子不當與先帝子等。今有司奈何。欲以馬氏比陰氏乎。且陰衛尉。天下稱之。省中御者。至門。出不及履。此遽伯玉之敬也。新陽侯。雖剛彊。微失理。然有方略。據地談論。一朝無雙。原鹿貞侯。勇猛誠信。此三人者。天下選臣。豈可及哉。馬氏不及陰氏。遠矣。吾不才。夙夜累息。常恐虧先后之法。有毛髮之罪。吾不釋言。之。不捨晝夜。而親屬犯之不止。治喪起墳。又不時覺。是吾言之不立。而耳目塞也。吾為天下母。而身服大練。食不求甘。左右但著帛布。無香薰之飾者。欲身率下也。以為外親見之。當傷心自救。但笑言。太后素好儉。前過濯龍門上。見外家問起居者。車如流水。馬如游龍。倉頭衣綠襪。領袖正白。顧視御者。不及遠矣。故不加譴怒。但絕歲用而已。冀以默愧其心。猶懈怠。無憂國忘家之慮。知臣莫如君。況親屬乎。吾豈可上負先帝之旨。下虧先人之德。重襲西京敗亡之禍哉。固不許。帝省詔。悲歎。復重請曰。漢興。舅氏之封侯。猶皇子之為王也。太后誠存謙

虛奈何令臣獨不加恩三舅乎。且衛尉年尊，兩校尉有大病，如令不諱，使臣長抱刻骨之恨，宜及吉時，不可稽留。太后報曰：吾反覆念之，思令兩善，豈徒欲獲謙讓之名，而使帝受不外交之嫌哉？昔竇太后欲封王皇后之兄丞相條侯，言高祖約無軍功不侯，今馬氏無功於國，豈得與陰郭中興之后等邪？常觀富貴之家，祿位重疊，猶再實之本，其根必傷，且人所以願封侯者，欲上奉祭祀，下求溫飽耳。今祭祀則受太官之賜，衣食則蒙御府餘資，斯豈不可足而必當得一縣乎？吾計之孰矣，勿有疑也。夫至孝之行，安親爲上，今數遭變異，穀價數倍，憂惶晝夜，不安坐臥，而欲先營外家之封，違慈母之拳拳乎？吾素剛急，有匈中氣，不可不順也。子之未冠，由於父母，已冠成人，則行子之志，念帝人君也，吾以未踰三年之故，自吾家族，故得專之。若陰陽調和，邊境清靜，然後行子之志，吾但當含飴弄孫，不能復關政矣。上乃止。太后嘗詔三輔諸馬昏親，有屬託郡縣干亂吏治者，以法聞。太夫人葬，起墳微高，太后以爲言，兄衛尉廖等，即時減削，其外親有謙素義行者，輒假借溫言，賞以財位，如有纖介，則先見嚴恪之色，然後加譴，其美車服，不遵法度者，便絕屬籍，遣歸田里。廣平、鉅鹿、樂成王，車騎朴素，無金銀之飾，帝以白太后，即賜錢各五百萬，於是內外從化，被服如一。諸家惶恐，倍於永平時。置織室，蠶於濯龍中，數往觀視，以爲娛樂。常與帝旦夕，言道政事，及教授小王，論語經書，述敘平生，雍和終日。馬廖慮美業難終，上疏勸成德政，曰：昔元帝罷服官，成帝御浣衣，哀帝去樂府，然而侈費不息，至於衰亂者，百姓從行不從言也。夫改政移風，必有其本，傳曰：吳王好劍客，百姓多創瘢，楚王好細腰，宮中多餓死。長安語曰：城中好高結，四方高一尺，城中好廣肩，四方且半額，城中好大袖，四方全匹帛。斯言如戲，有切事實，前下制度，未幾，後稍不行，雖或更不奉法，良由慢起京師，今陛下素簡所安，發自聖性，誠令斯事一竟，則四海誦德，聲薰天地，神明可通，況於行令乎？太后深納之。○初安夷縣吏略妻卑滿種羌人婦，吏爲其夫

所殺，安夷長宗延追之出塞，種人恐見誅，遂共殺延，而與勒姐吾良二種相結爲寇，於是燒當羌豪滇吾之子迷吾，率諸種俱反，敗金城太守郝崇，詔以武威太守北地傅育爲護羌校尉，自安夷徙居臨羌，迷吾又與封養種豪布橋等五萬餘人共寇隴西。漢陽秋八月，遣行車騎將軍馬防、長水校尉耿恭將北軍五校兵，及諸軍射士三萬人擊之。第五倫上疏曰：臣愚以爲貴戚可封侯，以富之，不當任以職事，何者？繩以法則傷恩，私以親則違憲，伏聞馬防今當西征，臣以太后恩仁，陛下至孝，恐卒有纖介難爲意愛，帝不從。馬防等軍到冀，布橋等圍南部都尉於臨洮，防進擊破之，斬首虜四千餘人，遂解臨洮圍，其衆皆降。唯布橋等二萬餘人屯望曲谷，不下。○十二月戊寅，有星孛于紫宮。○帝納寶動女爲貴人，有寵，貴人母，即東海恭王女，此陽公主也。○第五倫上疏曰：光武承王莽之餘，頗以嚴猛爲政，後代因之，遂成風化，郡國所舉，類多辦職，俗吏殊未有寬博之選，以應上求者也。陳留令劉豫，冠軍令駟協，竝以刻薄之姿，務爲嚴苦，吏民愁怨，莫不疾之，而今之議者，反以爲能，違天心，失經義，非徒應坐豫協亦宜譴舉者，務進仁賢，以任時政，不過數人，則風俗自化矣。臣嘗讀書，記知秦以酷急亡國，又目下王莽亦以苛法自滅，故勤勤懇懇，實在於此。又聞諸王主貴戚驕奢踰制，京師尚然，何以示遠？故曰：其身不正，雖令不行，以身教者從，以言教者訟。上善之，倫雖天性峭直，然常疾俗吏苛刻，論議每依寬厚云。三年春正月己酉，宗祀明堂，登靈臺，赦天下。○馬防擊布橋，大破之，布橋將種人萬餘降，詔徵防還，留耿恭擊諸未服者，斬首虜千餘人，勒姐燒何等十三種，數萬人皆詣恭降。恭嘗以言事忤馬防，監營謁者承旨，奏恭不憂軍事，坐徵下獄，免官。○三月癸巳，立貴人寶氏爲皇后。○初顯宗之世，治庖沱石臼河，從都慮至羊腸倉，欲令通漕太原，吏民苦役，連年無成，死者不可勝算，帝以郎中鄧訓爲謁者，監領其事，訓考量隱括，知其難成，具以上言。夏四月己

已詔罷其役。更用驢犂，歲省費億萬計。全活徒士數千人。訓禹之子也。○閏月，西域假司馬班超率疏勒、康居、于窰、拘彌兵一萬人攻姑墨石城，破之，斬首七百級。○冬十二月，丁酉，以馬防爲車騎將軍。○武陵淩中蠻反。○是歲，有司奏遣廣平王羨、鉅鹿王恭、樂成王黨俱就國。上性篤愛，不忍與諸王乖離，遂皆留京師。

四年春二月庚寅，太尉牟融薨。○夏四月戊子，立皇子慶爲太子。○己丑，徙鉅鹿王恭爲江陵王，汝南王暢爲梁王，常山王昞爲淮陽王。○辛卯，封皇子伉爲千乘王，全爲平春王。○有司連據舊典，請封諸舅。帝以天下豐稔，方垂無事，癸卯遂封衛尉廖爲順陽侯，車騎將軍防爲潁陽侯，執金吾光爲許侯。太后聞之曰：「吾少壯時，但慕竹帛，志不顧命。今雖已老，猶戒之在得。故日夜惕厲，思自降損，冀乘此道，不負先帝。所以化導兄弟，共同斯志，欲令瞑目之日，無所復恨。何意老志復不從哉！萬年之日，長恨矣！」廖等竝辭讓，願就關內侯。帝不許。廖等不得已，受封爵。而上書辭位。帝許之。五月丙辰，防、廖光皆以特進就第。○甲戌，以司徒鮑昱爲太尉，南陽太守桓虞爲司徒。○六月癸丑，皇太后馬氏崩。帝既爲太后所養，專以馬氏爲外家，故賈貴人不登極位。賈氏親族無受寵榮者。及太后崩，但加貴人王赤綬，安車一駟，永巷宮人二百，御府雜帛二萬匹，大司農黃金千斤，錢二十萬而已。○秋七月壬戌，葬明德皇后。○校書郎楊終建言：「宣帝博徵羣儒，論定五經於石渠閣，方今天下少事，學者得成其業，而章句之徒破壞大體，宜如石渠故事，永爲後世則。」帝從之。冬十一月壬戌，詔太常將大夫、博士郎官及諸儒會白虎觀，議五經同異，使五官中郎將魏應、承制問侍中淳于恭奏。帝親稱制臨決。作白虎議奏，名儒丁鴻、樓望、成封、桓郁、班固、賈逵及廣平王羨皆與焉。固超之兄也。五年春二月庚辰朔，日有食之。詔舉直言極諫。○荆豫諸郡兵討淩中蠻，破之。○夏五月辛亥，詔曰：「朕思遲直士，側席異聞。其先至者，各已發憤吐瀝，略聞子大夫之志矣。皆欲置於左。」

右顧問省納，建武詔書。又曰：「堯試臣以職，不直以言。語筆札，今外官多曠，竝可以補任。」○戊辰，太傅趙熹薨。○班超欲遂平西域，上疏請兵。曰：「臣竊見先帝欲開西域，故北擊匈奴，西使外國，鄯善、于窰即時向化。今拘彌、莎車、疏勒、月氏、烏孫、康居復願歸附，欲共并力，破滅龜茲，平通漢道。若得龜茲，則西域未服者百分之一耳。前世議者皆曰：「取三十六國，號爲斷匈奴右臂。今西域諸國自日之所入，莫不向化，大小欣欣，貢奉不絕，唯焉耆、龜茲獨未服從。臣前與官屬三十六人奉使絕域，備遭艱厄，自孤守疏勒，於今五載，胡夷情數，臣頗識之。問其城郭，小大皆言倚漢與依天等，以是效之。則蔥嶺可通，龜茲可伐。今宜拜龜茲侍子白霸爲其國王，以步騎數百送之。與諸國連兵，歲月之間，龜茲可禽。以夷狄攻夷狄，計之善者也。臣見莎車、疏勒田地肥廣，草牧饒衍，不比敦煌、鄯善間也。兵可不費中國，而糧食自足。且姑墨、溫宿二王特爲龜茲所置，既非其種，更相厭苦，其執必有降者。若二國來降，則龜茲自破。願陛下舉萬年之觴，薦勳祖廟，布大喜於天下。書奏，帝知其功可成，議欲給兵。平陵徐幹上疏，願奮身佐超，帝以幹爲假司馬，將弛刑及義從千人。就超先是莎車以爲漢兵不出，遂降於龜茲。而疏勒都尉番辰亦叛，會徐幹適至，超遂與幹擊番辰，大破之，斬首千餘級。欲進攻龜茲，以烏孫兵彊，宜因其力，乃上言。烏孫大國，控弦十萬，故武帝妻以公主。至孝宣帝卒，得其用，今可遣使招慰，與共合力。帝納之。」

六年春二月辛卯，琅邪孝王京薨。○夏六月丙辰，太尉鮑昱薨。○辛未晦，日有食之。○秋七月癸巳，以大司農鄧彪爲太尉。○武都太守廉范遷蜀郡太守，成都民物豐盛，邑宇逼側，舊制禁民夜作，以防火災，而更相隱蔽，燒者日屬。范乃毀削先令，但嚴使儲水而已。百姓以爲便，歌之曰：「廉叔度，來何暮，不禁火，民安作，昔無襦，今五袴。」○帝以沛王等將入朝，遣謁者賜

貂裘及太官食物珍果。又使大鴻臚竇固持節郊迎。帝親自循行邸第，豫設帷牀，其錢帛器物無不充備。

七年春正月，沛王輔、濟南王康、東平王蒼、中山王焉、東海王政、琅邪王宇來朝。詔沛、濟南、東平、中山王贊拜不名，升殿乃拜。上親答之，所以寵光榮顯，加於前古。每入宮，輒以輦迎。至省閣，乃下。上爲之興席改容。皇后親拜於內，皆鞠躬辭謝，不自安。三月，大鴻臚奏遣諸王歸國。帝特留東平王蒼於京師。○初，明德太后爲帝納扶風宋楊二女爲貴人。大貴人生太子慶，梁松弟竦有二女亦爲貴人。小貴人生皇子肇，竇皇后無子，養肇爲子。宋貴人有寵於馬太后，太后崩，竇皇后寵盛，與母沁陽公主謀陷宋氏。外令兄弟求其纖過，內使御者偵伺得失。宋貴人病，思生兔，令家求之，因誣言欲爲厭勝之術。由是太子出居承祿觀。夏六月甲寅，詔曰：皇太子有失，惑無常之性，不可以奉宗廟，大義滅親，況降退乎？今廢慶爲清河王，皇子肇保育皇后，承訓懷妊，今以肇爲皇太子，遂出宋貴人姊妹，置丙舍，使小黃門蔡倫案之。二貴人皆飲藥自殺。父議郎楊免歸本郡。慶時雖幼，亦知避嫌畏禍，言不敢及宋氏。帝更憐之，敕皇后令衣服與太子齊等。太子亦親愛慶，入則共室，出則同輿。○己未，徙廣平王羨爲西平王。○秋八月，飲酎畢，有司復奏遣東平王蒼歸國。帝乃許之，手詔賜蒼曰：骨肉天性，誠不以遠近爲親疎，然數見顏色，情重昔時。念王久勞，思得還休，欲署大鴻臚，奏不忍下筆。願授小黃門，中心戀戀，惻然不能言。於是車駕祖送，流涕而訣。復賜乘輿服御珍寶，與馬錢布以億萬計。○九月甲戌，帝幸偃師，東涉卷津，至河內，下詔曰：車駕行秋稼，觀收穫，因涉郡界，皆精騎輕行，無他輜重，不得輒修道橋，遠離城郭，遣吏逢迎，刺探起居出入前後，以爲煩擾，動務省約，但患不能脫粟瓢飲耳。己酉，進幸鄴。辛卯，還宮。○冬十月癸丑，帝行幸長安，封蕭何末孫熊爲鄼侯，進幸槐里、岐山。又幸長平，御池陽宮，東至高陵。十二月丁亥，還宮。○東平獻王

蒼疾病，馳遣名醫小黃門侍疾，使者冠蓋不絕於道。又置驛馬千里，傳問起居。

八年春正月壬辰，王薨，詔告中傅封上王自建武以來章奏，並集覽焉。遣大鴻臚持節監喪，令四姓小侯諸國王主悉會葬。○夏六月，北匈奴三木樓訾大人稽留斯等率三萬餘人，款五原塞降。冬十二月甲午，上行幸陳留，梁國、淮陽、潁陽、戍申，還宮。○太子肇之立也，梁氏私相慶，諸竇聞而惡之。皇后欲專名外家，忌梁貴人姊妹數譖之於帝，漸致疎嫌。是歲，竇氏作飛書陷梁竦以惡逆，竦遂死獄中。家屬徙九真，貴人姊妹以憂死。辭語連及梁松妻舞陰公主，坐徙新城。○順陽侯馬廖，謹篤自守，而性寬緩，不能教勸子弟，皆驕奢不謹。校書郎楊終與廖書戒之曰：君位地尊重，海內所望。黃門郎年幼，血氣方盛，既無長君退讓之風，而要結輕狡，無行之客，縱而無誨，視成任性，覽念前往，可爲寒心。廖不能從，防光兄弟資產巨億，大起第觀，彌互街路，食客常數百人，防又多牧馬畜賦斂羌胡，帝不喜之，數加譴敕，所以禁遏甚備。由是權勢稍損，賓客亦衰。廖子豫爲步兵校尉，投書怨誹，於是有司并奏防光兄弟奢侈踰僭，濁亂聖化，悉免就國。臨上路，詔曰：舅氏一門，俱就國封，四時陵廟無助祭，先后者朕甚傷之。其令許侯思譽、田廬有司勿復請，以慰朕渭陽之情。光比防，稍爲謹密，故帝特留之。後復位特進，豫隨廖歸國，考擊物故，後復有詔還廖京師，諸馬既得罪，竇氏益貴盛。皇后兄憲爲侍中，虎賁中郎將弟篤爲黃門侍郎，竝侍宮省，賞賜累積，喜交通賓客，司空第五倫上疏曰：臣伏見虎賁中郎將竇憲、椒房之親，典司禁兵，出入省闈，年盛志美，卑讓樂善，此誠其好士交結之方。然諸出入貴戚者，類多瑕釁，禁錮之人，尤少守約安貧之節。士大夫無志之徒，更相販賣，雲集其門，蓋驕佚所從生也。三輔論議者，至云以貴戚廢錮，當復以貴戚浣濯之，猶解醒當以酒也。誠險趣執之徒，誠不可親近。臣愚願陛下中宮嚴敕憲等，閉門自守，無妄交通士大夫，防其未萌，慮於無形，令憲永保福祿。君臣交歡，無纖介之隙，此臣之所至願。

也。憲恃宮掖聲勢，自王主及陰馬諸家，莫不畏憚。憲以賤直，請奪沁水公主園田。主逼畏，不敢計。後帝出過園，指以問憲。憲陰喝，不得對。後發覺，帝大怒，召憲切責曰：「深思前過，奪主田園時，何用愈趙高，指鹿爲馬？久念，使人驚怖。昔永平中，常令陰黨陰博鄧疊三人更相糾察，故諸豪戚莫敢犯法者。今貴主尚見枉奪，何況小民哉？國家棄憲如孤雛腐鼠耳。憲大懼，皇后爲毀服深謝，良久乃得解。使以田還主，雖不繩其罪，然亦不授以重任。」

臣光曰：人臣之罪莫大於欺罔，是以明君疾之。孝章謂竇憲何異指鹿爲馬，善矣。然卒不能罪憲，則竇臣安所懲哉？夫人主之於臣下，患在不知其姦，苟或知之而復赦之，則不若不知之爲愈也。何以言之？彼或爲姦而上不之知，猶有所畏，既知而不能討，彼知其不足畏也，則放縱而無所顧矣。是故知善而不能用，知惡而不能去，人主之深戒也。

下邳周紆爲雒陽令，下車先問大姓主名吏數，閭里豪強以對。數紆厲聲怒曰：「本問貴戚若馬寶等輩，豈能知此賣菜傭乎？於是部吏望風旨，爭以激切爲事。貴戚踟躕京師，肅清竇黨，夜至止姦亭，亭長霍延拔劍擬篤，肆詈恣口，篤以表聞。詔召司隸校尉河南尹詣尙書，譴問遣劍戟士收紆，送廷尉詔獄。數日貫出之。○帝拜班超爲將兵長史，以徐幹爲軍司馬，別遣衛侯李邑護送烏孫使者。邑到于賓，值龜茲攻疏勒，恐懼不敢前，因上書陳西域之功不可成。又盛毀超，擁愛妻，抱愛子，安樂外國，無內顧心。超聞之，歎曰：「身非曾參，而有三至之讒，恐見疑於當時矣。遂去其妻，帝知超忠，乃切責邑曰：「縱超擁愛妻，抱愛子，思歸之士千餘人，何能盡與超同心乎？令邑詣超受節度。詔若邑任在外者，便留與從事。超即遣邑將烏孫侍子，還京師。徐幹謂超曰：「邑前親毀君，欲敗西域，今何不緣詔書留之，更遣他吏送侍子乎？超曰：「是何言之陋也。以邑毀超，故今遣之。內省不疚，何卹人言！快意留之，非忠臣也。○帝以侍中會稽鄭弘爲大司農，舊交趾七郡貢獻轉運，皆從東治汎海而至，風波艱阻，沈溺相係，弘奏：

開零陵桂陽嶠道，自是夷通，遂爲常路。在職二年，所省息以億萬計。遭天下旱，邊方有警，民食不足，而帑藏殷積，弘又奏，宜省貢獻，減徭費，以利飢民。帝從之。

元和元年春閏正月辛丑濟陰悼王長薨。○夏四月己卯分東平國封獻王子尙爲任城王。○六月辛酉沛獻王輔薨。○陳事者多言，郡國貢舉率非功次，故守職益懈，而吏事寢疏。咎在州郡，有詔下公卿朝臣議。大鴻臚韋彪上議曰：「夫國以簡賢爲務，賢以孝行爲首。是以求忠臣必於孝子之門，夫人才行少能相兼，是以孟公綽優於趙魏，老不可以爲滕，薛大夫忠孝之人，持心近厚，鍛鍊之吏，持心近薄。士宜以才行爲先，不可純以閎闊，然其要歸在於選二千石，二千石賢則貢舉皆得其人矣。彪又上疏曰：「天下樞要在於尙書，尙書之選，豈可不重，而間者多從郎官超升此位，雖曉習文法，長於應對，然察察小慧，類無大能，宜鑒嗇夫捷急之對，深思絳侯木訥之功也。帝皆納之。彪賢之玄孫也。○秋七月丁未，詔曰：「律云：掠者，唯得榜笞立，又令丙篋長短有數，自往者大獄以來，掠考多酷，鈇鑽之屬，慘苦無極，念其痛毒，怵然動心，宜及秋冬治獄，明爲其禁。○八月甲子，太尉鄧彪罷，以大司農鄭弘爲太尉。○癸酉，詔改元，丁酉車駕南巡，詔所經道上郡縣，毋得設儲峙，命司空自將徒，支柱橋梁，有遣使奉迎，探知起居，二千石當坐。○九月辛丑，幸章陵。十月己未，進幸江陵，還幸宛，召前臨淮太守宛人朱暉，拜尙書僕射。暉在臨淮，有善政，民歌之曰：「疆直自遂，南陽朱季，吏畏其威，民懷其惠，時坐法免家居，故上召而用之。十一月己丑，車駕還宮，尙書張林上言：「縣官經用不足，宜自煮鹽，及復修武帝均輸之法。朱暉固執，以爲不可。曰：「均輸之法，與賈販無異，鹽利歸官，則下民窮怨，誠非明主所宜行。帝因發怒，切責尙書。暉等皆自繫獄。三日，詔赦出之。曰：「國家樂聞駁義，黃髮無愆，詔書過耳，何故自繫？暉因稱病篤，不肯復署議。尙書令以下惶怖，謂暉曰：「今臨得譴讓，奈何稱病？其禍不細。暉曰：「行年八十，蒙恩得在機密，當以死報。若心知不

可而順旨。雷同負臣子之義。今耳目無所聞見。伏待死命。遂閉口不復言。諸尚書不知所爲。乃共劾奏。暉帝意解。寢其事。後數日。詔使直事郎中暉起居。太醫視疾。太官賜食。暉乃起謝。復賜錢十萬。布百匹。衣十領。○魯國孔僖。涿郡崔駰。同遊太學。相與論孝武皇帝。始爲天子。崇信聖道。五六年間。號勝文景。及後恣己。忘其前善。鄰房生梁郁。上書告駰僖。誹謗先帝。刺譏當世。事下有司。駰詣吏受訊。僖以書自訟曰。凡言誹謗者。謂實無此事。而虛加誣之也。至如孝武皇帝。政之美惡。顯在漢史。坦如日月。是爲直說。書傳實事。非虛謗也。夫帝者爲善爲惡。天下莫不知。斯皆有以致之。故不可以誅於人也。且陛下卽位以來。政教未過。而德澤有加。天下所具也。臣等獨何譏刺哉。假使所非實是。則固應悔改。儻其不當。亦宜含容。又何罪焉。陛下不推原大數。深自爲計。徒肆私忌。以快其意。臣等受戮。死卽死耳。願天下之人。必回視。易慮。以此事闕。陛下心。自今以後。苟見不可之事。終莫復言者矣。齊桓公親揚其先君之惡。以唱管仲。然後羣臣得盡其心。今陛下乃欲爲十世之武帝。遠諱實事。豈不與桓公異哉。臣恐有司。卒然見構。銜恨蒙枉。不得自叙。使後世論者。擅以陛下有所比方。寧可復使子孫追掩之乎。謹詣闕。伏待重誅。書奏。帝立詔。勿問。拜僖蘭臺令史。○十二月。壬子。詔前以妖惡。禁錮三屬者。一皆蠲除之。但不得在宿衛而已。○廬江毛義。東平鄆均。皆以行義。稱於鄉里。南陽張奉。慕義名。往候之。坐定。而府檄適至。以義守安陽令。義捧檄而入。喜動顏色。奉心賤之。辭去。後義母死。徵辟皆不至。奉乃歎曰。賢者固不可測。往日之喜。乃爲親屈也。均兄爲縣吏。頗受禮遺。均諫不聽。乃脫身爲傭。歲餘得錢。帛歸。以與兄曰。物盡。可復得。爲吏坐臧。終身捐棄。兄感其言。遂爲廉潔。均仕爲尚書。免歸。帝下詔。褒寵義均。賜穀各千斛。常以八月。長吏問起居。加賜羊酒。○武威太守孟雲。上言。北匈奴復願與吏民合市。詔許之。北匈奴大且渠伊莫訾王等。驅牛馬萬餘頭來。與漢交易。南單于遣輕騎。出上郡。鈔之。大獲而還。○帝復遣

假司馬和恭等。將兵八百人。詣班超。超因發疏勒于賓兵。擊莎車。莎車以賂誘疏勒王忠。忠遂反。從之。西保烏卽城。超乃更立其府丞成大。爲疏勒王。悉發其不反者。以攻忠。使人說康居王。執忠以歸其國。烏卽城遂降。

資治通鑑卷第四十六

漢紀 肅宗孝章皇帝上元和元年

資治通鑑卷四十七

漢紀三十九

肅宗孝章皇帝下

元和二年春正月乙酉詔曰令云民有產子者復勿算三歲今諸懷姙者賜胎養穀人三斛復其夫勿算一歲著以爲令又詔三公曰安靜之吏悃愾無華日計不足月計有餘如襄城令劉方吏民同聲謂之不煩雖未有他異斯亦殆近之矣夫以苛爲察以刻爲明以輕爲德以重爲威四者或興則下有怨心吾詔書數下冠蓋接道而吏不加治民或失職其咎安在勉思舊令稱朕意焉○北匈奴大人車利涿兵等亡來入塞凡七十三輩時北虜衰耗黨衆離畔南部攻其前丁零寇其後鮮卑擊其左西域侵其右不復自立乃遠引而去○南單子長死單于汗之子宜立爲伊屠於閭鞮單于○太初曆施行百餘年曆稍後天上命治曆編訢李梵等綜校其狀作四分曆二月甲寅始施行之○帝之爲太子也受尙書於東郡太守汝南張酺丙辰帝東巡幸東郡引酺及門生并郡縣掾史並會庭中帝先備弟子之儀使酺講尙書一篇然後脩君臣之禮賞賜殊特莫不沾洽行過任城幸鄆均舍賜尙書祿以終其身時人號爲白衣尙書○乙丑帝耕於定陶辛未幸泰山柴告岱宗進幸奉高壬申宗祀五帝于汶上明堂丙子赦天下進幸濟南三月己丑幸魯庚寅祀孔子於闕里及七十二弟子作六代之樂大會孔氏男子二十以上者六十二人帝謂孔僖曰今日之會寧於卿宗有光榮乎對曰臣聞明王聖主莫不尊師貴道今陛下親屈萬乘辱臨敝里此乃崇禮先師增輝

聖德至於光榮非所敢承帝大笑曰非聖者子孫焉有斯言乎拜僖郎中○壬辰帝幸東平追念獻王謂其諸子曰思其人至其鄉其處在其人亡因泣下沾襟遂幸獻王陵祠以太牢親拜祠坐哭泣盡哀獻王之歸國也驃騎府吏丁牧周翹以獻王愛賢下士不忍去之遂爲王家大夫數十年事祖及孫帝聞之皆引見既感其淹滯且欲揚獻王德美即皆擢爲議郎乙未幸東阿北登太行山至天井關夏四月乙卯還宮庚申假于祖禰○五月徙江陵王恭爲六安王○秋七月庚子詔曰春秋重三正慎三微其定律無以十一月十二月報囚止用冬初十月而已○冬南單于遣兵與北虜溫禺犢王戰於涿邪山斬獲而還武威太守孟雲上言北虜以前旣和親而南部復往抄掠北單于謂漢欺之謀欲犯塞謂宜還南所掠生口以慰安其意詔百官議於朝堂太尉鄭弘司空第五倫以爲不可許司徒桓虞及太僕袁安以爲當與之弘因大言激厲虞曰諸言當還生口者皆爲不忠虞廷叱之倫及大鴻臚韋彪皆作色變容司隸校尉舉奏弘等皆上印綬謝詔報曰久議沈滯各有所志蓋事以議從策由衆定聞閭衍得禮之容寢嘿抑心更非朝廷之福君何尤而深謝其各冠履帝乃下詔曰江海所以長百川者以其下之也少加屈下尙何足病況今與匈奴君臣分定辭順約明貢獻累至豈宜違信自受其曲其敕度遼及領中郎將龐奮倍雇南部所得生口以還北虜其南部斬首獲生計功受賞如常科

三年春正月丙申帝北巡辛丑耕于懷二月乙丑敕待御史司空曰方春所過無得有所伐殺車可以引避引避之駢馬可輟解輟解之戊辰進幸中山出長城癸酉還幸元氏三月己卯進幸趙辛卯還宮○太尉鄭弘數陳侍中竇憲權勢太盛言甚苦切憲疾之會弘奏憲黨尙書張林雒陽令楊光在官貪殘書奏吏與光故舊因以告之光報憲憲奏弘大臣漏泄密事帝詰讓弘夏四月丙寅收弘印綬弘自詣廷尉詔赦出之因乞骸骨歸未許病篤上書陳

謝曰：竇憲姦惡貫天，達地海內，疑惑賢愚，疾惡謂憲何術，以迷主上，近日王氏之禍，炳然可見。陛下處天子之尊，保萬世之祚，而信讒佞之臣，不計存亡之機，臣雖命在晷刻，死不忘忠，願陛下誅四凶之罪，以厭人鬼，憤結之望。帝省章，遣醫視弘病，比至已薨。○以大司農宋由爲太尉。○司空第五倫以老病乞身。五月丙子，賜策罷，以二千石俸，終其身。倫奉公盡節，言事無所依違，性質懇少文采，在位以貞白稱，或問倫曰：公有私乎？對曰：昔人有與吾千里馬者，吾雖不受，每三公有所選舉，心不能忘，亦終不用也。若是者，豈可謂無私乎？○以太僕袁安爲司空。○秋八月乙丑，帝幸安邑，觀鹽池。九月，還宮。○燒當羌迷吾復與弟號吾及諸種反，號吾先輕入寇隴西界，督烽掾李章追之，生得號吾，將詣郡，號吾曰：獨殺我，無損於羌，誠得生歸，必悉罷兵，不復犯塞。隴西太守張紆放遣之，羌卽爲解散，各歸故地，迷吾退居河北，歸義城。○疏勒王忠從康居王借兵，還據損中，遣使詐降於班超，超知其姦而僞許之，忠從輕騎詣超，超斬之，因擊破其衆，南道遂通。○楚許太后薨，詔改葬楚王英，追爵諡曰楚厲侯。○帝以潁川郭躬爲廷尉，決獄斷刑，多依矜恕，條諸重文，可從輕者四十一，奏之，事皆施行。○博士魯國曹爽上疏，以爲宜定文制，著成漢禮，太常巢堪以爲一世大典，非爽所定，不可許。帝知諸儒拘攣，難與圖始，朝廷禮憲，宜以時立，乃拜爽侍中，玄武司馬，班固以爲宜廣集諸儒，共議得失，帝曰：諺言作舍道邊，三年不成，會禮之家，名爲聚訟，互生疑異，筆不得下，昔堯作大章，一夔足矣。

章和元年春正月，帝召褒，受以叔孫通漢儀十二篇，曰：此制散略，多不合經，今宜依禮條正，使可施行。○護羌校尉傅育欲伐燒當羌，爲其新降，不欲出兵，乃募人鬪諸羌，胡羌不肯，遂復叛出塞，更依迷吾，育請發諸郡兵數萬人，共擊羌，未及會，三月，育獨進軍，迷吾聞之，徙廬落去，育遣精騎三千窮追之，夜至三兜谷，不設備，迷吾襲擊，大破之，殺育及吏士八百八十人，及諸郡兵到，羌遂引去，詔以隴西太守張紆爲校尉，將萬人屯臨羌。○夏六月戊辰，司徒桓虞免，癸卯，以司空袁安爲司徒，光祿勳任隗爲司空，隗光之子也。○齊王晃及弟利侯剛與母太姬更相誣告，秋七月癸卯，詔貶晃爵爲蕪湖侯，削剛戶三千，收太姬璽綬。○壬子，淮陽頃王昞薨。○鮮卑入左地，擊北匈奴，大破之，斬優留單于而還。○羌豪迷吾復與諸種寇金城塞，張紆遣從事河內司馬防與戰於木乘谷，迷吾兵敗走，因譯使欲降，紆納之，迷吾將人衆詣臨羌，紆設兵大會，施毒酒中，伏兵殺其會豪八百餘人，斬迷吾頭，以祭，傅育冢，復放兵擊其餘衆，斬獲數千人，迷吾子迷唐與諸種解仇，結婚交質，據大小榆谷，以叛，種衆熾盛，張紆不能制。○壬戌，詔以瑞物仍集，改元章和，是時京師四方屢有嘉瑞，前後數百千言事者，咸以爲美，而太尉掾平陵何敞獨惡之，謂宋由袁安曰：夫瑞應依德而至，災異緣政而生，今異鳥翔於殿屋，怪草生於庭際，不可不察，由安懼不敢答。○八月癸酉，帝南巡，戊子，幸梁，乙未，晦，幸沛。○日有食之。○九月庚子，帝幸彭城，辛亥，幸壽春，復封阜陵侯延爲阜陵王，己未，幸汝陰，冬十月丙子，還宮。○北匈奴大亂，屈蘭儲等五十八部口二十八萬詣雲中，五原朔方北地降。○曹褒依準舊典，雜以五經讖記之文，撰次天子至於庶人冠婚吉凶終始制度，凡百五十篇，奏之，帝以衆論難一，故但納之，不復令有司平奏。○是歲，班超發于窴諸國兵共二萬五千人，擊莎車，龜茲王發溫宿姑墨尉頭兵合五萬人救之，超召將校及于窴王議曰：今兵少不敵，其計莫若各散去，于窴從是而東，長史亦於此西歸，可須夜鼓聲而發，陰緩所得生口，龜茲王聞之大喜，自以萬騎於西界遮超，溫宿王將八千騎於東界徼于窴，超知二虜已出，密召諸部勒兵，馳赴莎車營，胡大驚亂，奔走，追斬五千餘級，莎車遂降，龜茲等因各退散，自是威震西域。

王每數入朝。特加恩寵。及諸昆弟。竝留京師。不遣就國。又賞賜羣臣。過於制度。倉帑爲虛。何敞奏記宋由曰。比年水旱。民不收穫。涼州緣邊。家被凶害。中州內郡。公私屈竭。此實損膳節用之時。國恩覆載。賞賚過度。但聞臘賜自郎官以上。公卿王侯以下。至於空竭。帑藏損耗。國資尋公家之用。皆百姓之力。明君賜賚。宜有品制。忠臣受賞。亦應有度。是以夏禹玄圭。周公束帛。今明公位尊任重。責深負大。上當匡正綱紀。下當濟安元元。豈但空空無違而已哉。宜先正己。以率羣下。還所得賜。因陳得失。奏王侯就國。除苑囿之禁。節省浮費。賑卹窮孤。則恩澤下暢。黎庶悅豫矣。由不能用。尙書南陽宗意上疏曰。陛下至孝。烝烝恩愛。隆深禮寵。諸王同之家人。車入殿門。卽席不拜。分甘損膳。賞賜優渥。康焉幸以支庶。享食大國。陛下恩寵踰制。禮敬過度。春秋之義。諸父昆弟。無所不臣。所以尊尊卑卑。彊幹弱枝者也。陛下德業隆盛。當爲萬世典法。不宜以私恩損上下之序。失君臣之正。又西平王羨等六王。皆妻子成家。官屬備具。當早就蕃國。爲子孫基址。而室第相望。久磐京邑。驕奢僭擬。寵祿隆過。宜割情不忍。以義斷恩。發遣康焉。各歸蕃國。令羨等速就便時。以塞衆望。帝未及遣。○壬辰。帝崩于章德前殿。年三十一。遺詔無起寢廟。一如先帝法制。

范曄論曰。魏文帝稱明帝。察察。章帝長者。章帝素知人厭。明帝苛切。事從寬厚。奉承明德。太后盡心孝道。平徭簡賦。而民賴其慶。又體之以忠恕。文之以禮樂。謂之長者。不亦宜乎。太子卽位。年十歲。尊皇后曰皇太后。○三月。用遺詔。徙西平王羨爲陳王。六安王恭爲故城王。○癸卯。葬孝章皇帝于敬陵。○南單于宣死。單于長之弟屯屠何立。爲休蘭尸逐侯鞬單于。○太后臨朝。竇憲以待中內幹機密。出宣誥命。弟篤爲虎賁中郎將。篤弟景。瓌竝爲中常侍。兄弟皆在親要之地。憲客崔駰以書戒憲曰。傳曰。生而富者驕。生而貴者傲。生富貴而能不驕傲者。未之有也。今寵祿初隆。百僚觀行。豈可不庶幾夙夜。以永終譽乎。昔馮野王以外

戚居位。稱爲賢臣。近陰衛尉克己復禮。終受多福。外戚所以獲譏於時。垂愆於後者。蓋在滿而不挹。位有餘而仁不足也。漢興以後。迄于哀平。外家二十。保族全身。四人而已。書曰。鑒于有殷。可不慎哉。○庚戌。皇太后詔。以故太尉鄧彪爲太傅。賜爵關內侯。錄尙書事。百官總已。以聽竇憲。以彪有義讓。先帝所敬。而仁厚委隨。故尊崇之。其所施爲。輒外令彪奏。內白太后。事無不從。彪在位。修身而已。不能有所匡正。憲性果急。睚眦之怨。莫不報復。永平時。謁者韓紆考劾憲。父勳獄。憲遂令客斬紆子。以首祭勳冢。○癸亥。陳王羨。彭城王恭。樂成王黨。下邳王衍。梁王暢。始就國。○夏四月。戊寅。以遺詔。罷郡國鹽鐵之禁。縱民煮鑄。○五月。京師旱。○北匈奴饑亂。降南部者。歲數千人。秋七月。南單于上言。宜及北虜分爭。出兵討伐。破北成。南共爲一國。令漢家長無北念。臣等生長漢地。開口仰食。歲時賞賜。動輒億萬。雖垂拱安枕。慙無報效之義。願發國中。及諸郡。故胡新降精兵。分道竝出。期十二月。同會虜地。臣兵衆單少。不足以防內外。願遣執金吾耿秉。度遼將軍鄧鴻。及西河雲中五原朔方上郡大守。并力而北。冀因聖帝威神。一舉平定。臣國成敗。要在今年。已敕諸部。嚴兵馬。唯裁哀省察。太后以示耿秉。秉上言。昔武帝單極天下。欲臣虜匈奴。未遇天時。事遂無成。今幸遭天授。北虜分爭。以夷伐夷。國家之利。宜可聽許。秉因自陳。受恩分當。出命效用。太后議欲從之。尙書宗意。上書曰。夫戎狄。簡賤禮義。無有上下。彊者爲雄。弱者爲雌。自漢興以來。征伐數矣。其所克獲。曾不補害。光武皇帝。躬服金革之難。深昭天地之明。因其來降。羈縻畜養。邊民得生。勞役休息。於茲四十餘年矣。今鮮卑奉順。斬獲萬數。中國坐享大功。而百姓不知其勞。漢興功烈。於斯爲盛。所以然者。夷虜相攻。無損漢兵者也。臣察鮮卑侵伐匈奴。正是利其抄掠。及歸功聖朝。實由貪得重賞。今若聽南虜還都北庭。則不得不禁制鮮卑。鮮卑外失暴掠之願。內無功勞之賞。豺狼貪婪。必爲邊患。今北虜西遁。請求和親。宜因其歸附。以爲外扞。巍巍之業。無以過此。

若引兵費賦以順南虜則坐失上略去安即危矣誠不可許會齊殤王子都鄉侯暢來弔國憂太后數召見之竇憲懼暢分宮省之權遣客刺殺暢於屯衛之中而歸罪於暢弟利侯剛乃使侍御史與青州刺史雜考剛等尚書潁川韓稜以為賊在京師不宜捨近問遠恐為姦臣所笑太后怒以切責稜固執其議何敞說宋由曰暢宗室肺腑茅土藩臣來弔大憂上書須報親在武衛致此殘酷奉憲之吏莫適討捕蹤跡不顯主名不立敞備數股肱職典賊曹欲親至發所以糾其變而二府執事以為三公不與賊盜公縱姦慝莫以為咎敞請獨奏案之由乃許焉二府聞敞行皆遣主者隨之於是推舉具得事實太后怒閉憲於內宮憲懼誅因自求擊匈奴以贖死冬十月乙亥以憲為車騎將軍伐北匈奴以執金吾耿秉為副發北軍五校黎陽雍營緣邊十二郡騎士及羌故兵出塞○公卿舉故張掖太守鄧訓代張紆為護羌校尉迷唐率兵萬騎來至塞下未敢攻訓先欲脅小月氏胡訓擁衛小月氏胡令不得戰議者咸以羌胡相攻縣官之利不宜禁護訓曰張紆失信衆羌大動涼州吏民命縣絲髮原諸胡所以難得意者皆恩信不厚耳今因其迫急以德懷之庶能有用遂令開城及所居園門悉驅羣胡妻子內之嚴兵守衛羌掠無所得又不敢逼諸胡因即解去由是湟中諸胡皆言漢家常欲鬪我曹今鄧使君待我以恩信開門內我妻子乃是得父母也咸歡喜叩頭曰唯使君所命訓遂撫養教諭大小莫不感悅於是賞賂諸羌種使相招誘迷唐叔父號吾將其種人八百戶來降訓因發湟中秦胡羌兵四千人出塞掩擊迷唐於寫谷破之迷唐乃去大小榆居頗巖谷衆悉離散

孝和皇帝上

永元元年春迷唐欲復歸故地鄧訓發湟中六千人令長史任尙將之縫革為船置於草上

以度河掩擊迷唐大破之斬首前後一千八百餘級獲生口二千人馬牛羊三萬餘頭一種殆盡迷唐收其餘衆西徙千餘里諸附落小種皆畔之燒當豪帥東號稽顙歸死餘皆款塞納質於是訓綏接歸附威信大行遂罷屯兵各令歸郡唯置弛刑徒二千餘人分以屯田修理塢壁而已○竇憲將征匈奴三公九卿詣朝堂上書諫以為匈奴不犯邊塞而無故勞師遠涉損費國用微功萬里非社稷之計書連上輒寢宋由懼遂不敢復署議而諸卿稍自引止唯袁安任隗守正不移至免冠朝堂固爭前後且十上衆皆為之危懼安隗正色自若侍御史魯恭上疏曰國家新遭大憂陛下在諒闇百姓闕然三時不聞警蹕之音莫不懷思皇皇若有求而不得今乃以盛春之月興發軍役擾動天下以事戎夷誠非所以垂恩中國改元正時由內及外也萬民者天之所生天愛其所生猶父母愛其子一物有不得其所則天氣為之舛錯況於人乎故愛民者必有天報夫戎狄者四方之異氣與鳥獸無別若雜居中國則錯亂天氣汗辱善人是以聖王之制羈縻不絕而已今匈奴為鮮卑所破遠藏於史侯河西去塞數千里而欲乘其虛耗利其微弱是非義之所出也今始徵發而大司農調度不足上下相迫民間之急亦已甚矣羣僚百姓咸曰不可陛下柰何以一人之計棄萬人之命不卹其言乎上觀天心下察人志足以知事之得失臣恐中國不為中國豈徒匈奴而已哉尙書令韓稜騎都尉朱暉議郎京兆樂恢皆上疏諫太后不聽又詔使者為憲弟篤景竝起邸第勞役百姓侍御史何敞上疏曰臣聞匈奴之為桀逆久矣平城之圍嫂書之恥此二辱者臣子所為捐軀而必死高祖呂后忍怒含忿舍而不誅今匈奴無逆節之罪漢朝無可慙之恥而盛春東作興動大役元元怨恨咸懷不悅又猥為衛尉篤奉車都尉景繕修館第彌街絕里篤親近貴臣當為百僚表儀今衆軍在道朝廷焦唇百姓愁苦縣官無用而遽起大第崇飾玩好非所以垂令德示無窮也宜且罷工匠專憂北邊恤民之困書奏不省竇

憲嘗使門生齎書詣尚書僕射鄧壽有所請託壽即送詔獄前後上書陳憲驕恣引王莽以誠國家又因朝會刺譏憲等以伐匈奴起第宅事厲音正色辭旨甚切憲怒陷壽以買公田誹謗下吏當誅何敞上疏曰壽機密近臣匡救為職若懷默不言其罪當誅今壽違衆正議以安宗廟豈其私邪臣所以觸死誓言非為壽也忠臣盡節以死為歸臣雖不知壽度其甘心安之誠不欲聖朝行誹謗之誅以傷晏晏之化杜塞忠直垂譏無窮臣敞謬與機密言所不宜罪名明白當填牢獄先壽僵仆萬死有餘書奏壽得減死論徙合浦未行自殺壽輝之子也夏六月竇憲耿秉出朔方雞鹿塞南單于出滿夷谷度遼將軍鄧鴻出稠陽塞皆會涿邪山憲分遣副校尉閻盤司馬耿夔耿譚將南匈奴精騎萬餘與北單于戰於稽落山大破之單于遁走追擊諸部遂臨私渠北鞬海斬名王已下萬三千級獲生口甚衆雜畜百餘萬頭諸裨小王率衆降者前後八十一部二十餘萬人憲乘出塞三千餘里登燕然山命中護軍班固刻石勒功紀漢威德而還遣軍司馬吳汜梁諷奉金帛遣北單于時虜中乖亂汜諷及北單于於西海上宣國威信以詔致賜單于稽首拜受諷因說令修呼韓邪故事單于喜悅即將其衆與諷俱還到私渠海聞漢軍已入塞乃遣弟右溫禺鞬王奉貢入侍隨諷詣闕憲以單于不自身到奏還其侍弟○秋七月乙未會稽山崩○九月庚申以竇憲為大將軍中郎將劉尚為車騎將軍封憲武陽侯食邑二萬戶憲固辭封爵詔許之舊大將軍位在三公下至是詔憲位次太傅下三公上長史司馬秩中二千石封耿秉為美陽侯竇氏兄弟驕縱而執金吾景尤甚奴客緹騎強奪人財貨篡取罪人妻略婦女商賈閉塞如避寇讐又擅發緣邊諸郡突騎有才力者有司莫敢舉奏袁安劾景擅發邊兵驚惑吏民二千石不待符信而輒承景檄當伏顯誅又奏司隸校尉河南尹阿附貴戚不舉劾請免官案罪並寢不報駙馬都尉瓊獨好經書節約自修尚書何敞上封事曰昔鄭武姜之幸叔段衛莊公之寵州吁

愛而不教終至凶戾由是觀之愛子若此猶飢而食之以毒適所以害之也伏見大將軍憲始遭大憂公卿比奏欲令典幹國事憲深執謙退固辭盛位懇懇勤勤言之深至天下聞之莫不說喜今踰年未幾入禮未終卒然中改兄弟專朝憲秉三軍之重篤景總宮衛之權而虐用百姓奢侈僭倨誅戮無罪肆心自快今者論議訥訥咸謂叔段州吁復生於漢臣觀公卿懷持兩端不肯極言者以為憲等若有匪懈之志則已受吉甫襄申伯之功如憲等陷於罪辜則自取陳平周勃順呂后之權終不以憲等吉凶為憂也臣敞區區誠欲計策兩安絕其繇繇塞其涓涓上不欲令皇太后損文母之號陛下有誓泉之譏下使憲等得長保其福祐也駙馬都尉瓊比請退身願抑家權可與參謀聽順其意誠宗廟至計竇氏之福時濟南王康尊貴驕甚憲乃白出敞為濟南太傅康有違失敞輒諫爭康雖不能從然素敬重敞無所嫌悟焉○冬十月庚子阜陵質王延薨○是歲郡國九大水

二年春正月丁丑赦天下○二月壬午日有食之○夏五月丙辰封皇弟壽為濟北王開為河間王淑為城陽王紹封故淮陽頃王子側為常山王○竇憲遣副校尉閻冀將二千餘騎掩擊北匈奴之守伊吾者復取其地車師震懼前後王各遣子入侍○月氏求尚公主班超拒還其使由是怨恨遣其副王謝將兵七萬攻超超衆少皆大恐超譬軍士曰月氏兵雖多然數千里踰葱嶺來非有運輸何足憂邪但當收穀堅守彼飢窮自降不過數十日決矣謝遂前攻超不下又鈔掠無所得超度其糧將盡必從龜茲求食乃遣兵數百於東界要之謝果遣騎齎金銀珠玉以賂龜茲超伏兵遮擊盡殺之持其使首以示謝謝大驚即遣使請罪願得生歸超縱遣之月氏由是大震歲奉貢獻○初北海哀王無後肅宗以齊武王首創大業而後嗣廢絕心常愍之遣詔令復齊北海二國丁卯封蕪湖侯無忌為齊王北海敬王庶子威為北海王○六月辛卯中山簡王焉薨焉東海恭王之母弟而竇太后恭王之甥也故

加賻錢一億。大為修冢塋。平夷吏民冢墓。以千數。作者萬餘人。凡徵發。搖動六州十八郡。○詔封竇憲為冠軍侯。篤為郎侯。瓊為夏陽侯。憲獨不受封。○秋七月乙卯。竇憲出屯涼州。以侍中鄧疊行征西將軍事為副。○北單于以漢還其侍弟。九月。復遣使款塞稱臣。欲入朝見。冬十月。竇憲遣班固諷迎之。會南單于復上書求滅北庭。於是遣左谷蠡王師子等將左右部八千騎出雞鹿塞。中郎將耿譚遣從事將護之。襲擊北單于。夜至圍之。北單于被創。僅而得免。獲闕氏及男女五人。斬首八千級。生虜數千口。班固至私渠海而還。是時南部黨衆益盛。領戶三萬四千。勝兵五萬。

三年春正月甲子。帝用曹褒新禮。加元服。擢褒監羽林左騎。○竇憲以北匈奴微弱。欲遂滅之。二月。遣左校尉耿夔。司馬任尙。出居延塞。圍北單于於金微山。大破之。獲其母闕氏。名王已下五千餘級。北單于逃走。不知所在。出塞五千餘里而還。自漢出師。所未嘗至也。封夔為粟邑侯。○竇憲既立大功。威名益盛。以耿夔任尙等為爪牙。鄧疊郭璜為心腹。班固傅毅之徒。典文章。刺史守令。多出其門。賦斂吏民。共為賂遺。司徒袁安。司空任隗。舉奏諸二千石。并所連及。貶秩免官四十餘人。竇氏大恨。但安隗素行高。亦未有以害之。尙書僕射樂恢。刺舉無所回避。憲等疾之。恢上書曰。陛下富於春秋。纂承大業。諸舅不宜幹正王室。以示天下之私。方今之宜。上以義自割。下以謙自引。四舅可長保爵土之榮。皇太后永無慙負宗廟之憂。誠策之上者也。書奏不省。恢稱疾乞骸骨。歸長陵。憲風厲州郡。迫脅恢飲藥死。於是朝臣震懼。望風承旨。無敢違者。袁安以天子幼弱。外戚擅權。每朝會進見。及與公卿言國家事。未嘗不喑鳴流涕。自天子及大臣。皆恃賴之。○冬十月癸未。上行幸長安。詔求蕭曹近親。宜為嗣者。紹其封邑。○詔竇憲與車駕會長安。憲至。尙書以下議欲拜之。伏稱萬歲。尙書韓稜正色曰。夫上交不諂。下交不瀆。禮無人臣稱萬歲之制。議者皆慙而止。尙書左丞王龍私奏記上。

牛酒於憲。稜舉奏。謂論為城旦。○龜茲姑墨溫宿諸國皆降。十一月。復置西域都護。騎都尉戊己校尉官。以班超為都護。徐幹為長史。拜龜茲侍子白霸為龜茲王。遣司馬姚光送之。超與光共脅龜茲廢其王尤利多。而立白霸。使光將尤利多還詣京師。超居龜茲。它乾城。徐幹屯疏勒。惟焉耆危須尉犁。以前沒都護。猶懷二心。其餘悉定。○初北單于既亡。其弟右谷蠡王於除鞬自立為單于。將衆數千人。止蒲類海。遣使款塞。竇憲請遣使立於除鞬。為單于。置中郎將領護。如南單于故事。事下公卿議。宋由等以為可許。袁安任隗奏以為。光武招懷南虜。非謂可永安內地。正以權時之算。可得扞禦北狄故也。今朔漠已定。宜令南單于反其北庭。并領降衆。無緣復更立於除鞬。以增國費。事奏未以時定。安懼憲計遂行。乃獨上封事曰。南單于屯先父舉衆歸德。自蒙恩以來四十餘年。三帝積累。以遣陛下。陛下深宜追述先志成就其業。況屯首創大謀。空盡北虜。輟而弗圖。更立新降。以一朝之計。違三世之規。失信於所養。建立於無功。論語曰。言忠信。行篤敬。雖蠻貊行焉。今若失信於一屯。則百蠻不敢復保誓矣。又烏桓鮮卑。新殺北單于。凡人之情。咸畏仇讐。今立其弟。則二虜懷怨。且漢故事。供給南單于。費直歲一億九十餘萬。西域歲七千四百八十萬。今北庭彌遠。其費過倍。是乃空盡天下。而非建策之要也。詔下其議。安又與憲更相難折。憲險急負執。言辭驕訐。至詆毀安。稱光武誅韓歆。戴涉故事。安終不移。然上竟從憲策。

資治通鑑卷四十七

漢紀 孝和皇帝上永元三年

資治通鑑卷第四十八

漢紀四十

孝和皇帝下

永元四年春正月遣大將軍左校尉耿夔授於除鞬印綬使中郎將任尙持節衛護屯伊吾如南單于故事初廬江周榮辟袁安府安舉奏寶景及爭立北單于事皆榮所具草寶氏客太尉掾徐龔深惡之脅榮曰子爲袁公腹心之謀排奏寶氏寶氏悍士刺客滿城中謹備之矣榮曰榮江淮孤生得備宰士縱爲寶氏所害誠所甘心因敕妻子若卒遇飛禍無得殯斂冀以區區腐身覺悟朝廷○三月癸丑司徒袁安薨○閏月丁丑以太常丁鴻爲司徒○夏四月丙辰寶憲還至京師○六月戊戌朔日有食之丁鴻上疏曰昔諸呂擅權統嗣幾移哀平之末廟不血食故雖有周公之親而無其德不得行其執也今大將軍雖欲救身自約不敢僭差然而天下遠近皆惶怖承旨刺史二千石初除謁辭求通待報雖奉符璽受臺敕不敢便去久者至數十日背王室向私門此乃上威損下權盛也人道悖於下效驗見於天雖有隱謀神照其情垂象見戒以告人君禁微則易救末則難人莫不忽於微細以致其大恩不忍誨義不忍割去事之微未然而之明鏡也夫天不可以不剛不剛則三光不明王不可以不彊不彊則宰牧從橫宜因大變改政匡失以塞天意○丙辰郡國十三地震○旱蝗○寶氏父子兄弟竝爲卿校充滿朝廷穰侯鄧疊疊弟步兵校尉磊及母元憲女婚射聲校尉郭舉舉父長樂少府瑛共相交結元舉竝出入禁中舉得幸太后遂共圖爲殺害帝陰知其謀

是時憲兄弟專權帝與內外臣僚莫由親接所與居者闈宦而已帝以朝臣上下莫不附憲獨中常侍鈞盾令鄧衆謹敏有心幾不事豪黨遂與衆定議誅憲以憲在外慮其爲亂忍而未發會憲與鄧疊皆還京師時清河王慶恩遇尤渥常入省宿止帝將發其謀欲得外戚傳懼左右不敢使令慶私從于乘王求夜獨內之又令慶傳語鄧衆求索故事庚申帝幸北宮詔執金吾五校尉勒兵屯衛南北宮閉城門收捕郭瑛郭舉鄧磊鄧磊皆下獄死遣謁者僕射收憲大將軍印綬更封爲冠軍侯與篤景瓊皆就國帝以太后故不欲名誅憲爲選嚴能相督察之憲篤景到國皆迫令自殺初河南尹張酺數以正法繩治寶景及寶氏敗酺上疏曰方憲等寵貴羣臣阿附唯恐不及皆言憲受顧命之託懷伊呂之忠至乃復比鄧夫人於文母今嚴威既行皆言當死不顧其前後考折厥衷臣伏見夏陽侯瓊每存忠善前與臣言常有盡節之心檢救賓客未嘗犯法臣聞王政骨肉之刑有三宥之義過厚不過薄今議者欲爲瓊選嚴能相恐其迫切必不完免宜裁加貸宥以崇厚德帝感其言由是瓊獨得全寶氏宗族賓客以憲爲官者皆免歸故郡初班固奴嘗醉罵洛陽令种兢兢因逮考寶氏賓客收捕固死獄中固嘗著漢書尙未就詔固女弟曹壽妻昭踵而成之華嶠論曰固之序事不激詭不抑抗瞻而不穢詳而有體使讀之者疊疊而不厭信哉其能成名也固譏司馬遷是非頗謬於聖人然其論議常排死節否正直而不敘殺身成仁之爲美則輕仁義賤守節甚矣

初寶憲納妻天下郡國皆有禮慶漢中郡亦當遣吏戶曹李郃諫曰寶將軍椒房之親不修德禮而專權驕恣危亡之禍可翹足而待願明府一心王室勿與交通太守固遣之郃不能止請求自行許之郃遂所在遲留以觀其變行至扶風而憲就國凡交通者皆坐免官漢中太守獨不與焉帝賜清河王慶奴婢與馬錢帛珍寶充物其第慶或時不安帝朝夕問訊進

膳藥所以垂意甚備慶亦小心恭孝自以廢黜尤畏事慎法故能保其寵祿焉○帝除袁安子賞為郎任隗子屯為步兵校尉鄭衆遷大長秋帝策勳班賞衆每辭多受少帝由是賢之常與之議論政事宦官用權自此始矣○秋七月己丑太尉宋由以竇氏黨策免自殺○八月辛亥司空任隗薨○癸丑以大司農尹睦為太尉太傅鄧彪以老病上還樞機職詔許焉以睦代彪錄尚書事○冬十月以宗正劉方為司空○武陵零陵中蠻叛○護羌校尉鄧訓卒吏民羌胡旦夕臨者日數千人羌胡或以刀自割又刺殺其犬馬牛羊曰鄧使君已死此為義也乃釋之遂家家為訓立祠每有疾病輒請禱求福蜀郡太守聶尚代訓為護羌校尉欲以恩懷諸羌乃遣譯使招呼迷唐使還居大小榆谷迷唐既還遣祖母卑詣尚尚自送至塞下為設祖道令譯田汜等五人護送至廬落迷唐遂反與諸種共生屠裂汜等以血盟詛復寇金城塞尚坐免

五年春正月乙亥宗祀明堂登靈臺赦天下○戊子千乘貞王伉薨○辛卯封皇弟萬歲為廣宗王○甲寅太傅鄧彪薨○戊午隴西地震○夏四月壬子紹封阜陵王兄魴為阜陵王○九月辛酉廣宗薨王萬歲薨無子國除○初竇憲既立於除鞬為北單于欲輔歸北庭會憲誅而止於除鞬自畔還北詔遣將兵長史王輔以千餘騎與任尙共追討斬之破滅其衆○耿夔之破北匈奴也鮮卑因此轉徙據其地匈奴餘種留者尙有十餘萬落皆自號鮮卑鮮卑由此漸盛○冬十月辛未太尉尹睦薨○十一月乙丑太僕張酺為太尉酺尙書張敏等奏射聲校尉曹襄擅制漢禮破亂聖術宜加刑誅書凡五奏帝知酺守學不通雖寢其奏而漢禮遂不行○是歲武陵郡兵破叛蠻降之○梁王暢與從官卜忌祠祭求福忌等諂媚云神言王當為天子暢與相應答為有司所奏請徵詣詔獄帝不許但削成武單父二縣

暢慙懼上疏深自刻責曰臣天性狂愚不知防禁自陷死罪分伏顯誅陛下聖德枉法曲平橫赦貸臣為臣受汗臣知大貸不可再得自誓束身約妻子不敢復出入失繩墨不敢復有所橫費租入有餘乞裁食隄陽穀熟虞蒙寧陵五縣還餘所食四縣臣暢小妻三十七人其無子者願還本家自選擇謹救奴婢二百人其餘所受虎賁官騎及諸工技鼓吹倉頭奴婢兵弩廐馬皆上還本署臣暢以骨肉近親亂聖化汗清流既得生活誠無心面目以凶惡復居大宮食大國張官屬藏什物願陛下加恩開許上優詔不聽○護羌校尉貫友遣譯使構離諸羌誘以財貨由是解散乃遣兵出塞攻迷唐於大小榆谷獲首虜八百餘人收麥數萬斛遂夾逢留大河築城塢作大航造河橋欲度兵擊迷唐迷唐率部落遠徙依賜支河曲○單于屯屠何死單于宜弟安國立安國初為左賢王無稱譽及為單于適之子左谷蠡王師子以次轉為左賢王師子素勇黠多知前單于宜及屯屠何皆愛其氣決數遣將兵出塞掩擊北庭還受賞賜天子亦加殊異由是國中盡敬師子而不附安國安國欲殺之諸新降胡初在塞外數為師子所驅掠多怨之安國委計降者與同謀議師子覺其謀乃別居五原界每龍庭會議師子輒稱病不往度遼將軍皇甫稜知之亦擁護不遣單于懷憤益甚六年春正月皇甫稜免以執金吾朱徽行度遼將軍時單于與中郎將杜崇不相平乃上書告崇崇諷西河太守令斷單于章單于無由自聞崇因與朱徽上言南單于安國疎遠故胡親近新降欲殺左賢王師子及左臺且渠劉利等又右部降者謀共迫脅安國起兵背畔請西河上郡安定為之備備帝下公卿議皆以為蠻夷反覆雖難測知然大兵聚會必未敢動搖今宜遣有方略使者之單于庭與杜崇朱徽及西河太守并力觀其動靜如無他變可令崇等就安國會其左右大臣責其部衆橫暴為邊害者共平罪誅若不從命令為權時方略事畢之後裁行賞賜亦足以威示百蠻於是徽崇遂發兵造其庭安國夜聞漢軍至大驚棄

帳而去。因舉兵欲誅師子。師子先知，乃悉將廬落入曼柏城。安國追到城下，門閉不得入。朱徽遣吏譬和之。安國不聽。城既不下，乃引兵屯五原。崇徽因發諸郡騎追赴之。急。衆皆大恐。安國舅骨都侯喜爲等慮并被誅，乃格殺安國，立師子爲亭。獨尸逐侯鞬單于。○己卯，司徒丁鴻薨。○二月丁未，以司空劉方爲司徒。太常張奮爲司空。○夏五月，城陽懷王淑薨。無子。國除。○秋七月，京師旱。○西域都護班超發龜茲鄯善等八國兵，合七萬餘人討焉耆。到其城下，誘焉耆王廣、尉犁王汎等於陳陸故城斬之，傳首京師。因縱兵鈔掠，斬首五千餘級，獲生口萬五千人，更立焉耆左侯元孟爲焉耆王，超留焉耆半歲，慰撫之。於是西域五十餘國悉納質內屬。至於海濱，四萬里外皆重譯貢獻。○南單于師子立，降胡五六百人，夜襲師子。安集掾王恬將衛護士與戰破之。於是降胡遂相驚動，十五部二十餘萬人皆反。脅立前單于屯屠何子莫鞬日逐王逢侯爲單于，遂殺略吏民，燔燒郵亭廬帳，將軍重向朔方。欲度幕北。九月癸丑，以光祿勳鄧鴻行車騎將軍事，與越騎校尉馮柱行度遼，將軍朱徽將左右羽林北軍五校士及郡國迹射緣邊兵，烏桓校尉任尙將烏桓鮮卑合四萬人討之。時南單于及中郎將杜崇屯牧師城，逢侯將萬餘騎攻圍之。冬十一月，鄧鴻等至美稷，逢侯乃解圍去。向滿夷谷。南單于遣子將萬騎及杜崇所領四千騎與鄧鴻等追擊逢侯於大城塞，斬首四千餘級。任尙率鮮卑烏桓要擊逢侯於滿夷谷，復大破之。前後凡斬萬七千餘級。逢侯遂率衆出塞，漢兵不能追而還。○以大司農陳寵爲廷尉，寵性仁矜，數議疑獄，每附經典，務從寬恕。刻敝之風於此少衰。○以尙書令江夏黃香爲東郡太守。香辭以典郡從政才非所宜，乞留備冗官，賜以督責小職，任之宮臺煩事。帝乃復留香爲尙書令，增秩二千石，甚見親重。香亦祇勤物務，憂公如家。

七年春正月，鄧鴻等軍還。馮柱將虎牙營留屯五原。鴻坐逗留失利，下獄死。後帝知朱徽、杜

崇失胡和，又禁其上書，以致胡反，皆徵下獄死。○夏四月辛亥朔，日有食之。○秋七月乙巳，易陽地裂。○九月癸卯，京師地震。○樂成王黨坐賊殺人，削東光鄒二縣。

八年春二月，立貴人陰氏爲皇后。識之曾孫也。○夏四月，樂成靖王黨薨。子哀王崇立。尋薨。無子。國除。○五月，河內陳留蝗。○南匈奴右溫禺犢王烏居戰，畔出塞。秋七月，度遼將軍龐參越騎校尉馮柱追擊破之，徙其餘衆及諸降胡二萬餘人於安定北地。車師後部王涿鞬反，擊前王尉畢大獲其妻子。○九月，京師蝗。○冬十月乙丑，北海王威以非敬王子，又坐誹謗自殺。○十二月辛亥，陳敬王羨薨。○丁巳，南宮宣室殿火。○護羌校尉貫友卒，以漢陽太守史充代之。充至，遂發湟中羌胡出塞擊迷唐，迷唐迎敗，充兵殺數百人，充坐徵，以代郡太守吳社代之。

九年春三月庚辰，隴西地震。○癸巳，濟南安王康薨。○西域長史王林擊車師後王斬之。○夏四月丁卯，封樂成王黨子巡爲樂成王。○五月，封皇后父屯騎校尉陰綱爲吳房侯，以特進就第。○六月旱蝗。○秋八月，鮮卑寇肥如。遼東太守祭參坐沮敗，下獄死。○閏月辛巳，皇太后竇氏崩。初，梁貴人既死，宮省事祕，莫有知。帝爲梁氏出者，舞陰公主子梁扈遣從兄禮奏記三府，以爲漢家舊典，崇貴母氏，而梁貴人親育聖躬，不蒙尊號，求得申議。太尉張酺言：「狀帝感慟，良久曰：『於君意若何？』酺請追上尊號，存錄諸舅。帝從之。會貴人姊南陽樊調妻慙上書自訟曰：『妾父竦，冤死牢獄，骸骨不掩。母氏年踰七十，及弟棠等遠在絕域，不知死生，願乞收竦朽骨，使母弟得歸本郡。帝引見慙，乃知貴人枉歿之狀。三公上奏，請依光武黜呂太后故事，貶竇太后尊號，不宜合葬先帝。百官亦多上言者。帝手詔曰：『竇氏雖不遵法度，而太后常自減損，朕奉事十年，深惟大義。禮臣子無貶尊上之文，恩不忍離。義不忍虧。案前世上官太后亦無降黜，其勿復議。』丙申，葬章德皇后。○燒唐羌迷唐，率衆八千人寇隴西，脅塞內

諸種羌合步騎三萬人擊破隴西兵殺大夏長詔遣行征西將軍劉尚越騎校尉趙世副之將漢兵羌胡共三萬人討之尚屯狄道世屯枹罕尚遣司馬寇盱監諸郡兵四面並會迷唐懼棄老弱奔入臨洮南尚等追至高山大破之斬虜千餘人迷唐引去漢兵死傷亦多不能復追乃還○九月庚申司徒劉方策免自殺○甲子追尊梁貴人爲皇太后諡曰恭懷追復喪制冬十月乙酉改葬梁太后及其姊大貴人於西陵擢樊調爲羽林左監追封諡皇太后父竦爲襄親愍侯遣使迎其喪葬於恭懷皇后陵旁徵還竦妻子封子棠爲樂平侯棠弟雍爲乘氏侯雍弟翟爲單父侯位皆特進賞賜以巨萬計寵遇光於當世梁氏自此盛矣○清河王慶始敢求上母宋貴人冢帝許之詔太官四時給祭具慶垂涕曰生雖不獲供養終當奉祭祀私願足矣欲求作祠堂恐有自同恭懷梁后之嫌遂不敢言常泣向左右以爲沒齒之恨後上言外祖母王年老乞詣雒陽療疾於是詔宋氏悉歸京師除慶舅衍俊蓋暹等皆爲郎○十一月癸卯以光祿勳河南呂蓋爲司徒○十二月丙寅司空張奮罷壬申以太僕韓稜爲司空○西域都護定遠侯班超遣掾甘英使大秦條支窮西海皆前世所不至莫不備其風土傳其珍怪焉及安息西界臨大海欲度船人謂英曰海水廣大往來者逢善風三月乃得度若遇遲風亦有二歲者故入海人皆齎三歲糧海中善使人思土戀慕數有死亡者英乃止

十年夏五月京師大水○秋七月己巳司空韓稜薨八月丙子以太常太山巢堪爲司空○冬十月五州雨水○行征西將軍劉尚越騎校尉趙世坐畏懦徵下獄免謁者王信領尚營屯枹罕謁者耿譚領世營屯白石譚乃設購賞諸種頗來內附迷唐恐乃請降信譚遂受降罷兵十二月迷唐等帥種人詣闕貢獻○戊寅梁節王暢薨○初居巢侯劉般薨子愷當嗣稱父遺意讓其弟憲遁逃久之有司奏絕愷國肅宗美其義特優假之愷猶不出積十餘歲

有司復奏之侍中賈逵上書曰孔子稱能以禮讓爲國乎何有有司不原樂善之心而繩以循常之法懼非長克讓之風成含弘之化也帝納之下詔曰王法崇善成人之美其聽憲嗣爵遭事之宜後不得以爲比乃徵愷拜爲郎○南單于師子死單于長之子檀立爲萬氏尸逐鞬單于

十一年夏四月丙寅赦天下○帝因朝會召見諸儒使中大夫魯丕與侍中賈逵尚書令黃香等相難數事帝善丕說罷朝特賜衣冠丕因上疏曰臣聞說經者傳先師之言非從己出不得相讓相讓則道不明若規矩權衡之不可枉也難者必明其據說者務立其義浮華無用之言不陳於前故精思不勞而道術愈章法異者各令自說師法博觀其義無令芻蕘以言得罪幽遠獨有遺失也

十二年夏四月戊辰秭歸山崩○秋七月辛亥朔日有食之○九月戊午太尉張酺免○丙寅以大司農張禹爲太尉○燒當羌豪迷唐既入朝其餘種人不滿二千飢窘不立入居金城帝令迷唐將其種人還大小榆谷迷唐以漢作河橋兵來無常故地不可復居辭以種人飢餓不肯遠出護羌校尉吳祉等多賜迷唐金帛令糴穀市畜促使出塞種人更懷猜驚是歲迷唐復叛脅將湟中諸胡寇鈔而去王信耿譚吳祉皆坐徵

十三年秋八月乙亥北宮盛饌門閣火○迷唐復還賜支河曲將兵向塞護羌校尉周鮪與金城太守侯霸及諸郡兵屬國羌胡合三萬人至允川侯霸擊破迷唐種人瓦解降者六千餘口分徙漢陽安定隴西迷唐遂弱遠踰賜支河首依發羌居久之病死其子來降戶不滿數十○荆州雨水○冬十一月丙辰詔曰幽并涼州戶口率少邊役衆劇束脩良吏進仕路狹撫接夷狄以人爲本其令緣邊郡口十萬以上歲舉孝廉一人不滿十萬二歲舉一人五萬以下三歲舉一人○鮮卑寇右北平遂入漁陽漁陽太守擊破之○戊辰司徒呂蓋以老

病致仕。○巫蠻許聖以郡收稅不均，怨恨遂反。辛卯，寇南郡。十四年春，安定降羌燒何種反，郡兵擊滅之。時西海及大小榆谷左右，無復羌寇，隴廩相曹鳳上言：自建武以來，西羌犯法者，常從燒當種起，所以然者，以其居大小榆谷，土地肥美，有西海魚鹽之利，阻大河以爲固，又近塞諸種，易以爲非，難以攻伐，故能疆大。常雄諸種，恃其拳勇，招誘羌胡，今者衰困，黨援壞沮，亡逃棲竄，遠依發羌，臣愚以爲宜及此時，建復西海郡，縣，規固二榆，廣設屯田，隔塞羌胡交關之路，遏絕狂狡窺欲之源，又殖穀富邊，省委輸之役，國家可以無西方之憂。上從之，繕修故西海郡，徙金城西部都尉以戍之，拜鳳爲金城西部都尉。屯龍耆，後增廣屯田，列屯夾河，合三十四部，其功垂立。會永初中，諸羌叛，乃罷。○三月，戊辰，臨辟雍，饗射，赦天下。○夏四月，遣使者督荊州兵萬餘人，分道討巫蠻許聖等大破之，聖等乞降，悉徙置江夏。○陰皇后多妬忌，寵遇浸衰，數懷恚恨，后外祖母鄧朱出入宮掖，有言后與朱共挾巫蠱道者，帝使中常侍張慎與尚書陳襄案之，劾以大逆無道。朱二子奉、毅，后弟輔，皆考死獄中。六月辛卯，后坐廢，遷于桐宮，以憂死。父特進綱自殺，后弟軼、敞及朱家屬，徙日南比景。○秋七月壬子，常山殤王側薨，無子，立其兄防子侯章爲常山王。○三州大水。○班超久在絕域，年老思土，上書乞歸曰：臣不敢望到酒泉郡，但願生入玉門關，謹遣子勇隨安息獻物入塞，及臣生在，令勇目見中土朝庭，久之未報，超妹曹大家上書曰：蠻夷之性，悖逆侮老，而超且暮入地，久不見代，恐開姦宄之原，生逆亂之心，而卿大夫咸懷一切莫肯遠慮，如有卒暴，超之氣力不能從心，便爲上損國家累世之功，下棄忠臣竭力之用，誠可痛也。故超萬里歸誠，自陳苦急，延頸踰望，三年於今，未蒙省錄，妾竊聞古者十五受兵，六十還之，亦有休息，不任職也，故妾敢觸死爲超求哀，句超餘年，一得生還，復見闕庭，使國家無勞遠之慮，西域無倉卒之憂，超得長蒙文王葬骨之恩，子方哀老之惠，帝感其言，乃徵超還。

八月，超至雒陽，拜爲射聲校尉。九月，卒。超之被徵，以戊己校尉任尙代爲都護，尙謂超曰：君侯在外國三十餘年，而小人猥承君後，任重慮淺，宜有以誨之。超曰：年老失智，君數當大位，豈班超所能及哉！必不得已，願進愚言。塞外吏士，本非孝子順孫，皆以罪過徙補邊屯，而蠻夷懷鳥獸之心，難養易敗。今君性嚴急，水清無大魚，察政不得下和，宜蕩佚簡易，寬小過，總大綱而已。超去，尙私謂所親曰：我以班君當有奇策，今所言平平耳。尙後竟失邊和，如超所言。○初，太傅鄧禹嘗謂人曰：吾將百萬之衆，未嘗妄殺一人。後世必有興者，其子護羌校尉訓有女曰綏，性孝友，好書傳，常畫脩婦業，暮誦經典，家人號曰諸生。叔父陔曰：嘗聞活千人者，子孫有封，兄訓爲謁者，使修石臼河，歲活數千人。天道可信，家必蒙福。綏後選入宮，爲貴人，恭肅小心，動有法度，承事陰后，接撫同列，常克己以下之。雖宮人隸役，皆加恩借，帝深嘉焉。嘗有疾，帝特令其母兄弟入親醫藥，不限以日數。貴人辭曰：宮禁至重，而使外舍人在內省，上令陛下有私幸之譏，下使賤妾獲不知足之謗，上下交損，誠不願也。帝曰：人皆以數入爲榮，貴人反以爲憂邪？每有讌會，諸姬競自脩飾，貴人獨尙質素，其衣有與陰后同色者，卽時解易。若竝時進，則不敢正坐，離立，行則僂身自卑。帝每有所問，常逡巡後對，不敢先言。陰后短小，舉措時失儀，左右掩口而笑。貴人獨愴然不樂，爲之隱諱。若己之失，帝知貴人勞心曲體，歎曰：脩德之勞，乃如是乎！後陰后寵衰，貴人每當御見，輒辭以疾。時帝數失皇子，貴人憂繼嗣不廣，數選進才人，以博帝意。陰后見貴人德稱日盛，深疾之，帝嘗寢病，危甚，陰后密言：我得意，不令鄧氏復有遺類。貴人聞之，流涕言曰：我竭誠盡心，以事皇后，竟不爲所祐，今我當從死。上以報帝之恩，中以解宗族之禍，下不令陰氏有人豕之譏。卽欲飲藥，宮人趙玉者固禁止之，因詐言屬有使來，上疾已愈，貴人乃止。明日，上果瘳，及陰后之廢，貴人請救，不能得。帝欲以貴人爲皇后，貴人愈稱疾篤，深自閉絕。冬十月辛卯，詔立貴人鄧氏爲皇后。

后辭讓不得已。然後即位。郡國貢獻悉令禁絕。歲時但供紙墨而已。帝每欲官爵鄧氏。后輒哀請謙讓。故兄騭終帝世不過虎賁中郎將。○丁酉。司空巢堪罷。○十一月。癸卯。以大司農沛國徐防爲司空。防上疏。以爲漢立博士。十有四家。設甲乙之科。以勉勸學者。伏見太學試博士弟子。皆以意說。不修家法。私相容隱。開生姦路。每有策試。輒興諍訟。論議紛錯。互相是非。孔子稱述而不作。又曰。吾猶及史之闕文。今不依章句。妄生穿鑿。以違師爲非。義說爲得理。輕侮道術。浸以成俗。誠非詔書實選本意。改薄從忠。三代常道。專精務本。儒學所先。臣以爲博士及甲乙策試。宜從其家章句。開五十難以試之。解釋多者爲上第。引文明者爲高說。若不依先師義。有相伐。皆正以爲非。上從之。○是歲。初封大長秋鄭衆爲鄴鄉侯。十五年。夏。四月。甲子。晦。日有食之。時帝遵肅宗故事。兄弟皆留京師。有司以日食陰盛。奏遣諸王就國。詔曰。甲子之異。責由一人。諸王幼穉。早離顧復。弱冠相育。常有蓼莪凱風之哀。選儒之恩。知非國典。且復宿留。○秋。九月。壬午。車駕南巡。清河濟北河間三王竝從。○四州雨水。○冬。十月。戊申。帝幸章陵。戊午。進幸雲夢。時太尉張禹留守。聞車駕當幸江陵。以爲不宜冒險遠遊。驛馬上諫。詔報曰。祠謁既訖。當南禮大江。會得君奏。臨漢回輿而旋。十一月。甲申。還宮。○嶺南舊貢生龍眼荔枝。十里一置。五里一候。晝夜傳送。臨武長汝南唐羌上書曰。臣聞上不以滋味爲德。下不以貢膳爲功。伏見交趾七郡。獻生龍眼等。鳥驚風發。南州土地炎熱。惡蟲猛獸。不絕於路。至於觸犯死亡之害。死者不可復生。來者猶可救也。此二物升殿。未必延年益壽。帝下詔曰。遠國珍羞。本以薦奉宗廟。苟有傷害。豈愛民之本。其敕太官。勿復受獻。○是歲。初令郡國以日北至。按薄刑。

○北匈奴遣使稱臣貢獻。願和親。修呼韓邪故約。帝以其舊禮不備。未許。而厚加賞賜。不答其使。

元興元年。春。高句驪王宮入遼東塞。寇略六縣。○夏。四月。庚午。赦天下。改元。○秋。九月。遼東太守耿夔擊高句驪破之。○冬。十二月。辛未。帝崩于章德前殿。初。帝失皇子。前後十數。後生者。輒隱祕。養於民間。羣臣無知者。及帝崩。鄧皇后乃收皇子於民間。長子勝。有痼疾。少子隆。生始百餘日。迎立以爲皇太子。是夜。卽皇帝位。尊皇后曰皇太后。太后臨朝。是歲。新遭大憂。法禁未設。宮中亡大珠一篋。太后念欲考問。必有不辜。乃親閱宮人。觀察顏色。卽時首服。又和帝幸人吉成。御者共枉吉成。以巫蠱事。下掖庭。考訊。辭證明白。太后以吉成先帝左右。待之有恩。平日尙無惡言。今反若此。不合人情。更自呼見實覈。果御者所爲。莫不歎服。以爲聖明。○北匈奴重遣使。詣敦煌貢獻。辭以國貧。未能備禮。願請大使。當遣子入侍。太后亦不答其使。加賜而已。○雒陽令廣漢王渙。居身平正。能以明察發擿姦伏。外行猛政。內懷慈仁。凡所平斷。人莫不悅服。京師以爲有神。是歲。卒官。百姓市道。莫不咨嗟流涕。渙喪西歸。道經弘農。民庶皆設槃案於路。吏問其故。咸言。平常持米到雒。爲吏卒所鈔。恆亡其半。自王君在事。不見侵枉。故來報恩。雒陽民爲立祠作詩。每祭。輒弦歌而薦之。太后詔曰。夫忠良之吏。國家之所以爲治也。求之甚勤。得之至寡。今以渙子石爲郎中。以勸勞動。

資治通鑑卷第四十八

漢紀 孝和皇帝下永元十五年——元興元年

資治通鑑卷第四十九

漢紀四十一

孝 傷 皇 帝

延平元年春正月辛卯以太尉張禹為太傅司徒徐防為太尉參錄尚書事太后以帝在襁褓欲令重臣居禁內乃詔禹舍宮中五日一歸府每朝見特贊與三公絕席○封皇兄勝為平原王○癸卯以光祿勳梁鮪為司徒○三月甲申葬孝和皇帝于慎陵廟曰穆宗○丙戌清河王慶濟北王壽河間王開常山王章始就國太后特加慶以殊禮慶子祐年十三太后以帝幼弱遠慮不虞留祐與嫡母耿姬居清河邸耿姬況之曾孫也祐母嬖為左姬也○夏四月鮮卑寇漁陽漁陽太守張顯率數百人出塞追之兵馬掾嚴授諫曰前道險阻賊執難量宜且結營先令輕騎偵視之顯意甚銳怒欲斬之遂進兵遇虜伏發士卒悉走唯授力戰身被十創手殺數人而死主簿衛福功曹徐咸皆自投赴顯俱沒於陳○丙寅以虎賁中郎將鄧騭為車騎將軍儀同三司騭弟黃門侍郎惲為虎賁中郎將弘闓皆侍中○司空陳寵薨○五月辛卯赦天下○壬辰河東垣山崩○六月丁未以太常尹勤為司空○郡國三十七雨水○己未太后詔減太官導官尚方內署諸服御珍膳靡麗難成之物自非供陵廟稻粱米不得導擇朝夕一肉飯而已舊太官湯官經用歲且二萬萬自是裁數千萬及郡國所貢皆減其過半悉斥賣上林鷹犬離宮別館儲峙米糶薪炭悉令省之○丁卯詔免遣掖庭宮人及宗室沒入者皆為庶民○秋七月庚寅赦司隸校尉部刺史曰間者郡國或有水災

妨害秋稼朝廷惟咎憂惶悼懼而郡國欲獲豐穰虛飾之譽遂覆蔽災害多張墾田不揣流亡競增戶口掩匿盜賊令姦惡無懲署用非次選舉乖宜貪苛慘毒延及平民刺史垂頭塞耳阿私下比不畏于天不愧于人假貸之恩不可數恃自今以後將糾其罪二千石長吏其各實覈所傷害為除田租芻蕘○八月辛卯帝崩癸丑殯于崇德前殿太后與兄車騎將軍鶩虎賁中郎將惲等定策禁中其夜使鶩持節以王青蓋車迎清河王子祐齋于殿中皇太后御崇德殿百官皆吉服陪位引拜祐為長安侯乃下詔以祐為孝和皇帝嗣又作策命有司讀策畢太尉奉上璽綬即皇帝位太后猶臨朝詔告司隸校尉河南尹南陽太守曰每覽前代外戚賓客濁亂奉公為民患苦答在執法怠懈不輒行其罰故也今車騎將軍鶩等雖懷敬順之志而宗門廣大姻戚不小賓客姦猾多干禁憲其明加檢敕勿相容護自是親屬犯罪無所假貸○九月六州大水○丙寅葬孝傷皇帝于康陵以連遭大憂百姓苦役方中祕藏及諸工作事減約十分居一○乙亥殯石于陳留○詔以北地梁慳為西域副校尉謹行至河西會西域諸國反攻都護任尙於疏勒尙上書求救詔謹將河西四郡羌胡五千騎馳赴之謹未至而尙已得解詔徵尙還以騎都尉段禧為都護西域長史趙博為騎都尉禧博守它乾城城小梁慳以為不可固乃譎說龜茲王白霸欲入共保其城白霸許之吏民固諫白霸不聽謹既入遣將急迎段禧趙博合軍八九千人龜茲吏民竝叛其王而與溫宿姑墨數萬兵反共圍城慳等出戰大破之連兵數月胡衆敗走乘勝追擊凡斬首萬餘級獲生口數千人龜茲乃定○冬十月四州大水雨雹○清河孝王慶病篤上書求葬樊濯宋貴人家旁十二月甲子王薨○乙酉罷魚龍曼延戲○尙書郎南陽樊準以儒風寢衰上疏曰臣聞人君不可以不學光武皇帝受命中興東西誅戰不遑啓處然猶投戈講藝息馬論道孝明皇帝庶政萬機無不簡心而垂情古典游意經藝每饗射禮畢正坐自講諸儒竝聽四方

欣欣又多徵名儒布在廊廟每宴會則論難衍衍共求政化期門羽林介冑之士悉通孝經化自聖躬流及蠻荒是以議者每稱盛時咸言永平今學者益少遠方尤甚博士倚席不講儒者競論浮麗忘蹇蹇之忠習譏議之辭臣愚以爲宜下明詔博求幽隱寵進儒雅以俟聖上講習之期太后深納其言詔公卿中二千石各舉隱士大儒務取高行以勸後進妙簡博士必得其人

孝安皇帝上

永初元年春正月癸酉朔赦天下○蜀郡徵外羌內屬○二月丁卯分清河國封帝弟常保爲廣川王○庚午司徒梁鮪薨○三月癸酉日有食之○己卯永昌徵外僬僿種夷陸類等舉種內附○甲申葬清河孝王於廣丘司空宗正護喪事儀比東海恭王○自和帝之喪鄧騭兄弟常居禁中騭不欲久在內連求還第太后許之夏四月封太傅張禹太尉徐防司空尹勤車騎將軍鄧騭城門校尉鄧悝虎賁中郎將鄧弘黃門郎鄧閭皆爲列侯食邑各萬戶騭以定策功增三千戶騭及諸弟辭讓不獲遂逃避使者問關詣闕上疏自陳至于五六乃許之○五月甲戌以長樂衛尉魯恭爲司徒恭上言舊制立秋乃行薄刑自永元十五年以來改用孟夏而刺史太守因以盛夏徵召農民拘對考驗連滯無已上逆時氣下傷農業案月令孟夏斷薄刑者謂其輕罪已正不欲令久繫故時斷之也臣愚以爲今孟夏之制可從此令其決獄案考皆以立秋爲斷又奏孝章皇帝欲助三正之微定律著令斷獄皆以冬至之前小吏不與國同心者率十一月得死罪賊不問曲直便即格殺雖有疑罪不復讞正可令大辟之科盡冬月乃斷朝廷皆從之○丁丑詔封北海王陸孫壽光侯普爲北海王○九真徼外夜郎蠻夷舉士內屬○西域都護段禧等雖保龜茲而道路隔塞檄書不通公卿議

者以爲西域阻遠數有背叛吏士屯田其費無已六月壬戌罷西域都護遣騎都尉王弘發關中兵迎禧及梁懂趙博伊吾盧柳中屯田吏士而還○初燒當羌豪東號之子麻奴隨父來降居于安定時諸降羌布在郡縣皆爲吏民豪右所徭役積以愁怨及王弘西迎段禧發金城隴西漢陽羌數百千騎與俱郡縣迫促發遣羣羌懼遠屯不還行到酒泉頗有散叛諸郡各發兵邀遮或覆其廬落於是勒姐當煎大豪東岸等愈驚遂同時犇潰麻奴兄弟因此與種人俱西出塞滇零與鍾羌諸種大爲寇掠斷隴道時羌歸附既久無復器甲或持竹竿木枝以代戈矛或負板案以爲楯或執銅鏡以象兵郡縣畏懦不能制丁卯赦除諸羌相連結謀叛逆者罪○秋九月庚午太尉徐防以災異寇賊策免三公以災異免自防始辛未司空尹勤以水雨漂流策免

仲長統昌言曰光武皇帝愷數世之失權忿疆臣之竊命矯枉過直政不任下雖置三公事歸臺閣自此以來三公之職備員而已然政有不治猶加譴責而權移外戚之家寵被近習之豎親其黨類用其私人內充京師外布州郡顛倒賢愚貿易選舉疲駑守境貪殘牧民撓擾百姓忿怒四夷招致乖叛亂離斯瘼怨氣竝作陰陽失和三光虧缺怪異數至蟲螟食稼水旱爲災此皆戚宦之臣所致然也反以策讓三公至于死免乃足爲叫呼蒼天號咷泣血者矣又中世之選三公也務於清懇謹慎循常習故者是乃婦女之檢押鄉曲之常人耳惡足以居斯位邪執既如彼選又如此而欲望三公勳立於國家績加於生民不亦遠乎昔文帝之於鄧通可謂至愛而猶展申徒嘉之志夫見任如此則何患於左右小臣哉至如近世外戚宦豎請託不行意氣不滿立能陷人於不測之禍惡可得彈正者哉曩者任之重而責之輕今者任之輕而責之重光武奪三公之重至今而加甚不假后黨以權數世而不行蓋親疏之執異也今人主誠專委三公分任責成而在位病民舉

用失賢，百姓不安，爭訟不息，天地多變，人物多妖，然後可以分此罪矣。

壬午，詔太僕少府減黃門鼓吹，以補羽林士廐馬，非乘輿常所御者，皆減半食，諸所造作，非供宗廟園陵之用，皆且止。○庚寅，以太傅張禹為太尉，太常周章為司空。○大長秋鄭衆、中常侍蔡倫等皆秉執豫政，周章數進直言，太后不能用，初太后以平原王勝有痼疾，而貪，帝孩抱，養為己子，故立焉。及殤帝崩，羣臣以勝疾非痼，意咸歸之，太后以前不立勝，恐後為怨，乃迎帝而立之。周章以衆心不附，密謀閉宮門，誅鄧騭兄弟及鄭衆、蔡倫，劫尙書，廢太后於南宮，封帝為遠國王，而立平原王。事覺，冬十一月丁亥，章自殺。○戊子，敕司隸校尉冀并二州刺史，民訛言相驚，奔捐舊居，老弱相攜，窮困道路，其各敕所部長吏躬親曉諭，若欲歸本郡，在所為封長檄，不欲勿彊。○十二月乙卯，以潁川太守張敏為司空。○詔車騎將軍鄧騭征西校尉任尙將五營及諸郡兵五萬人屯漢陽以備羌。○是歲郡國十八地震，四十一大水，二十八，大風，雨雹。○鮮卑大人燕荔陽詣闕朝賀，太后賜燕荔陽王印綬，赤車參駕，令止烏桓校尉所居寧城下，通胡市，因築南北兩部質館，鮮卑邑落百二十部各遣入質。二年春正月，鄧騭至漢陽，諸郡兵未至，鍾羌數千人擊敗騭軍于冀西，殺千餘人，梁慄還至燉煌，逆詔，留為諸軍援，僅至張掖，破諸羌萬餘人，其能脫者十二三，進至姑臧，羌大豪三百餘人詣慄降，竝慰譬遣還故地。○御史中丞樊準以郡國連年水旱，民多飢困，上疏請令大官尙方考功，上林池籟諸官實減無事之物，五府調省中都官吏，京師作者又被災之郡，百姓凋殘，恐非賑給所能勝贖，雖有其名，終無其實，可依征和元年故事，遣使持節慰安尤困乏者，徙置荆揚執郡，今雖有西屯之役，宜先東州之急，太后從之，悉以公田賦與貧民，即擢準與議郎呂倉並守光祿大夫。二月乙丑，遣準使冀州，倉使兗州，稟貸流民，咸得蘇息。○夏，旱，五月丙寅，皇太后幸雒陽寺，及若盧獄，錄囚徒，雒陽有囚實不殺人而被考自誣，羸困

輿見，畏吏不敢言，將去，舉頭若欲自訴，太后察視覺之，即呼還問狀，具得枉實，即時收雒陽令下獄抵罪，行未還宮，澍雨大降。○六月，京師及郡國四十大水，大風，雨雹。○秋七月，太白入北斗。○閏月，廣川王常保薨，無子，國除。○癸未，蜀郡徵外羌，舉土內屬。○冬，鄧騭使任尙及從事中郎河內司馬鈞率諸郡兵與滇零等數萬人戰于平襄，尙軍大敗，死者八千餘人，羌衆遂大盛，朝廷不能制，湟中諸縣粟石萬錢，百姓死亡不可勝數，而轉運難劇，故左校令河南龐參先坐法，輸作若盧，使其子俊上書曰：方今西州流民擾動，而徵發不絕，水潦不休，地力不復，重之以大軍，疲之以遠戍，農功消於轉運，資財竭於徵發，田疇不得墾闢，禾稼不得收入，搏手困窮，無望來秋，百姓力屈，不復堪命，臣愚以為萬里運糧，遠就羌戎，不若總兵養衆，以待其疲，車騎將軍騭宜且振旅，留征西校尉任尙使督涼州士民，轉居三輔，休徭役，以助其時，止煩賦，以益其財，令男得耕種，女得織紉，然後畜精銳，乘懈沮，出其不意，攻其不備，則邊民之仇報，犇北之恥雪矣。書奏，會樊準上疏薦參，太后即擢參於徒中，召拜謁者，使西督三輔諸軍屯，十一月辛酉，詔鄧騭還師，留任尙屯漢陽，為諸軍節度，遣使迎拜騭為大將軍，既至，使大鴻臚親迎，中常侍郊勞，王主以下，候望於道，寵靈顯赫，光震都鄙。○滇零自稱天子於北地，招集武都參狼上郡西河諸雜種羌，斷隴道，寇鈔三輔，南入益州，殺漢中太守董炳，梁慄受詔當屯金城，聞羌寇三輔，即引兵赴擊，轉戰武功美陽間，連破走之，羌稍退散。○十二月，廣漢塞外參狼羌降。○是歲郡國十二地震。三年春正月，庚子，皇帝加元服，赦天下。○遣騎都尉任仁督諸郡屯兵，救三輔，仁戰數不利，當煎勒姐羌攻沒破羌縣，鍾羌攻沒臨洮縣，執隴西南部都尉。○三月，京師大飢，民相食，壬辰，公卿詣闕謝，詔務思變復，以助不逮。○壬寅，司徒魯恭罷，恭再在公位，選辟高第，至列卿郡守者數十人，而門下蒼生或不蒙薦舉，至有怨望者，恭聞之曰：學之不講，是吾憂也，諸生

不有鄉舉者乎。終無所言。亦不借之議論。學者受業。必窮核問難。道成。然後謝遣之。學者曰。魯公謝與議論。不可虛得。○夏四月丙寅。以大鴻臚九江夏勤爲司徒。○三公以國用不足。奏令吏民入錢穀。得爲關內侯。虎賁羽林郎。五官大夫。官府吏。緹騎。營士。各有差。○甲申。清河愍王虎威薨。無子。五月丙申。封樂安王寵子延平爲清河王。奉孝王後。○六月。漁陽烏桓與右北平胡千餘寇代郡上谷。○漢人韓琮。隨匈奴南單于入朝。既還。說南單于云。關東水潦。人民飢餓死盡。可擊也。單于信其言。遂反。○秋七月。海賊張伯路等寇濱海九郡。殺二千石令長。遣侍御史巴郡龐雄督州郡兵擊之。伯路等乞降。尋復屯聚。○九月。鴈門烏桓率衆王無何允與鮮卑大人丘倫等及南匈奴骨都合七千騎寇五原。與太守戰于高渠谷。漢兵大敗。○南單于圍中郎將耿种於美稷。冬十月。以大司農陳國何熙行車騎將軍事。中郎將龐雄爲副。將五營及邊郡兵二萬餘人。又詔遼東太守耿夔率鮮卑及諸郡共擊之。以梁懂行度遼將軍事。雄夔擊南匈奴莫鞬日逐王破之。○十二月辛酉。郡國九地震。○乙亥。有星孛于天苑。是歲京師及郡國四十一雨水。并涼二州大飢。人相食。○太后以陰陽不和。軍旅數興。詔歲終饗遣衛士。勿設戲作樂。減逐疫侏子之半。○四年春正月。元會徹樂。不陳充庭車。○鄧騭在位。頗能推進賢士。薦何熙李邵等。列於朝廷。又辟弘農楊震。巴郡陳禪等。置之幕府。天下稱之。震孤貧好學。明歐陽尚書。通達博覽。諸儒爲之語曰。關西孔子。楊伯起。教授二十餘年。不答州郡禮命。衆人謂之晚暮。而震志愈篤。騭聞而辟之。時震年已五十餘。累遷荊州刺史。東萊太守。當之郡。道經昌邑。故所舉荊州茂才王密爲昌邑令。夜懷金十斤。以遺震。震曰。故人知君。君不知故人。何也。密曰。暮夜無知者。震曰。天知地知。我知。子知。何謂無知者。密愧而出。後轉涿郡太守。性公廉。子孫常蔬食步行。故舊或欲令爲開產業。震不肯曰。使後世稱爲清白吏子孫。以此遺之。不亦厚乎。○張伯路復

攻郡縣。殺守令。黨衆浸盛。詔遣御史中丞王宗持節發幽冀諸郡兵。合數萬人。徵宛陵令扶風法雄爲青州刺史。與宗并力討之。○南單于圍耿种數月。梁懂耿夔擊斬其別將於屬國故城。單于自將迎戰。懂等復破之。單于遂引還虎澤。○丙午。詔減百官及州郡縣奉。各有差。○二月。南匈奴寇常山。○滇零遣兵寇襄中。漢中太守鄭勤移屯襄中。任尙軍。久出無功。民廢農桑。乃詔尙將吏民還屯長安。罷遣南陽潁川汝南吏士。乙丑。初置京兆虎牙都尉於長安。扶風都尉於雍。如西京三輔都尉故事。謁者龐參說鄧騭。徙邊郡不能自存者。入居三輔。騭然之。欲棄涼州。并力北邊。乃會公卿集議。騭曰。譬若衣敗壞。一以相補。猶有所完。若不如此。將兩無所保。郎中陳國虞詡言於太尉張禹曰。若大將軍之策。不可者三。先帝開拓土宇。劬勞後定。而今憚小費。舉而棄之。此不可一也。涼州既棄。卽以三輔爲塞。則園陵單外。此不可二也。嗚呼。關西出將。關東出相。烈士武臣。多出涼州。土風壯猛。便習兵事。今羌胡所以不敢入據三輔。爲心腹之害者。以涼州在後故也。涼州士民。所以推鋒執銳。蒙矢石於行陳。父死於前。子戰於後。無反顧之心者。爲臣屬於漢故也。今推而捐之。割而棄之。民庶安土重遷。必引領而怨曰。中國棄我於夷狄。雖赴義從善之人。不能無恨。如卒然起謀。因天下之飢餓。乘海內之虛弱。英雄相聚。量材立帥。驅氏羌以爲前鋒。席卷而東。雖賁育爲卒。太公爲將。猶恐不足當禦。如此。則函谷以西。園陵舊京。非復漢有。此不可三也。議者喻以補衣。猶有所完。詡恐其疽食侵淫。而無限極也。禹曰。吾意不及此。微子之言。幾敗國事。詡因說禹收羅涼土。豪桀引其牧守子弟於朝。令諸府各辟數人。外以勸厲。答其功勤。內以拘致。防其邪計。禹善其言。更集四府。皆從詡議。於是辟西州豪桀爲掾屬。拜牧守長吏子弟爲郎。以安慰之。鄧騭由是惡詡。欲以吏法中傷之。會朝歌賊寧季等數千人。攻殺長吏。屯聚連年。州郡不能禁。乃以詡爲朝歌長。故舊皆弔之。詡笑曰。事不避難。臣之職也。不遇槃根錯節。無以別利器。此乃

吾立功之秋也。始到，謁河內太守馬稜。稜曰：君儒者，當謀謨廟堂，乃在朝歌，甚為君憂之。謂曰：此賊犬羊相聚，以求溫飽耳。願明府不以爲憂。稜曰：何以言之？謂曰：朝歌者，韓魏之郊，背太行，臨黃河，去敖倉不過百里，而青冀之民流亡萬數，賊不知開倉招衆，劫庫兵，守成阜，斷天下右臂，此不足憂也。今其衆新盛，難與爭鋒，兵不厭權，願寬假轡策，勿令有所拘閔而已。及到官，設三科以募求壯士，自掾史以下，各舉所知，其攻劫者爲上，傷人偷盜者次之，不事家業者爲下，收得百餘人，詔爲饗會，悉貫其罪，使入賊中，誘令劫掠，乃伏兵以待之，遂殺賊數百人。又潛遣貧人能縫者，備作賊衣，以采線縫其裾，有出市里者，吏輒禽之，賊由是駭散。咸稱神明，縣境皆平。○三月，何熙軍到五原，曼柏暴疾不能進，遣龐雄與梁懂、耿种將步騎萬六千人攻虎澤，連營稍前，單于見諸軍竝進，大恐怖，願讓韓琮曰：汝言漢人死盡，今是何等人也，乃遣使乞降，許之。單于脫帽徒跣，對龐雄等拜，陳道死罪，於是赦之，遇待如初，乃還所鈔漢民男女及羌所略，轉賣入匈奴中者，合萬餘人，會熙卒，卽拜梁懂爲度遼將軍，龐雄還爲大鴻臚。○先零羌復寇襄中，鄭勤欲擊之，主簿段崇諫以爲虜乘勝，鋒不可當，宜堅守待之，勤不從，出戰，大敗，死者三千餘人。段崇及門下史王宗、原展以身扞刃，與勤俱死。○徙金城郡居襄武。○戊子，杜陵園火。○癸巳，郡國九地震。○夏四月，六州蝗。○丁丑，赦天下。○王宗、法雄與張伯路連戰，破走之，會赦到，賊以軍未解甲，不敢歸降。王宗召刺史太守共議，皆以爲當遂擊之。法雄曰：不然，兵凶器，戰危事，勇不可恃，勝不可必，賊若乘船浮海，深入遠島，攻之未易也，及有赦令，可且罷兵，以慰誘其心，執必解散，然後圖之，可不戰而定也。宗善其言，卽罷兵。賊聞大喜，乃還所略人，而東萊郡兵猶未解甲，賊復驚恐，遁走遼東，止海島上。○秋七月，乙酉，三郡大水。○騎都尉任仁與羌戰，累敗，而兵士放縱，檻車徵詣廷尉，死。護羌校尉段禧卒，復以前校尉侯霸代之，移居張掖。○九月，甲申，益州郡地震。○皇太后母新野

君病，太后幸其第，連日宿止。三公上表固爭，乃還宮。冬十月，甲戌，新野君薨，使司空護喪事。儀比東海恭王，鄧騫等乞身行服。太后欲不許，以問曹大家，大家上疏曰：妾聞謙讓之風，德莫大焉，今四舅深執忠孝，引身自退，而以方垂未靜，拒而不許，如後有毫毛，加於今日，誠恐推讓之名不可再得，太后乃許之。及服除，詔騫復還輔朝政，更授前封，騫等叩頭固讓，乃止。於是竝奉朝請，位次三公下，特進侯上，其有大議，乃詣朝堂，與公卿參謀。○太后詔陰后家屬皆歸故郡，還其資財五百餘萬。

五年春，正月，庚辰朔，日有食之。○丙戌，郡國十地震。○己丑，太尉張禹免。甲申，以光祿勳潁川李修爲太尉。○先零羌寇河東，至河內，百姓相驚，多南奔度河，使北軍中候朱寵將五營士屯孟津，詔魏郡趙國常山中山繕作塢候，六百一十六所，羌既轉盛，而緣邊二千石令長多內郡人，竝無守戰意，皆爭上徙郡縣，以避寇難。二月，詔隴西徙襄武，安定徙美陽，北地徙池陽，上郡治衙，百姓戀土不樂去，書遂乃刈其禾稼，發徹室屋，夷營壁，破積聚，時連旱蝗飢荒，而驅蹙劫掠，流離分散，隨道死亡，或弃捐老弱，或爲人僕妾，喪其大半，復以任尙爲侍御史，擊羌於上黨羊頭山，破之，乃罷孟津屯。○夫餘王寇樂浪。○高句驪王宮與濊貊寇玄菟。○夏，閏四月，丁酉，赦涼州河西四郡。○海賊張伯路復寇東萊，青州刺史法雄擊破之，賊逃還遼東，遼東人李久等共斬之，於是州界清靜。○秋九月，漢陽人杜琦及弟季貢同郡王信等與羌通謀，聚衆據上邽城，冬十二月，漢陽太守趙博遣客杜習刺殺琦，封習討討侯，杜季貢王信等將其衆據樛泉營。○是歲九州蝗，郡國八雨水。

六年春，正月，甲寅，詔曰：凡供薦新味，多非其節，或鬱養疆孰，或穿掘萌芽，味無所至，而天折生長，豈所以順時育物乎？傳曰：非其時不食，自今當奉祠陵廟，及給御者，皆須時乃上，凡所省二十三種。○三月，十州蝗。○夏四月，乙丑，司空張敏罷。○己卯，以太常劉愷爲司空。○詔

建武元功二十八將皆紹封。○五月旱。○丙寅詔令中二千石下至黃綬一切復秩。○六月壬辰豫章員谿原山崩。○辛巳赦天下。○侍御史唐喜討漢陽賊王信破斬之。杜季貢亡從滇零是歲滇零死。子零昌立。年尚少。同種狼莫爲其計策。以季貢爲將軍。別居丁奚城。七年春二月丙午郡國十八地震。○夏四月乙未平原懷王勝薨。無子。太后立樂安夷王寵子得爲平原王。○丙申晦日有食之。○秋護羌校尉侯霸騎都尉馬賢擊先零別部牢羌於安定獲首虜千人。○蝗。

元初元年春正月甲子改元。○二月乙卯日南地坼長百餘里。○三月癸亥日有食之。○詔遣兵屯河內通谷衝要三十六所皆作塙壁設鳴鼓以備羌寇。○夏四月丁酉赦天下。○京師及郡國五旱蝗。○五月先零羌寇雍城。○蜀郡夷寇蠶陵殺縣令。○九月乙丑太尉李修罷。○羌豪號多與諸種鈔掠武都漢中巴郡板楯蠻救之。漢中五官掾程信率郡兵與蠻共擊破之。號多走還斷隴道與零昌合。侯霸馬賢與戰於枹罕破之。○辛未以大司農山陽司馬苞爲太尉。○冬十月戊子朔日有食之。○涼州刺史皮楊擊羌於狄道大敗死者八百餘人。○是歲郡國十五地震。

二年春護羌校尉龐參以恩信招誘諸羌號多等帥衆降參遣詣闕賜號多侯印遣之參始還治令居通河西道。○零昌分兵寇益州遣中郎將尹就討之。○夏四月丙午立貴人榮陽閻氏爲皇后。后性妬忌後宮李氏生皇子保后鳩殺李氏。○五月京師旱河南及郡國十九蝗。○六月丙戌太尉司馬苞薨。○秋七月辛巳以太僕泰山馬英爲太尉。○八月遼東鮮卑圍無慮九月又攻夫犁營殺縣令。○壬午晦日有食之。○尹就擊羌黨呂叔都等蜀人陳省羅橫應募刺殺叔都皆封侯賜錢詔屯騎校尉班雄屯三輔雄超之子也以左馮翊司馬鈞行征西將軍督關中諸郡兵八千餘人龐參將羌胡兵七千餘人與鈞分道並擊零昌參兵

至勇士東爲杜季貢所敗引退鈞等獨進攻拔丁奚城杜季貢率衆僞逃鈞令右扶風仲光等收羌禾稼光等違鈞節度散兵深入羌乃設伏要擊之鈞在城中怒而不救冬十月乙未光等兵敗竝沒死者三千餘人鈞乃遁還龐參既失期稱病引還皆坐徵下獄鈞自殺時度遼將軍梁懂亦坐事抵罪校書郎中扶風馬融上書稱參懂智能宜宥過責效詔赦參等以馬賢代參領護羌校尉復以任尙爲中郎將代班雄屯三輔。○懷令虞詡說尙曰兵法弱不攻彊走不逐飛自然之執也今虜皆馬騎日行數百里來如風雨去如絕弦以步追之執不相及所以雖屯兵二十餘萬曠日而無功也爲使君計莫如罷諸郡兵各令出錢數千二十人共市一馬以萬騎之衆逐數千之虜追尾掩截其道自窮便民利事大功立矣尙即上言用其計遣輕騎擊杜季貢於丁奚城破之太后聞虞詡有將帥之略以爲武都太守羌衆數千遮詡於陳倉峭谷詡即停軍不進而宣言上書請兵須到當發羌聞之乃分鈔傍縣詡因其兵散日夜進道兼行百餘里令吏士各作兩竈日增倍之羌不敢逼或問曰孫臏滅竈而其兵散之法日行不過三十里以戒不虞而今日且二百里何也詡曰虜衆多吾兵少徐行則易爲所及速進則彼所不測虜見吾竈日增必謂郡兵來迎衆多行速必憚追我孫臏見弱吾今示彊執有不同故也既到郡兵不滿三千而羌衆萬餘攻圍赤亭數十日詡乃令軍中彊弩勿發而潛發小弩羌以爲矢力弱不能至并兵急攻詡於是使二十彊弩共射一人發無不中羌大震退詡因出城奮擊多所傷殺明日悉陳其兵衆令從東郭門出北郭門入貿易衣服回轉數周羌不知其數更相恐動詡計賊當退乃潛遣五百餘人於淺水設伏候其走路虜果大犇因掩擊大破之斬獲甚衆賊由是敗散詡乃占相地執築營壁百八十所招還流亡假賑貧民開通水運詡始到郡穀石千鹽石八千見戶萬三千視事三年米石八十鹽石四百民增至四萬餘戶人足家給一郡遂安。○十一月庚申郡國十地震。○十二月

武陵蠻中蠻反。州郡討平之。○己酉，司徒夏勤罷。○庚戌，以司空劉愷為司徒。光祿勳袁敞為司空。敞，安之子也。○前虎賁中郎將鄧弘卒。弘性儉素，治歐陽尚書，授帝禁中。有司奏贈弘驃騎將軍，位特進，封西平侯。太后追弘雅意，不加贈位衣服，但賜錢千萬，布萬匹。兄騰等復辭不受。詔封弘子廣德為西平侯。將葬，有司復奏發五營輕車騎士禮儀如霍光故事。太后皆不聽，但白蓋雙騎，門生輓送。後以帝師之重，分西平之都鄉封廣德弟甫德為都鄉侯。

資治通鑑卷第四十九

資治通鑑卷第五十

漢紀四十一

孝安皇帝中

元初三年春正月，蒼梧鬱林合浦蠻夷反。二月，遣侍御史任遠督州郡兵討之。○郡國十地震。○三月辛亥，日有食之。○夏四月，京師旱。○五月，武陵蠻反。州郡討破之。○癸酉，度遼將軍鄧遵率南單于擊零羌於靈州，斬首八百餘級。○越雋徼外夷舉種內屬。○六月，中郎將任尙遣兵擊破先零羌於丁奚城。○秋七月，武陵蠻復反。州郡討平之。○九月，築馮翊北界侯塢五百所，以備羌。○冬十一月，蒼梧鬱林合浦蠻夷降。○舊制，公卿二千石刺史不得行三年喪。司徒劉愷以為非，所以師表百姓，宣美風俗。丙戌，初聽大臣行三年喪。○癸卯，郡國九地震。○十二月丁巳，任尙遣兵擊零昌於北地，殺其妻子，燒其廬舍，斬首七百餘級。○四年春二月乙巳朔，日有食之。○乙卯，赦天下。○壬戌，武庫災。○任尙遣當關種羌榆鬼等刺殺杜季貢，封榆鬼為破羌侯。○司空袁敞廉勁不阿，權貴失鄧氏旨。尙書郎張俊有私書與敞子俊，怨家封上之。夏四月，戊申，敞坐策免，自殺。俊等下獄當死。俊上書自訟，臨刑太后詔以減死論。己巳，遼西鮮卑連休等入寇，郡兵與烏桓大人於秩居等共擊，大破之。斬首千三百級。○六月，戊辰，三郡雨雹。○尹就坐不能定益州徵抵罪，以益州刺史張喬領其軍屯招誘叛羌，稍稍降散。○秋七月，京師及郡國十雨水。○九月，護羌校尉任尙復募效功種羌，號封刺殺零昌，封號封為羌王。○冬十一月己卯，彭城靖王恭薨。○越雋夷以郡縣賦斂煩

數十二月大牛種封離等反殺遂久令○甲子任尙與騎都尉馬賢共擊先零羌狼莫追至北地相持六十餘日戰於富平河上大破之斬首五千級狼莫逃去於是西河處人種羌萬人詣鄧遵降隴右平○是歲郡國十三地震

五年春三月京師及郡國五旱○夏六月高句驪與濊貊寇玄菟○永昌益州蜀郡夷皆叛應封離衆至十餘萬破壞二十餘縣殺長吏焚掠百姓骸骨委積千里無人○秋八月丙申朔日有食之○代郡鮮卑入寇殺長吏發緣邊甲卒黎陽營兵屯上谷以備之冬十月鮮卑寇上谷攻居庸關復發緣邊諸郡黎陽營兵積射士步騎二萬人屯列衝要○鄧遵募上郡全無種羌雕何刺殺狼莫封離何爲羌侯自羌叛十餘年間軍旅之費凡用二百四十餘億府帑空竭邊比及內郡死者不可勝數并涼二州遂至虛耗及零昌狼莫死諸羌瓦解三輔益州無復寇警詔封鄧遵爲武陽侯邑三千戶遵以太后從弟故爵封優大任尙與遵爭功又坐詐增首級受賕枉法贓千萬已上十二月檻車徵尙棄市沒入財物鄧鷲子侍中鳳嘗受尙馬鷲髮妻及鳳以謝罪○是歲郡國十四地震○太后弟惲閭皆卒封惲子廣宗爲葉侯閭子忠爲西華侯

六年春二月乙巳京師及郡國四十二地震○夏四月沛國勃海大風雨雹○五月京師旱○六月丙戌平原哀王得薨無子○秋七月鮮卑寇馬城塞殺長吏度遼將軍鄧遵及中郎將馬續率南單于追擊大破之○九月癸巳陳懷王竦薨無子國除○冬十二月戊午朔日有食之既○郡國八地震○是歲太后徵和帝弟濟北王壽河間王開子男女年五歲以上四十餘人及鄧氏近親子孫三十餘人竝爲開邸第教學經書躬自監試詔從兄河南尹豹越騎校尉康等曰末世貴戚食祿之家溫衣美飯乘堅驅良而面牆術學不識臧否斯故禍敗之所從來也○豫章有芝草生太守劉祗欲上之以問郡人唐檀檀曰方今外戚豪盛君

道微弱斯豈嘉瑞乎祗乃止○益州刺史張喬遣從事楊竦將兵至楮榆擊封離等大破之斬首三萬餘級獲生口千五百人封離等惶怖斬其同謀渠帥詣竦乞降竦厚加慰納其餘三十六種皆來降附竦因奏長吏姦猾侵犯蠻夷者九十八人皆滅死論○初西域諸國既絕於漢北匈奴復以兵威役屬之與共爲邊寇敦煌太守曹宗患之乃上遣行長史索班將千餘人屯伊吾以招撫之於是車師前王及鄯善王復來降○初疏勒王安國死無子國人立其舅子遺腹爲王遺腹叔父臣磐在月氏月氏納而立之後莎車畔于寘屬疏勒疏勒遂疆與龜茲于寘爲敵國焉

永寧元年春三月丁酉濟北惠王壽薨○北匈奴率車師後王軍就共殺後部司馬及敦煌長史索班等遂擊走其前王略有北道鄯善逼急求救於曹宗宗因此請出兵五千人擊匈奴以報索班之恥因復取西域公卿多以爲宜閉玉門關絕西域太后聞軍司馬班勇有父風召詣朝堂問之勇上議曰昔孝武皇帝患匈奴疆盛於是開通西域論者以爲奪匈奴府藏斷其右臂光武中興未遑外事故匈奴負疆驅率諸國及至永平再攻敦煌河西諸郡城門晝閉孝明皇帝深惟廟策乃命虎臣出征西域故匈奴遠遁邊境得安及至永元莫不內屬會問者羌亂西域復絕北虜遂遣責諸國備其逋租高其價直嚴以期會鄯善車師皆懷憤怨思樂事漢其路無從前所以時有叛者皆由牧養失宜還爲其害故也今曹宗徒恥于前負欲報雪匈奴而不尋出兵故事未度當時之宜也夫要功荒外萬無一成若兵連禍結悔無所及况府藏未充師無後繼是示弱於遠夷暴短於海內臣愚以爲不可許也舊敦煌郡有營兵三百人今宜復之復置護西域副校尉居於敦煌如永元故事又宜遣西域長史將五百人屯樓蘭西當焉耆龜茲徑路南疆鄯善于寘心膽北扞匈奴東近敦煌如此誠便尙書復問勇利害云何勇對曰昔永平之末始通西域初遣中郎將居敦煌後置副校尉於車

師既爲胡虜節度。又禁漢人不得有所侵擾。故外夷歸心。匈奴畏威。今鄯善王尤還。漢人外孫。若匈奴得志。則尤還必死。此等雖同鳥獸。亦知避害。若出屯樓蘭。足以招附其心。愚以爲便。長樂衛尉鐔顯。廷尉綦母參。司隸校尉崔據。難曰。朝廷前所以棄西域者。以其無益於中國。而費難供也。今車師已屬匈奴。鄯善不可保信。一旦反覆。班將能保北虜不爲邊害乎。勇對曰。今中國置州牧者。以禁郡縣姦猾盜賊也。若州牧能保盜賊不起者。臣亦願以要斬保匈奴之不爲邊害也。今通西域。則虜執必弱。虜執弱。則爲患微矣。孰與歸其府藏。續其斷臂哉。今置校尉。以扞撫西域。設長史。以招懷諸國。若棄而不立。則西域望絕。望絕之後。屈就北虜。緣邊之郡。將受困害。恐河西城門。必將復有晝閉之微矣。今不廓開朝廷之德。而拘屯戍之費。若此。北虜遂熾。豈安邊久長之策哉。太尉屬毛軫。難曰。今若置校尉。則西域駱驛遣使。求索無厭。與之則費難供。不與則失其心。一旦爲匈奴所迫。當復求救。則爲役大矣。勇對曰。今設以西域歸匈奴。而使其恩德大漢。不爲鈔盜。則可矣。如其不然。則因西域租入之饒。兵馬之衆。以擾動緣邊。是爲富仇讐之財。增暴夷之執也。置校尉者。宣威布德。以繫諸國內向之心。而疑匈奴覬覦之情。而無費財耗國之慮也。且西域之人。無他求索。其來入者。不過粟食而已。今若拒絕。執歸北屬夷虜。并力以寇并涼。則中國之費。不止十億。置之誠便。於是從勇議。復敦煌郡營兵三百人。置西域副校尉。居敦煌。雖復羈縻西域。然亦未能出屯。其後匈奴果數與車師共入寇鈔。河西大被其害。○沈氏羌寇張掖。○夏四月丙寅。立皇子保爲太子。改元。赦天下。○己巳。紹封陳敬王子崇爲陳王。濟北惠王子萇爲樂成王。河間孝王子翼爲平原王。○六月。護羌校尉馬賢。將萬人討沈氏羌於張掖。破之。斬首千八百級。獲生口千餘人。餘虜悉降。時當煎等大豪飢五等。以賢兵在張掖。乃乘虛寇金城。賢還軍出塞。斬首數千級。而還。燒當燒何種。聞賢軍還。復寇張掖。殺長吏。○秋七月乙酉朔。日有食之。○冬十月己巳。

司空李郃免。癸酉。以衛尉廬江陳襄爲司空。○京師及郡國三十三大水。○十二月。永昌徵外。揮國王雍曲調遣使者獻樂及幻人。○戊辰。司徒劉愷請致仕。許之。以千石祿歸養。○遼西鮮卑大人烏倫。其至鞬。各以其衆詣度遼將軍鄧遵降。○癸酉。以太常楊震爲司徒。○是歲。郡國二十三地震。○太后從弟越騎校尉康。以太后久臨朝政。宗門盛滿。數上書太后。以爲宜崇公室。自損私權。言甚切至。太后不從。康謝病不朝。太后使內侍者問之。所使者乃康家先婢。自通中大人康聞而詬之。婢怨恚。還白康詐疾。而言不遜。太后大怒。免康官。遣歸國。絕屬籍。○初。當煎種飢五。同種大豪盧忽忍良等千餘戶。別留允街。而首施兩端。建光元年春。護羌校尉馬賢。召盧忽斬之。因放兵擊其種人。獲首虜二千餘。忍良等皆亡出塞。○幽州刺史巴郡馮煥。玄菟太守姚光。遼東太守蔡諷等。將兵擊高句驪。高句驪王宮遣子遂成詐降。而襲玄菟。遼東殺傷二千餘人。○二月。皇太后寢疾。癸亥。赦天下。三月。癸巳。皇太后鄧氏崩。未及大斂。帝復申前命。封鄧鷲爲上蔡侯。位特進。丙午。葬和熹皇后。太后自臨朝以來。水旱十載。四夷外侵。盜賊內起。每聞民飢。或達旦不寐。躬自減徹。以救災厄。故天下皆平。歲還豐穰。上始親政事。尙書陳忠薦隱逸及直道之士。潁川杜根。平原成翊。世之徒。上皆納用之。忠寵之子也。初。鄧太后臨朝。根爲郎中。與同時郎上書言。帝年長。宜親政事。太后大怒。皆令盛以縑囊。於殿上撲殺之。既而載出城外。根得蘇。太后使人檢視。根遂詐死三日。目中生蛆。因得逃竄。爲宜城山中酒家保。積十五年。成翊世以郡吏。亦坐諫。太后不歸政。抵罪。帝皆徵詣公車。拜根侍御史。翊世尙書郎。或問根曰。往者遇禍。天下同義。知故不少。何至自苦如此。根曰。周旋民間。非絕跡之處。邂逅發露。禍及親知。故不爲也。○戊申。追尊清河孝王曰孝德皇。皇妣左氏曰孝德后。祖妣宋貴人曰敬隱后。初。長樂太僕蔡倫。受竇后諷旨。誣陷宋貴人。帝敕使自致廷尉。倫飲藥死。○夏四月。高句驪復與鮮卑入寇遼東。蔡諷追擊於新昌。

戰歿。功曹掾龍端、兵馬掾公孫醜，以身扞諷，俱歿於陳。○丁巳，尊帝嫡母耿姬爲甘陵大貴人。○甲子，樂成王棖坐驕淫不法，貶爲蕪湖侯。○己巳，令公卿下至郡國守相，各舉有道之士一人，尚書陳忠以詔書既開，諫爭慮言事者必多激切，或致不能容，乃上疏豫通廣帝意，曰：臣聞仁君廣山藪之大，納切直之謀，忠臣盡謇諤之節，不畏逆耳之害，是以高祖舍周昌桀紂之譬，孝文喜袁盎人豕之譏，武帝納東方朔宣室之正，元帝容薛廣德自刎之切。今明詔崇高宗之德，推宋景之誠，引咎克躬，諮訪羣吏，言事者見杜根成翊世等，新蒙表錄，顯列二臺，必承風響應，爭爲切直，若嘉謀異策，宜輒納用，如其管穴，妄有譏刺，雖苦口逆耳，不得事實，且優游寬容，以示聖朝無諱之美。若有道之士對問高者，宜垂省覽，特遷一等，以廣直言之路。書御有詔，拜有道高第士沛國施延爲侍中。初，汝南薛包，少有至行，父娶後妻，而憎包，分出之。包日夜號泣，不能去，至被毆扑，不得已，廬於舍外。旦入洒掃，父怒，又逐之，乃廬於里門。晨昏不廢，積歲餘，父母慙而還之。及父母亡，弟子求分財異居，包不能止，乃中分其財，奴婢引其老者曰：與我共事久，若不能使也。田廬取其荒頓者曰：吾少時所治，意所戀也。器物取朽敗者曰：我素所服食，身口所安也。弟子數破其產，輒復賑給。帝聞其名，令公車特徵，至拜侍中。包以死自乞，有詔賜告歸，加禮如毛義。○帝少號聰明，故鄧太后立之，及長，多不德，稍不可。太后意，帝乳母王聖知之，太后徵濟北河間王子詣京師，河間王子翼美容儀，太后奇之，以爲平原懷王後，留京師。王聖見太后久不歸政，慮有廢置，常與中黃門李閏、江京、候伺左右，共毀短太后於帝。帝每懷忿懼，及太后崩，宮人先有受罰者，懷怨恚，因誣告太后兄弟悝弘、閏，先從尚書鄧訪取廢帝故事，謀立平原王。帝聞追怒，令有司奏悝等大逆無道，遂廢西平侯廣宗、葉侯廣德、西華侯忠、陽安侯珍、都鄉侯甫德，皆爲庶人。鄧騭以不與謀，但免特進，遣就國。宗族免官歸故郡，沒入騭等貲財田宅，徙鄧訪及家屬於遠郡，郡縣迫逼，廣

宗及忠皆自殺。又徙封騭爲羅侯。五月，庚辰，騭與子鳳竝不食而死。騭從弟河南尹豹、度遼將軍舞陽侯遵，將作大匠暢，皆自殺。唯廣德兄弟以母與閏后同產，得留京師。復以耿夔爲度遼將軍，徵樂安侯鄧康爲太僕，丙申，貶平原王翼爲都鄉侯，遣歸河間。翼謝絕賓客，閉門自守，由是得免。○初，鄧后之立也，太尉張禹司徒徐防欲與司空陳寵共奏追封后，父訓寵以先世無奏請故事，爭之，連日不能奪，及訓追加封諡，禹防復約寵，俱遣子奉禮於虎賁中郎將騭，寵不從。故寵子忠不得志於鄧氏，騭等敗，忠爲尚書，數上疏陷成其惡。大司農京兆朱寵痛騭無罪遇禍，乃肉袒與樞上疏曰：伏惟和熹皇后聖善之德，爲漢文母，兄弟忠孝，同心愛國，社稷是賴，功成身退，讓國遜位，歷世貴戚，無與爲比，當享積善履謙之祐，而橫爲宮人單辭所陷，利口傾險，反亂國家，罪無申證，獄不訊鞠，遂令騭等罹此酷陷，一門七人，竝不以命，屍骸流離，冤魂不反，逆天感人，率土喪氣，宜收還冢次，寵樹遺孤，奉承血祀，以謝亡靈。寵知其言切，自致廷尉，陳忠復劾奏寵，詔免官歸田里。衆庶多爲騭稱枉者，帝意頗悟，乃譴讓州郡還葬騭等於北芒，諸從兄弟皆得歸京師。○帝以耿貴人兄牟平侯寶監羽林左軍車騎，封宋楊四子皆爲列侯。宋氏爲卿校侍中大夫，謁者郎吏十餘人，閭皇后兄弟顯、景、耀竝爲卿校，典禁兵，於是內寵始盛。帝以江京嘗迎帝於邸，以爲京功，封都鄉侯，封李閏爲雍鄉侯，閏京竝遷中常侍，京兼大長秋，與中常侍樊豐、黃門令劉安、鈞、盾、令陳達及王聖、聖女伯榮扇動內外，競爲侈虐。伯榮出入宮掖，傳通姦賂，司徒楊震上疏曰：臣聞政以得賢爲本，治以去穢爲務，是以唐虞俊又在官，四凶流放，天下咸服，以致雍熙。方今九德未事，嬖倖充庭，阿母王聖出自賤微，得遭千載奉養聖躬，雖有推燥居溼之勤，前後賞惠，過報勞苦，而無厭之心，不知紀極，外交屬託，擾亂天下，損辱清朝，塵點日月，夫女子小人，近之喜，遠之怨，實爲難養，宜速出阿母，令居外舍，斷絕伯榮，莫使往來，令恩德兩隆，上下俱美。奏御，帝以示阿

母等內倖皆懷忿恚而伯榮驕淫尤甚通於故朝陽侯劉護從兄瓌瓌遂以爲妻官至侍中得襲護爵震上疏曰經制父死子繼兄亡弟及以防篡也伏見詔書封故朝陽侯劉護再從兄瓌襲護爵爲侯護同產弟威今猶見在臣聞天子專封封有功諸侯專爵爵有德今瓌無它功行但以配阿母女一時之間既位侍中又至封侯不稽舊制不合經義行人喧譁百姓不安陛下宜鑒鏡既往順帝之則尚書廣陵翟酺上疏曰昔竇鄧之寵傾動四方兼官重祿盈金積貨至使議弄神器改更社稷豈不以執尊威廣以致斯患乎及其破壞頭顱墮地願爲孤豚豈可得哉夫致貴無漸失必暴受爵非道殃必疾今外戚寵幸功鈞造化漢元以來未有等比陛下誠仁恩周洽以親九族然祿去公室政移私門覆車重尋寧無摧折此最安危之極戒社稷之深計也昔文帝愛百金於露臺飾帷帳于阜囊或有譏其儉者上曰朕爲天下守財耳豈得妄用之哉今自初政以來日月未久費用賞賜已不可算斂天下之財積無功之家帑藏單盡民物彫傷卒有不虞復當重賦百姓怨叛既生危亂可待也願陛下勉求忠貞之臣誅遠佞諂之黨割情欲之歡罷宴私之好心存亡國所以失之鑒觀興王所以得之庶災害可息豐年可招矣書奏皆不省○秋七月己卯改元赦天下○壬寅太尉馬英薨○燒當羌忍良等以麻奴兄弟本燒當世嫡而校尉馬賢撫恤不至常有怨心遂相結共脅將諸種寇湟中攻金城諸縣八月賢將先零種擊之戰於牧苑不利麻奴等又敗武威張掖郡兵於令居因脅將先零沈氏諸種四千餘戶緣山西走寇武威賢追到鸞鳥招引之諸種降者數千麻奴南還湟中甲子以前司徒劉愷爲太尉初清河相叔孫光坐臧抵罪遂增禁錮二世至是居延都尉范邠復犯臧罪朝廷欲依光比劉愷獨以春秋之義善善及子孫惡惡止其身所以進人於善也如今使臧吏禁錮子孫以輕從重懼及善人非先王詳刑之意也陳忠亦以爲然有詔太尉議是○鮮卑其至護寇居庸關九月雲中太守成嚴擊之兵

敗功曹楊穆以身扞嚴與之俱歿鮮卑於是圍烏桓校尉徐常於馬城度遼將軍耿夔與幽州刺史龐參發廣陽漁陽涿郡甲卒救之鮮卑解去○戊子帝幸衛尉馮石府留飲十餘日賞賜甚厚拜其子世爲黃門侍郎世弟二人皆爲郎中石陽邑侯魴之孫也父柱尚顯宗女獲嘉公主石襲公主爵爲獲嘉侯能取悅當世故爲帝所寵○京師及郡國二十七雨水○冬十一月己丑郡國三十五地震○鮮卑寇玄菟○尚書令殷諷等奏以爲孝文定約禮之制光武皇帝絕告寧之典貽則萬世誠不可改宜復斷大臣行三年喪尚書陳忠上疏曰高祖受命蕭何創制大臣有寧告之科合於致憂之義建武之初新承大亂凡諸國政多趣簡易大臣既不得告寧而羣司營祿念私鮮循三年之喪以報顧復之恩者禮義之方實爲彫損陛下聽大臣終喪聖功美業靡以尙茲孟子曰老吾老以及人之老幼吾幼以及人之幼天下可運於掌臣願陛下登高北望以甘陵之思揆度臣子之心則海內咸得其所時宦官不便之竟寢忠奏庚子復斷二千石以上行三年喪

袁宏論曰古之帝王所以篤化美俗率民爲善因其自然而不奪其情民猶有不及者而況毀禮止哀滅其天性乎

十二月高句驪王宮率馬韓濊貊數千騎圍玄菟夫餘王遣子尉仇台將二萬餘人與州郡并力討破之是歲宮死子遂成立玄菟太守姚光上言欲因其喪發兵擊之議者皆以爲可許陳忠曰宮前桀黠光不能討死而擊之非義也宜遣使弔問因責讓前罪赦不加誅取其後善帝從之

延光元年春三月丙午改元赦天下○護羌校尉馬賢追擊麻奴到湟中破之種衆散遁○夏四月京師郡國四十一雨雹河西雹大者如斗○幽州刺史馮煥玄菟太守姚光數糾發姦惡怨者詐作璽書譴責煥光賜以歐刀又下遼東都尉龐奮使速行刑奮卽斬光收煥煥

欲自殺其子緄疑詔文有異止煥曰大人在州志欲去惡實無他故必是凶人妄詐規肆姦毒願以事自上甘罪無晚煥從其言上書自訟果詐者所爲徵奮抵罪○癸巳司空陳褒免五月庚戌宗正彭城劉授爲司空○己巳封河間孝王子德爲安平王嗣樂成靖王後○六月郡國蝗○秋七月癸卯京師及郡國十三地震○高句驪王遂成還漢生口詣玄菟降其後濊貊率服東垂少事○虔人羌與上郡胡反度遼將軍耿夔擊破之○八月陽陵園寢火○九月甲戌郡國二十七地震○鮮卑既累殺郡守瞻氣轉盛控弦數萬騎冬十月復寇鴈門定襄十一月寇太原○燒當羌麻奴飢困將種衆詣漢陽太守耿种降○是歲京師及郡國二十七雨水○帝數遣黃門常侍及中使伯榮往來甘陵尙書僕射陳忠上疏曰今天心未得隔并屢臻青冀之域淫雨漏河徐岱之濱海水盆溢兗豫蝗蝻滋生荆楊稻收儉薄并涼二州羌戎叛戾加以百姓不足府帑虛匱陛下以不得親奉孝德皇園廟比遣中使致敬甘陵朱軒駢馬相望道路可謂孝至矣然臣竊聞使者所過威權翕赫震動郡縣王侯二千石至爲伯榮獨拜車下發民修道繕理亭傳多設儲侍徵役無度老弱相隨動有萬計賂遺僕從人數百匹頓蹄呼嗟莫不叩心河間託叔父之屬清河有陵廟之尊及剖符大臣皆猥爲伯榮屈節車下陛下不問必以爲陛下欲其然也伯榮之威重於陛下陛下之柄在於臣妾水災之發必起於此昔韓嫣託副車之乘受馳視之使江都誤爲一拜而嫣受歐刀之誅臣願明主嚴天元之尊正乾剛之位不宜復令女使干錯萬機重察左右得無石顯漏泄之姦尙書納言得無趙昌譖崇之詐公卿大臣得無朱博阿傅之援外屬近戚得無王鳳害商之謀若國政一由帝命王事每決於己則下不得僭上臣不得干君常雨大水必當霽止四方衆異不能爲害書奏不省時三府任輕機事專尙書而災眚變咎輒切免三公陳忠上疏曰漢興舊事丞相所請靡有不聽今之三公雖當其名而無其實選舉誅賞一由尙書尙書

見任重於三公陵遲以來其漸久矣臣忠心常獨不安近以地震策免司空陳褒今者災異復欲切讓三公昔孝成皇帝以妖星守心移咎丞相卒不蒙上天之福徒乖宋景之誠故知是非之分較然有歸矣又尙書決事多違典故罪法無例詆欺爲先文慘言醜有乖章憲宜責求其意割而勿聽上順國典下防威福置方員於規矩審輕重於衡石誠國家之典萬世之法也○汝南太守山陽王龔政崇寬和好才愛士以袁閔爲功曹引進郡人黃憲陳蕃等憲雖不屈蕃遂就吏閔不修異操而致名當時蕃性氣高明龔皆禮之由是羣士莫不歸心憲世貧賤父爲牛醫潁川荀淑至慎陽遇憲於逆旅時年十四淑竦然異之揖與語移日不能去謂憲曰子吾之師表也既而前至袁閔所未及勞問逆曰子國有顏子寧識之乎閔曰見吾叔度耶是時同郡戴良才高倨傲而見憲未嘗不正容及歸罔然若有失也其母問曰汝復從牛醫兒來邪對曰良不見叔度自以爲無不及既觀其人則瞻之在前忽然在後固難得而測矣陳蕃及同郡周舉嘗相謂曰時月之間不見黃生則鄙吝之萌復存乎心矣太原郭泰少遊汝南先過袁閔不宿而退進往從憲累日方還或以問泰曰奉高之器譬諸汎濫雖清而易挹叔度汪汪若千頃陂澄之不清淆之不濁不可量也憲初舉孝廉又辟公府友人勸其仕憲亦不拒之暫到京師卽還竟無所就年四十八終

范曄論曰黃憲言論風旨無所傳聞然士君子見之者靡不服深遠去疵吝將以道周性全無德而稱乎余曾祖穆侯以爲憲隤然其處順淵乎其似道淺深莫臻其分清濁未議其方若及門於孔氏其殆庶乎

二年春正月旄牛夷反益州刺史張喬擊破之○夏四月戊子爵乳母王聖爲野王君○北匈奴連與車師入寇河西議者欲復閉玉門陽關以絕其患敦煌太守張璠上書曰臣在京師亦以爲西域宜棄今親踐其土地乃知棄西域則河西不能自存謹陳西域三策北虜呼

衍王常展轉蒲類秦海之間。專制西域。共爲寇鈔。今以酒泉屬國吏士二千餘人。集昆侖塞。先擊呼衍王。絕其根本。因發鄯善兵五千人。脅車師後部。此上計也。若不能出兵。可置軍司馬。將士五百人。四郡供其犂牛穀食。出據柳中。此中計也。如又不能。則宜棄交河城。收鄯善等。悉使入塞。此下計也。朝廷下其議。陳忠上疏曰。西域內附日久。區區東望。扣關者數矣。此其不樂匈奴。慕漢之效也。今北虜已破。車師執必南攻鄯善。奔而不救。則諸國從矣。若然。則虜財賄益增。膽益殖。威臨南羌。與之交通。如此。河西四郡危矣。河西既危。不可不救。則百倍之役興。不訾之費發矣。議者但念西域絕遠。郵之煩費。不見孝武苦心勤勞之意也。方今敦煌孤危。遠來告急。復不輔助。內無以慰勞吏民。外無以威示百蠻。盛國滅土。非良計也。臣以爲敦煌宜置校尉。按舊增四郡屯兵。以西撫諸國。帝納之。於是復以班勇爲西域長史。將兵五百人。出屯柳中。○秋七月。丹陽山崩。○九月。郡國五雨水。○冬十月。辛未。太尉劉愷罷。甲戌。以司徒楊震爲太尉。光祿勳東萊劉熹爲司徒。大鴻臚耿寶自候震。薦中常侍李閔。兄於震曰。李常侍國家所重。欲令公辟其兄。寶唯傳上意耳。震曰。如朝廷欲令三府辟召。故宜有尙書敕。寶大恨而去。執金吾閔顯。亦薦所親於震。震又不從。司空劉授聞之。卽辟此二人。由是震益見怨。時詔遣使者。大爲王聖修第。中常侍樊豐。及侍中周廣。謝暉等。更相扇動。傾搖朝廷。震上疏曰。臣伏念。方今災害滋甚。百姓空虛。三邊震擾。帑藏匱乏。殆非社稷安寧之時。詔書爲阿母興起第舍。合兩爲一。連里竟街。雕修繕飾。窮極巧伎。攻山採石。轉相迫促。爲費巨億。周廣謝暉兄弟。與國無肺腑。枝葉之屬。依倚倖姦佞之人。與之分威共權。屬託州郡。傾動大臣。幸司辟召。承望旨意。招來海內貪汙之人。受其貨賂。至有臧錮棄世之徒。復得顯用。白黑渾淆。清濁同源。天下謹譁。爲朝結譏。臣聞師言。上之所取。財盡則怨。力盡則叛。怨叛之人。不可復使。惟陛下度之。上不聽。○鮮卑其至。韃自將萬餘騎。攻南匈奴於曼柏。莫韃

日逐王戰死。殺千餘人。○十二月。戊辰。京師及郡國三地震。○陳忠薦汝南周燮。南陽馮良。學行深純。隱居不仕。名重於世。帝以玄纁羔幣聘之。燮宗族更勸之曰。夫修德立行。所以爲國。君獨何爲守東岡之陂乎。燮曰。夫修道者。度其時而動。動而不時。焉得亨乎。與良皆自載。至近縣。稱病而還。

三年春正月。班勇至樓蘭。以鄯善歸附。特加三綬。而龜茲王白英。猶自疑未下。勇開以恩信。白英乃率姑墨溫宿。自縛詣勇。因發其兵步騎萬餘人。到車師前王庭。擊走匈奴伊蠡王於伊和谷。收得前部五千餘人。於是前部始復開通。還屯柳中。○二月。丙子。車駕東巡。辛卯。幸泰山。三月。戊戌。幸魯。還幸東平。至東郡。歷魏郡河內而還。○初。樊豐。周廣。謝暉等。見楊震連諫不從。無所顧忌。遂詐作詔書。調發司農錢穀。大匠見徒材木。各起冢舍園池。廬觀。役費無數。震復上疏曰。臣備台輔。不能調和陰陽。去年十二月四日。京師地動。其日戊辰。三者皆土。在中官。此中臣近官。持權用事之象也。臣伏惟陛下。以邊境未寧。躬自菲薄。宮殿垣屋。傾倚枝柱而已。而親近倖臣。未崇斷金。驕溢踰法。多請徒士。盛修第舍。賣弄威福。道路謹譁。地動之變。殆爲此發。又冬無宿雪。春節未雨。百僚焦心。而繕修不止。誠致旱之徵也。惟陛下奮乾剛之德。驕棄奢之臣。以承皇天之戒。震前後所言。轉切。帝旣不平之。而樊豐等。皆側目憤怨。以其名儒。未敢加害。會河間男子趙騰。上書指陳得失。帝發怒。遂收考詔獄。結以罔上不道。震上疏救之曰。臣聞殷周哲王。小人怨詈。則還自敬德。今趙騰所坐。激訐謗語。爲罪。與手刃犯法有差。乞爲虧除。全騰之命。以誘芻蕘。與人之言。帝不聽。騰竟伏尸都市。及帝東巡。樊豐等。因乘輿在外。競修第宅。太尉部掾高舒。召大匠令史考校之。得豐等所詐下詔書。具奏。須行還上之。豐等惶怖。會太史言。星變逆行。遂共譖震云。自趙騰死後。深用怨讟。且鄧氏故吏。有恚恨之心。壬戌。車駕還京師。便時太學。夜遣使者。策收震太尉印綬。震於是柴門絕賓。

客豐等復惡之。令大鴻臚耿寶奏震大臣不服罪。懷恚望。有詔遣歸本郡。震行至城西夕陽亭。乃慷慨謂其諸子門人曰。死者士之常分。吾蒙恩居上司。疾姦臣狡猾而不能誅。惡嬖女傾亂而不能禁。何面目復見日月。身死之日。以雜木爲棺。布單被。裁足蓋形。勿歸家次。勿設祭祀。因飲酖而卒。弘農太守移良承。樊豐等旨遣吏於陝縣留。停震喪。露棺道側。譴震諸子。代郵行書。道路皆爲隕涕。太僕征羌侯來歷曰。耿寶託元舅之親。榮寵過厚。不念報國恩。而傾側姦臣。傷害忠良。其天禍亦將至矣。歷歛之曾孫也。○夏四月乙丑。車駕入宮。○戊辰。以光祿勳馮石爲太尉。○南單于檀死。弟拔立爲烏稽侯。尸逐鞮單于時鮮卑數寇邊。度遼將軍耿夔與溫禺犢王呼尤徽將新降者。連年出塞擊之。還使屯列衝要。耿夔徵發煩劇。新降者皆怨恨。大人阿族等遂反。脅呼尤徽欲與俱去。呼尤徽曰。我老矣。受漢家恩。寧死不能相隨。衆欲殺之。有救者得免。阿族等遂將其衆亡去。中郎將馬翼與胡騎追擊破之。斬獲殆盡。○日南徼外蠻夷內屬。○六月。鮮卑寇玄菟。○庚午。閩中山崩。○秋八月辛巳。以大鴻臚耿寶爲大將軍。○王聖江京樊豐等譖太子乳王男。廚監郗吉等殺之家屬。徙比景。太子思男吉數爲歎息。京豐懼有後害。乃與閭后妄造虛無構譏太子。及東宮官屬。帝怒。召公卿以下議廢太子。耿寶等承旨。皆以爲當廢。太僕來歷與太常桓焉廷尉韃爲張皓議曰。經說。年未滿十五。過惡不在其身。且男吉之謀。太子容有不知。宜選忠良保傅。輔以禮義。廢置事重。此誠聖恩所宜宿留。帝不從。焉郁之子也。張皓退。復上書曰。昔賊臣江充造構讒逆。傾覆辰園。孝武久乃覺寤。雖追前失。悔之何及。今皇太子方十歲。未習保傅之教。可遽責乎。書奏。不省。九月丁酉。廢皇太子。保爲濟陰王。居於德陽殿西鍾下。來歷乃要結光祿勳。殺諷宗。正劉璋。將作大匠薛皓。侍中閻丘弘。陳光。趙代。施延。太中大夫九江朱伉等十餘人。俱詣鴻都門。證太子無過。帝與左右患之。乃使中常侍奉詔。脅羣臣曰。父子一體。天性自然。以義割恩。爲天

下也。歷諷等不識大典。而與羣小共爲謹諱。外見忠直。而內希後福。飾邪違義。豈事君之禮。朝廷廣開言路。故且一切假貸。若懷迷不反。當顯明刑書。諫者莫不失色。薛皓先頓首曰。固宜如明詔。歷怫然。廷詰皓曰。屬通諫。何言而今復背之。大臣乘朝車。處國事。固得輾轉若此乎。乃各稍自引起。歷獨守闕。連日不肯去。帝大怒。尙書令陳忠與諸尙書。遂共劾奏歷等。帝乃免歷。兄弟官削國租。黜歷母武安公主。不得會見。○隴西郡始還狄道。○燒當羌豪麻奴死。弟犀苦立。○庚申晦。日有食之。○冬十月。上行幸長安。十一月乙丑。還雒陽。○是歲。京師及諸郡國二十三地震。三十六大水。雨雹。

資治通鑑卷第五十

漢紀 孝安皇帝中延光三年

資治通鑑卷第五十一

漢紀四十三

孝安皇帝下

延光四年春二月乙亥下邳惠王衍薨。○甲辰車駕南巡。○三月戊午朔日有食之。○庚申帝至宛不豫乙丑帝發自宛丁卯至葉崩于乘輿年三十二。皇后與閻顯兄弟江京樊豐等謀曰今晏駕道次濟陰王在內邂逅公卿立之還為大害乃偽云帝疾甚徙御臥車所在上食問起居如故驅馳行四日庚午還宮辛未遣司徒劉熹詣郊廟社稷告天請命其夕發喪尊皇后曰皇太后太后臨朝以顯為車騎將軍儀同三司太后欲久專國政貪立幼年與顯等定策禁中迎濟北惠王子北鄉侯懿為嗣濟陰王以廢黜不得上殿親臨梓宮悲號不食內外羣僚莫不哀之。○甲戌濟南孝王香薨無子國絕。○乙酉北鄉侯即皇帝位。○夏四月丁酉太尉馮石為太傅司徒劉熹為太尉參錄尚書事前司空李郃為司徒。○閻顯忌大將軍耿寶位尊權重威行前朝乃風有司奏寶及其黨與中常侍樊豐虎賁中郎將謝暉侍中周廣野王王聖聖女永等更相阿黨互作威福皆大不道辛卯豐暉廣皆下獄死家屬徙比景賈及弟子林慮侯承皆為亭侯遣就國寶於道自殺王聖母子徙雁門於是閻顯為衛尉耀為城門校尉晏為執金吾兄弟竝處權要威福自由。○己酉葬孝安皇帝于恭陵廟曰恭宗。○六月乙巳赦天下。○秋七月西域長史班勇發敦煌掖酒泉六千騎及鄯善疏勒車師前部兵擊後部王軍就大破之獲首虜八千餘人生得軍就及匈奴持節使者。

將至索班沒處斬之傳首京師。○冬十月丙午越嶲山崩。○北鄉侯病篤中常侍孫程謂濟陰王謁者長興渠曰王以嫡統本無失德先帝用讒遂至廢黜若北鄉侯不起相與共斷江京閻顯事無不成者渠然之又中黃門南陽王康先為太子府史及長樂太官丞京兆王國等竝附同於程江京謂閻顯曰北鄉侯病不解國嗣宜以時定何不早徵諸王子簡所置乎顯以為然辛亥北鄉侯薨顯白太后祕不發喪更徵諸王子閉宮門屯兵自守十一月乙卯孫程王康王國與中黃門黃龍彭愷孟叔李建王成張賢史汎馬國王道李元楊佗陳予趙封李剛魏猛苗光等聚謀於西鍾下皆截單衣為誓丁巳京師及郡國十六地震是夜程等共會崇德殿上因入章臺門時江京劉安及李閻陳達等俱坐省門下程與王康共就斬京安達以李閻權執積為省內所服欲引為主因舉刃脅閻曰今當立濟陰王毋得搖動閻曰諾於是扶閻起俱於西鍾下迎濟陰王即皇帝位時年十一召尚書令僕射以下從輦幸南宮程等留守省門遮扞內外帝登雲臺召公卿百僚使虎賁羽林士屯南北宮諸門閻顯時在禁中憂迫不知所為小黃門樊登勸顯以太后詔召越騎校尉馮詩虎賁中郎將閻崇將兵屯平朔門以禦程等顯誘詩入省謂曰濟陰王立非皇太后意璽綬在此苟盡力效功封侯可得太后使授之印曰能得濟陰王者封萬戶侯得李閻者五千戶侯詩等皆許諾辭以卒被召所將衆少顯使與登迎吏士於掖門外詩因格殺登歸營屯守顯弟衛尉景遽從省中還外府收兵至盛德門孫程傳召諸尚書使收景尚書郭鎮時臥病聞之即率直宿羽林中出南止車門遇景從吏士拔白刃呼曰無子兵鎮即下車持節詔之景曰何等詔因斫鎮不中鎮引劍擊景墮車左右以戟又其胃遂禽之送廷尉獄即夜死戊午遣使者入省奪得璽綬帝乃幸嘉德殿遣侍御史持節收閻顯及其弟城門校尉耀執金吾晏竝下獄誅家屬皆徙比景遷太后於離宮己未開門罷屯兵壬戌詔司隸校尉惟閻顯江京近親當伏辜誅其

餘務崇寬貸。封孫程等皆為列侯。程食邑萬戶。王康。王國。食九千戶。黃龍。食五千戶。彭愷。孟叔。李建。食四千二百戶。王成。張賢。史汎。馬國。王道。李元。楊佗。陳予。趙封。李剛。食四千戶。魏猛。食二千戶。苗光。食千戶。是為十九侯。加賜車馬。金銀錢帛。各有差。李閔。以先不預謀。故不封。擢孫程為騎都尉。初程等入。章臺門。苗光獨不入。詔書錄功臣。令王康疏名。康詐疏光。入。章臺門。光未受符策。心不自安。詣黃門令。自告。有司奏康光欺詐。主上詔書勿問。以將作大匠來歷為衛尉。殺諷。閻丘弘等。先卒。皆拜其子為郎。朱伉。施延。陳光。趙代。皆見拔用。後至公卿。徵王男。邴吉家屬。還京師。厚加賞賜。帝之見廢也。監太子家。小黃門籍建。傅高。梵。長秋。長趙熹。丞良。賀。藥。長夏。珍。皆坐徙朔方。帝即位。竝擢為中常侍。初閹顯辟。崔駰之子。瑗。為吏。瑗以。北鄉侯。立不以正。知顯將敗。欲說令廢立。而顯日沈醉。不能得見。乃謂長史陳禪曰。中常侍。江京等。惑盡先帝。廢黜正統。扶立疎孽。少帝即位。發病廟中。周勃之徵。於斯復見。今欲與君。共求見說。將軍。白太后。收京等。廢少帝。引立濟陰王。必上當天心。下合人望。伊霍之功。不下。席而立。則將軍兄弟。傳祚於無窮。若拒違天意。久曠神器。則將以無辜。并辜元惡。此所謂禍。福之會。分功之時也。禪猶豫未敢從。會顯敗。瑗坐被斥。門生蘇祇。欲上書言狀。瑗遽止之。時。陳禪為司隸校尉。召瑗謂曰。弟聽祇上書。禪請為之證。瑗曰。此譬猶兒妾屏語耳。願使君勿。復出口。遂辭歸。不復應州郡命。○己卯。以諸王禮葬北鄉侯。○司空劉授。以阿附惡逆。辟召。非其人。策免。○十二月甲申。以少府河南陶敦為司空。○楊震門生虞放。陳翼。詣闕追訟震。事。詔除震二子為郎。贈錢百萬。以禮改葬於華陰潼亭。遠近畢至。有大鳥高丈餘。集震喪前。郡以狀上。帝感震忠。詔復以中牢具祠之。○議郎陳禪。以為閹太后與帝無母子恩。宜徙別。館。絕朝見。羣臣議者咸以為宜。司徒掾汝南周舉。謂李郃曰。昔瞽瞍常欲殺舜。舜事之逾謹。鄭武姜謀殺莊公。莊公誓之黃泉。秦始皇怨母失行。久而隔絕。後感穎考叔茅焦之言。復修。子道。書傳美之。今諸閹新誅。太后幽在離宮。若悲愁生疾。一旦不虞。主上將何以令於天下。如從禪議。後世歸咎明公。宜密表朝廷。令奉太后。率羣臣朝覲。如舊。以厭天心。以答人望。郃。即上疏陳之。

孝順皇帝上

永建元年春正月。帝朝太后於東宮。太后意乃安。○甲寅。赦天下。○辛未。皇太后閹氏崩。○辛巳。太傅馮石。太尉劉熹。以阿黨權貴。免。司徒李郃罷。○二月甲申。葬安思皇后。○丙戌。以太常桓焉為太傅。大鴻臚朱寵為太尉。參錄尚書事。長樂少府朱伉為司徒。○封尚書郭鎮為定穎侯。○隴西鍾羌反。校尉馬賢擊之。戰於臨洮。斬首千餘級。羌眾皆降。由是涼州復安。○六月己亥。封濟南簡王錯子顯為濟南王。○秋七月庚午。以衛尉來歷為車騎將軍。○八月。鮮卑寇代郡。太守李超戰歿。○司隸校尉虞詡到官數月。奏馮石劉熹免之。又劾奏中常侍程璜。陳秉。孟生。李閔等。百官側目。號為苛刻。三公劾奏。詡盛夏多拘繫無辜。為吏民患。詡上書自訟曰。法禁者。俗之隄防。刑罰者。民之銜轡。今州曰任郡。郡曰任縣。更相委遠。百姓怨窮。以苟容為賢。盡節為愚。臣所發舉。臧罪非一。三府恐為臣所奏。遂加誣罪。臣將從史魚死。即以尸諫耳。帝省其章。乃不罪詡。中常侍張防。賣弄權勢。請託受取。詡案之。屢寢不報。詡不勝其憤。乃自繫廷尉。奏言。昔孝安皇帝。任用樊豐。交亂嫡統。幾亡社稷。今者張防。復弄威柄。國家之禍。將重至矣。臣不忍與防同朝。謹自繫以聞。無令臣襲楊震之跡。書奏。防流涕訴帝。詡坐論輸左校。防必欲害之。二日之中。傳考四獄。獄吏勸詡自引。詡曰。寧伏歐刀。以示遠近。暗鳴自殺。是非孰辨邪。浮陽侯孫程。祝阿侯張賢。相率乞見。程曰。陛下始與臣等造事之時。常疾奸臣。知其傾國。今者即位。而復自為。何以非先帝乎。司隸校尉虞詡為陛下盡忠。而更

被拘繫。常侍張防、臧罪明正。反構忠良。今客星守羽林。其占宮中有奸臣。宜急收防送獄。以塞天變。時防立在帝後。程叱防曰。奸臣張防。何不下殿。防不得已。趨就東箱。程曰。陛下急收防。無令從阿母求請。帝問諸尚書。尚書賈朗素與防善。證詔之。帝疑焉。謂程曰。且出。吾方思之。於是詔子顓與門生百餘人。舉幡候中常侍高梵車。叩頭流血。訴言枉狀。梵入言之。防坐徙邊。賈郎等六人。或死或黜。即日赦出。詔程復上書。陳詔有大功。語甚切激。帝感悟。復徵拜議郎。數日。遷尚書僕射。詔上疏。薦議郎南陽左雄曰。臣見方今公卿以下。類多拱默。以樹恩爲賢。盡節爲愚。至相戒曰。白璧不可爲。容容多後福。伏見議郎左雄。有王臣蹇蹇之節。宜擢在喉舌之官。必有匡弼之益。由是拜雄尚書。○浮陽侯孫程等。懷表上殿。爭功。帝怒。有司劾奏程等。干亂悖逆。王國等皆與程黨。久留京都。益其驕恣。帝乃免程等官。悉徙封遠縣。因遣十九侯就國。敕雒陽令。促期發遣。司徒掾周舉。說朱伉曰。朝廷在西鍾下時。非孫程等豈立。今忘其大德。錄其小過。如道路天折。帝有殺功臣之譏。及今未去。宜急表之。伉曰。今詔指方怒。吾獨表此。必致罪譴。舉曰。明公年過八十。位爲台輔。不於今時。竭忠報國。惜身安寵。欲以何求。祿位雖全。必陷佞邪之譏。諫而獲罪。猶有忠貞之名。若舉言不足採。請從此辭。伉乃表諫。帝果從之。程徙封宜城侯。到國。怨恨悲懣。封還印綬符策。亡歸京師。往來山中。詔書追求。復故爵土。賜車馬衣物。遣還國。○冬十月丁亥。司空陶敦免。○朔方以西。障塞多壞。鮮卑因此數侵南匈奴。單于憂恐。上書乞修復。鄯塞庚寅。詔黎陽營兵出屯中山北界。令緣邊郡增置步兵。列屯塞下。教習戰射。○以廷尉張皓爲司空。○班勇更立車師後部。故王子加特奴。爲王。勇又使別校誅斬東且彌王。亦更立其種人爲王。於是車師六國悉平。勇遂發諸國兵。擊匈奴。呼衍王亡走。其衆二萬餘人皆降。生得單于從兄勇。使加特奴手斬之。以結車師匈奴之隙。北單于自將萬餘騎入後部。至金且谷。勇使假司馬曹俊救之。單于引去。俊追斬

其貴人骨都侯。於是呼衍王遂徙居枯梧河上。是後車師無復虜跡。二年春正月。中郎將張國以南單于兵擊鮮卑。其至鞬破之。○二月。遼東鮮卑寇遼東玄菟。烏桓校尉耿舉發緣邊諸郡兵及烏桓。出塞擊之。斬獲甚衆。鮮卑三萬人詣遼東降。○三月。早。○初。帝母李氏。瘞在雒陽北。帝初不知。至是。左右白之。帝乃發哀。親到瘞所。更以禮殯。六月乙酉。追諡爲恭愍皇后。葬于恭陵之北。○西域城郭諸國皆服於漢。唯焉耆王元孟未降。班勇奏請攻之。於是遣敦煌太守張朗將河西四郡兵三千人配勇。因發諸國兵四萬餘人。分爲兩道擊之。勇從南道。朗從北道。約期俱至焉耆。而朗先有罪。欲徵功自贖。遂先期至。爵離關。遣司馬將兵前戰。獲首虜二千餘人。元孟懼誅。逆遣使乞降。張朗逕入焉耆。受降而還。朗得免。誅勇以後。期徵下獄免。○秋七月甲戌朔。日有食之。○壬午。太尉朱寵。司徒朱伉免。庚子。以太常劉光爲太尉。錄尚書事。光祿勳汝南許敬爲司徒。光。矩之弟也。敬仕於和安之間。當竇鄧閻氏之盛。無所屈撓。三家既敗。士大夫多染汚者。獨無謗言。及於敬。當世以此貴之。○初。南陽樊英。少有學行。名著海內。隱於壺山之陽。州郡前後禮請。不應。公卿舉賢良方正有道。皆不行。安帝賜策書徵之。不赴。是歲。帝復以策書玄纁。備禮徵英。英固辭。養疾。月。責郡縣。駕載上道。英不得已。到京。稱疾不肯起。彊輿入殿。猶不能屈。帝使出就太醫。養疾。月。致羊酒。其後。帝乃爲英設壇。詔以爲光祿大夫。賜告歸。令所在送穀。以歲時致牛酒。英辭位不受。官中郎將。數月。英稱疾篤。詔以爲光祿大夫。賜告歸。令所在送穀。以歲時致牛酒。英辭位不受。有詔。譬旨。勿聽。英初被詔命。衆皆以爲必不降志。南郡王逸。素與英善。因與其書。多引古譬諭。勸使就聘。英頓逸議而至。及後應對。無奇謀深策。談者以爲失望。河南張楷與英俱徵。謂英曰。天下有二道。出與處也。吾前以子之出。能輔是君也。濟斯民也。而子始以不訾之身。怒萬乘之主。及其享受爵祿。又不聞匡救之術。進退無所據矣。

臣光曰。古之君子。邦有道則仕。邦無道則隱。隱非君子之所欲也。人莫已知。而道不得行。羣邪共處。而害將及身。故深藏以避之。王者舉逸民。揚仄陋。固爲其有益於國家。非以徇世俗之耳目也。是故有道德足以尊主。智能足以庇民。被褐懷玉。深藏不市。則王者當盡禮而致之。屈己以訪之。克己以從之。然後能利澤施于四表。功烈格于上下。蓋取其道。不取其人。務其實。不務其名也。其或禮備而不至。意勤而不起。則姑內自循省。而不敢彊致。其人曰。豈吾德之薄。而不足慕乎。政之亂。而不可輔乎。羣小在朝。而不敢進乎。誠心不至。而憂其言之不用乎。何賢者之不我從也。苟其德已厚矣。政已治矣。羣小遠矣。誠心至矣。彼將扣關而自售。又安有勤求而不至者哉。荀子曰。耀蟬者。務在明其火。振其木而已。火不明。雖振其木。無益也。今人主有能明其德。則天下歸之。若蟬之歸明火也。或者人主恥不能致。乃至誘之以高位。脅之以嚴刑。使彼誠君子邪。則位非所貪。刑非所畏。終不可得而致也。可致者。皆貪位畏刑之人也。烏足貴哉。若乃孝弟著於家庭。行誼隆於鄉曲。利不苟取。仕不苟進。潔己安分。優游卒歲。雖不足以尊主庇民。是亦清修之吉士也。王者當褒優安養。俾遂其志。若孝昭之待韓福。光武之遇周黨。以勵廉恥。美風俗。斯亦可矣。固不當如范升之詆毀。又不可如張楷之責望也。至于飾僞以邀譽。釣奇以驚俗。不食君祿。而爭屠沽之利。不受小官。而規卿相之位。名與實反。心與迹違。斯乃華士少正卯之流。其得免於聖王之誅。幸矣。尙何聘召之有哉。

時又徵廣漢楊厚。江夏黃瓊。瓊香之子也。厚既至。豫陳漢有三百五十年之厄。以爲戒。拜議郎。瓊將至。李固以書逆遣之曰。君子謂伯夷隘。柳下惠不恭。不夷不惠。可否之間。聖賢居身之所珍也。誠欲枕山棲谷。擬迹巢由。斯則可矣。若當輔政濟民。今其時也。自生民以來。善政少。而亂俗多。必待堯舜之君。此爲士行其志。終無時矣。嘗聞語曰。嶢嶢者易缺。皦皦者易汙。

盛名之下。其實難副。近魯陽樊君被徵。初至。朝廷設壇席。猶待神明。雖無大異。而言行所守。亦無所缺。而毀謗布流。應時折減者。豈非觀聽望深。聲名太盛乎。是故俗論皆言。處士純盜虛聲。願先生弘此遠謨。令衆人歎服。一雪此言耳。瓊至。拜議郎。稍遷尙書僕射。瓊昔隨父在臺閣。習見故事。及後居職。達練官曹。爭議朝堂。莫能抗奪。數上疏言事。上頗采用之。李固。郃之子。少好學。常改易姓名。杖策驅驢。負笈從師。不遠千里。遂究覽墳籍。爲世大儒。每到太學。密入公府。定省父母。不令同業諸生。知其爲郃子也。

三年春正月。丙子。京師地震。○夏六月旱。○秋七月。茂陵園寢災。○九月。鮮卑寇漁陽。○冬十二月己亥。太傅桓焉免。○車騎將軍來歷罷。○南單于拔死。弟休利立。爲去特若尸。遂就單于。○帝悉召孫程等。還京師。

四年春正月。丙寅。赦天下。○丙子。帝加元服。○夏五月壬辰。詔曰。海內頗有災異。朝廷修政。太官減膳。珍玩不御。而桂陽太守文藝。不惟竭忠宣暢本朝。而遠獻大珠。以求幸媚。今封以還之。○五州雨水。○秋八月丁巳。太尉劉光。司空張皓免。○尙書僕射虞詡。上言安定北地上郡山川險阨。沃埜千里。土宜畜牧。水可漑漕。頃遭元元之災。衆羌內潰。郡縣兵荒。二十餘年。夫奔沃壤之饒。捐自然之財。不可謂利。離河山之阻。守無險之處。難以爲固。今三郡未復。園陵單外。而公卿選懦。容頭過身。張解設難。但計所費。不圖其安。宜開聖聽。考行所長。九月。詔復安定北地上郡。還舊土。○癸酉。以大鴻臚龐參爲太尉。祿尙書事。太常王龔爲司空。○冬十一月庚辰。司徒許敬免。○鮮卑寇朔方。○十二月乙卯。以宗正弘農劉崎爲司徒。○是歲。于竇王放前。殺拘彌王興。自立其子。爲拘彌王。而遣使者貢獻。敦煌太守徐由。上求討之。帝赦于竇罪。令歸拘彌國。放前不肯。

五年夏四月。京師旱。○京師及郡國十二蝗。○定遠侯班超之孫始。尙帝姑陰城公主。主驕。

淫無道。始積忿怒。伏刃殺主。冬十月乙亥。始坐腰斬。同產皆棄市。六年春二月庚午。河間孝王開薨。子政嗣。政傲狠不奉法。帝以待御史吳郡沈景有彊能。擢爲河間相。景到國。謁王。王不正服。箕踞殿上。侍郎贊拜。景峙不爲禮。問王所在。虎賁曰。是非王邪。景曰。王不正服。常人何別。今相謁王。豈謁無禮者邪。王慙而更服。景然後拜。出住宮門外。請王傅責之曰。前發京師。陛見受詔。以王不恭。使相檢督。諸君空受爵祿。曾無訓導之義。因奏治其罪。詔書讓政。而詰責傅。景因捕諸奸人。奏案其罪。殺戮尤惡者數十人。出冤獄百餘人。政遂爲改節。悔過自修。○帝以伊吾膏腴之地。傍近西域。匈奴資之。以爲鈔暴。三月辛亥。復令開設屯田。如永元時事。置伊吾司馬一人。○初安帝薄於藝文。博士不復講習。朋徒相視怠散。學舍積敝。鞠爲園蔬。或牧兒蕘薪刈其下。將作大匠翟酺上疏請脩繕。誘進後學。帝從之。秋九月。繕起太學。凡所造構二百四十房。千八百五十室。○護烏桓校尉耿种遣兵擊鮮卑破之。○護羌校尉韓皓轉湟中屯田。置兩河間。以逼羣羌。皓坐事徵。以張掖太守馬續代爲校尉。兩河間羌以屯田近之。恐必見圖。乃解仇詛盟。各自傲備。續上移田還湟中。羌意乃安。○帝欲立皇后。而貴人有寵者四人。莫知所建。議欲探籌以神定選。尙書僕射南郡胡廣與尙書馮翊郭虔史敞上疏諫曰。竊見詔書以立后事大。謙不自專。欲假之籌策。決疑靈神。篇籍所記。祖宗典故。未嘗有也。特神卜筮。既未必當賢。就值其人。猶非德選。夫岐嶷形於自然。倪天必有異表。宜參良家。簡求有德。德同以年。年鈞以貌。稽之典經。斷之聖慮。帝從之。恭懷皇后弟子乘氏侯商之女。選入掖庭。爲貴人。常特被引御。從容辭曰。夫陽以博施爲德。陰以不專爲義。姦斯則百福所由興也。願陛下思雲雨之均澤。小妾得免於罪。帝由是賢之。

陽嘉元年春正月乙巳立貴人梁氏爲皇后○京師旱○三月揚州六郡妖賊章河等寇四

十九縣殺傷長吏○庚寅赦天下改元○夏四月梁商加位特進頃之拜執金吾○冬耿种遣烏桓戎末魔等鈔擊鮮卑大獲而還鮮卑復寇遼東屬國耿种移屯遼東無慮城以拒之○尙書令左雄上疏曰昔宣帝以爲吏數變易則下不安業久於其事則民服教化其有政治者輒以璽書勉勵增秩賜金公卿缺則以次用之是以吏稱其職民安其業漢世良吏於茲爲盛今典城百里轉動無常各懷一切莫慮長久謂殺害不辜爲威風聚斂整辦爲賢能以治己安民爲劣弱奉法循理爲不治髡鉗之戮生於匪皆覆尸之禍成於喜怒視民如寇讐稅之如豺虎監司項背相望與同疾疢見非不舉聞惡不察觀政於亭傳責成於朞月言善不稱德論功不據實虛誕者獲譽拘檢者離毀或因臯而引高或色斯而求名州宰不覆競共辟召踴躍升騰超等踰匹或者奏捕案而亡不受罪會赦行賂復見洗滌朱紫同色清濁不分故使姦猾枉濫輕忽去就拜除如流缺動百數鄉官部吏職賤祿薄車馬衣服一出於民廉者取足貪者充家特選橫調紛紛不絕送迎煩費損政傷民和氣未洽災眚不消咎皆在此臣愚以爲守相長吏惠和有顯效者可就增秩勿移徙非父母喪不得去官其不從法禁不式王命錮之終身雖會赦令不得齒列若被劾奏亡不就法者徙家邊郡以懲其後其鄉部親民之吏皆用儒生清白任從政者寬其負算增其秩祿吏職滿歲宰府州郡乃得辟舉如此威福之路塞虛僞之端絕送迎之役損賦斂之源息循理之吏得成其化率土之民各寧其所矣帝感其言復申無故去官之禁又下有司考吏治眞僞詳所施行而宦官不便終不能行雄又上言孔子曰四十不惑禮稱彊仕請自今孝廉年不滿四十不得察舉皆先詣公府諸生試家法文吏課牋奏副之端門練其虛實以觀異能以美風俗有不承科令者正其罪法若有茂材異行自可不拘年齒帝從之胡廣郭虔史敞上書駁之曰凡選舉因才無拘定制六奇之策不出經學鄭阿之政非必章奏甘奇顯用年乖彊仕終賈揚聲亦在

弱冠。前世以來。貢舉之制。莫或回革。今以一臣之言。剗戾舊章。便利未明。衆心不厭。矯枉變常。政之所重。而不訪台司。不謀卿士。若事下之後。議者剝異。異之則朝失其便。同之則王言已行。臣愚以爲可宣。下百官。參其同異。然後覽擇勝否。詳采厥衷。帝不從。辛卯。初令郡國舉孝廉。限年四十以上。諸生通章句。文吏能牋奏。乃得應選。其有茂才異行。若顏淵子奇。不拘年齒。久之。廣陵所舉孝廉徐淑。年未四十。臺郎詰之。對曰。詔書曰。有如顏回子奇。不拘年齒。是故本郡以臣充選。郎不能屈。左雄詰之曰。顏回。聞一知十。孝廉。聞一知幾邪。淑無以對。乃罷卻之。郡守坐免。

袁宏論曰。夫謀事作制。以經世訓物。必使可爲也。古者四十而仕。非謂彈冠之會。必將是年也。以爲可仕之時。在於彊盛。故舉其大限。以爲民衷。且顏淵子奇。曠代一有。而欲以斯爲格。豈不偏乎。

然雄公直精明。能審覈真僞。決志行之。頃之。胡廣出爲濟陰太守。與諸郡守十餘人。皆坐謬舉免黜。唯汝南陳蕃。潁川李膺。下邳陳球等。三十餘人。得拜郎中。自是。牧守畏慄。莫敢輕舉。迄于永嘉。察選清平。多得其人。○閏月。庚子。恭陵百丈廡災。○上聞北海郎顛。精於陰陽之學。

二年春正月。詔公車徵顛。問以災異。顛上章曰。三公上應台階。下同元首。政失其道。則寒陰反節。今之在位。競託高虛。納累鍾之奉。亡天下之憂。棲遲偃仰。寢疾自逸。被策文。得賜錢。卽復起矣。何疾之易而愈之速。以此消伏災責。興致升平。其可得乎。今選牧守。委任三府。長吏不良。既咎州郡。州郡有失。豈得不歸責舉者。而陛下崇之彌優。自下慢事愈甚。所謂大綱疏小網數。三公非臣之仇。臣非狂夫之作。所以發憤忘食。懇懇不已者。誠念朝廷欲致興平。臣書不擇言。死不敢恨。因條便宜七事。一。園陵火災。宜念百姓之勞。罷繕修之役。二。立春以

後。陰寒失節。宜采納良臣。以助聖化。三。今年少陽之歲。春當旱。夏必有水。宜遵前典。惟節惟約。四。去年八月。熒惑出入軒轅。宜簡出宮女。恣其姻嫁。五。去年閏十月。有白氣從西方天苑趨參左足。入玉井。恐立秋以後。將有羌寇畔戾之患。宜豫告諸郡。嚴爲備禦。六。今月十四日乙卯。白虹貫日。宜令中外官司。竝須立秋。然後考事。七。漢興以來。三百三十九歲。於時三替。宜大蠲法令。有所變更。王者隨天。譬猶自春徂夏。改青服絳也。自文帝省刑。適三百年。而輕微之禁。漸已殷積。王者之法。譬猶江河。當使易避而難犯也。二月。顛復上書。薦黃瓊。李固。以爲宜加擢用。又言。自冬涉春。訖無嘉澤。數有西風。反逆時節。朝廷勞心。廣爲禱祈。薦祭山川。暴龍移市。臣聞。皇天感物。不爲僞動。災變應人。要在責己。若令雨可請降。水可禳止。則歲無隔并。太平可待。然而災害不息者。患不在此也。書奏。特拜郎中。辭病不就。○三月。使匈奴中郎將趙稠。遣從事。將南匈奴兵。出塞擊鮮卑。破之。○初。帝之立也。乳母宋娥。與其謀。帝封娥爲山陽君。又封金吾梁商子冀。爲襄邑侯。尚書令左雄。上封事曰。高帝約。非劉氏不王。非有功不侯。孝安皇帝。封江京王聖等。遂致地震之異。永建二年。封陰謀之功。又有日食之變。數術之士。咸歸咎於封爵。今青州飢虛。盜賊未息。誠不宜追錄小恩。虧失大典。詔不聽。雄復諫曰。臣聞。人君莫不好忠正。而惡讒諛。然而歷世之患。莫不以忠正得罪。讒諛蒙倖者。蓋聽忠難從。諛易也。夫刑罪。人情之所甚惡。貴寵。人情之所甚欲。是以時俗。爲忠者少。而習諛者多。故令人主。數聞其美。稀知其過。迷而不悟。以至於危亡。臣伏見。詔書。顧念阿母舊德。宿恩。欲特加顯賞。案尚書故事。無乳母爵邑之制。唯先帝時。阿母王聖。爲野王君。聖造生讒。賊廢立之禍。生爲天下所咀嚼。死爲海內所歡快。桀紂貴爲天子。而庸僕羞與爲比者。以其無義也。夷齊賤爲匹夫。而王侯爭與爲伍者。以其有德也。今阿母躬蹈儉約。以身率下。羣僚蒸庶。莫不向風。而與王聖。竝同爵號。懼違本操。失其常願。臣愚以爲凡人之心理。不相遠。其所不安。

古今一也。百姓深懲王聖傾覆之禍。民萌之命。危於累卵。常懼時世。復有此類。怵惕之念。未離於心。恐懼之言。未絕於口。乞如前議。歲以千萬。給奉阿母。內足以盡恩愛之歡。外可不爲吏民所怪。梁冀之封。事非機急。宜過災厄之運。然後平議可否。於是冀父商讓還冀封。書十餘上。帝乃從之。夏四月。己亥。京師地震。五月。庚子。詔羣公卿士。各直言厥咎。仍各舉敦樸士一人。左雄復上疏曰。先帝封野王君。漢陽地震。今封山陽君。而京城復震。專政在陰。其災尤大。臣前後誓言。封爵至重。王者可私人以財。不可以官。宜還阿母之封。以塞災異。今冀已高讓。山陽君亦宜崇其本節。雄言切至。娥亦畏恩辭讓。而帝戀戀不能已。卒封之。是時。大司農劉據。以職事被譴。召詣尙書。傳呼促步。又加以捶撲。雄上言。九卿位亞三事。班在大臣。行有佩玉之節。動則有庠序之儀。孝明皇帝。始有撲罰。皆非古典。帝納之。是後。九卿無復捶撲者。○戊午。司空王龔免。六月。辛未。以太常魯國孔扶爲司空。○丁丑。雒陽宣德亭地拆。長八十五丈。帝引公卿所舉敦樸之士。使之對策。及特問以當世之敝。爲政所宜。李固對曰。前孝安皇帝。變亂舊典。封爵阿母。因造妖孽。改亂嫡嗣。至令聖躬狼狽。親遇其艱。既拔自困。殆龍興卽位。天下喁喁。屬望風政。積敝之後。易致中興。誠當沛然。思惟善道。而論者猶云。方今之事。復同於前。臣伏在艸澤。痛心傷臆。實以漢興以來。三百餘年。賢聖相繼。十有八主。豈無阿乳之恩。豈忘貴爵之寵。然上畏天威。俯案經典。知義不可。故不封也。今宋阿母。雖有大功勤謹之德。但加賞賜。足以酬其勞苦。至于裂土開國。實乖舊典。聞阿母禮性謙虛。必有遜讓。陛下宜許其辭國之高。使成萬安之福。夫妃后之家。所以少完全者。豈天性當然。但以爵位尊顯。顯總權柄。天道惡盈。不知自損。故致顛仆。先帝寵遇閻氏。位號太疾。故其受禍。曾不旋踵。老子曰。其進銳者。其退速也。今梁氏。咸爲椒房。禮所不臣。尊以高爵。尙可然也。而子弟羣從。榮顯兼加。永平建初故事。殆不如此。宜令步兵校尉冀。及諸侍中。還居黃門之官。使權去外戚。政

歸國家。豈不休乎。又詔書所以禁侍中尙書中臣子弟。不得爲吏察孝廉者。以其秉威權。容請託故也。而中常侍。在日月之側。聲執振天下。子弟祿任。曾無限極。雖外託謙默。不干州郡。而諂僞之徒。望風進舉。今可爲設常禁。同之中臣。昔館陶公主。爲子求郎。明帝不許。賜錢千萬。所以輕厚賜。重薄位者。爲官人失才。害及百姓也。竊聞長水司馬武宣。開陽城門。候羊廼等。無他功德。初拜便真。此雖小失。而漸壞舊章。先聖法度。所宜堅守。故政教一跌。百年不復。詩云。上帝板板。下民卒瘁。刺周王變祖法度。故使下民將盡病也。今陛下之有尙書。猶天之有北斗也。斗爲天喉舌。尙書亦爲陛下喉舌。斗斟酌元氣。運乎四時。尙書出納王命。賦政四海。權尊執重。責之所歸。若不平心。災眚必至。誠宜審擇其人。以毗聖政。今與陛下共天下者。外則公卿尙書。內則常侍黃門。譬猶一門之內。一家之事。安則共其福慶。危則通其禍敗。刺史二千石。外統職事。內受法則。夫表曲者。景必邪。源清者。流必潔。猶叩樹本。百枝皆動也。由此言之。本朝號令。豈可蹉跌。天下之紀綱。當今之急務也。夫人君之有政。猶水之有隄防。隄防完全。雖遭雨水霖潦。不能爲變。政教一立。暨遭凶年。不足爲憂。誠令隄防穿漏。萬夫同力。不能復救。政教一壞。賢智馳騖。不能復還。今隄防雖堅。漸有孔穴。譬之一人之身。本朝者心腹也。州郡者四支也。心腹痛。則四支不舉。故臣之所憂。在腹心之疾。非四支之患也。苟堅隄防。務政教。先安心腹。整理本朝。雖有寇賊水旱之變。不足介意也。誠令堤防壞漏。心腹有疾。雖無水旱之災。天下固可以憂矣。又宜罷退宦官。去其權重。裁置常侍二人。方直有德者。省事左右。小黃門五人。才智閒雅者。給事殿中。如是。則論者厭塞。升平可致也。扶風功曹馬融對曰。今科條品制。四時禁令。所以承天順民者。備矣。悉矣。不可加矣。然而天猶有不平之效。民猶有咨嗟之怨者。百姓屢聞恩澤之聲。而未見惠和之實也。古之足民者。非能家贍而人足之。量其財用。爲之制度。故嫁娶之禮儉。則婚者以時矣。喪祭之禮約。則終者掩藏矣。不奪

其時則農夫利矣。夫妻子以累其心，產業以重其志，舍此而爲非者，有必不多矣。太史令南陽張衡對曰：「自初舉孝廉，迄今二百歲矣，皆先孝行，行有餘力，治學文法，辛卯詔書以能章句奏案爲限，雖有至孝，猶不應科。此弃本而取末，曾子長於孝，然實魯鈍，文學不若游夏，政事不若冉季，今欲使一人兼之，苟外有可觀，內必有闕，則違選舉孝廉之志矣。且郡國守相剖符寧境，爲國大臣，一旦免黜，十有餘人，吏民罷於送迎之役，新故交際，公私放濫，或臨政爲百姓所便，而以小過免之，是爲奪民父母，使嗟號也。易不遠復，論不憚改，朋友交接，且宿過，況於帝王承天理物，以天下爲公者乎？中間以來，妖星見於上，震裂著於下，天誠詳矣。可爲寒心，明者銷禍於未萌，今既見矣，修政恐懼，則禍轉爲福矣。上覽衆對，以李固爲第一。即時出阿母還舍，諸常侍悉叩頭謝罪。朝廷肅然，以固爲議郎，而阿母宦者皆疾之，詐爲飛章以陷其罪，事從中下。大司農南郡黃尚等請之於梁商，僕射黃瓊復救明其事，久乃得釋。出爲洛令，固弃官歸漢中，融博通經籍，美文辭對奏，亦拜議郎，衡善屬文，通貫六藝，雖才高於世，而無驕尚之情，善機巧，尤致思於天文陰陽歷算，作渾天儀，著靈憲，性恬儉，不慕當世所居之官，輒積年不徙。○太尉龐參在三公中最名忠直，數爲左右所毀，會所舉用忤帝旨，司隸承風案之，時當會茂才孝廉，參以被奏，稱疾不會，廣漢上計掾段恭因會上疏曰：「伏見道路行人，農夫織婦，皆曰：『太尉參竭忠盡節，徒以直道不能曲心，孤立羣邪之間，自處中傷之地，夫以讒佞傷毀忠正，此天地之大禁，人主之至誠也。』昔白起賜死，諸侯酌酒相賀，季子來歸，魯人喜其紓難，夫國以賢治，君以忠安，今天下咸欣陛下有此忠賢，願卒寵任，以安社稷，書奏，詔即遣小黃門視參疾，太醫致羊酒，後參夫人疾，前妻子投於井而殺之，雒陽令祝良奏參罪，秋七月己未，參竟以災異免。○八月己巳，以大鴻臚施延爲太尉。○鮮卑寇馬城，代郡太守擊之，不克，頃之，其至鞬死，鮮卑由是鈔盜差稀。」

資治通鑑卷第五十一

漢紀 孝順皇帝上陽嘉二年

資治通鑑卷第五十一

漢紀四十四

孝順皇帝下

陽嘉三年夏四月車師後部司馬率後王加特奴掩擊北匈奴於閭吾陸谷大破之獲單于母○五月戊戌詔以春夏連旱赦天下上親自露坐德陽殿東廂請雨以尙書周舉才學優深特加策問舉對曰臣聞陰陽閉隔則二氣否塞陛下廢文帝光武之法而循亡秦奢侈之欲內積怨女外有曠夫自枯旱以來彌歷年歲未聞陛下改過之效徒勞至尊暴露風塵誠無益也陛下但務其華不尋其實猶緣木希魚卻行求前誠宜推信革政崇道變惑出後宮不御之女除太官重膳之費易傳曰陽感天不旋日惟陛下留神裁察帝復召舉面問得失舉對以宜慎官人去貪汙遠佞邪帝曰官貪汙佞邪者爲誰乎對曰臣從下州超備機密不足以別羣臣然公卿大臣數有直言者忠貞也阿諛苟容者佞邪也太史令張衡亦上疏言前年京師地震土裂裂者威分震者民擾也竊懼聖思厭倦制不專己恩不忍割與衆共威威不可分德不可共願陛下思惟所以稽古率舊勿使刑德八柄不由天子然後神望允塞災消不至矣衡又以中興之後儒者爭學圖緯上疏言春秋元命包有公輸班與墨翟事見戰國又言別有益州益州之置在於漢世又劉向父子領校祕書閱定九流亦無讖錄則知圖讖成於哀平之際皆虛僞之徒以要世取資欺罔較然莫之糾禁且律歷卦候九宮風角數有徵效世莫肯學而競稱不占之書譬猶畫工惡圖犬馬而好作鬼魅誠以實事難形而

虛僞不窮也宜收藏圖讖一禁絕之則朱紫無所眩典籍無瑕玷矣○秋七月鍾羌良封等復寇隴西漢陽詔拜前校尉馬賢爲謁者鎮撫諸種冬十月護羌校尉馬續遣兵擊良封破之○十一月壬寅司徒劉崎司空孔扶免用周舉之言也乙巳以大司農黃尚爲司徒光祿勳河東王卓爲司空○耿貴人數爲耿氏請帝乃紹封耿寶子箕爲牟平侯○二年丙子初聽中官四年春北匈奴呼衍王侵車師後部帝令敦煌太守發兵救之不利○二月丙子初聽中官得以養子襲爵初帝之復位宦官之力也由是有寵參與政事御史張綱上書曰竊尋文明二帝德化尤盛中官常侍不過兩人近侍賞賜裁滿數金惜費重民故家給人足而頃者以來無功小人皆有官爵非愛民重器承天順道者也書奏不省綱皓之子也○旱○謁者馬賢擊鍾羌大破之○夏四月甲子太尉施延免○戊寅以執金吾梁商爲大將軍故太尉龐參爲太尉商稱疾不起且一年帝使太常桓焉奉策就第卽拜商乃詣闕受命商少通經傳謙恭好士辟漢陽巨覽上黨陳龜爲掾屬李固爲從事中郎楊倫爲長史李固以商柔和自守不能有所整裁乃奏記於商曰數年以來災怪屢見孔子曰智者見變思形愚者觀怪諱名天道無親可爲祇畏誠令王綱一整道行忠立明公踵伯成之高全不朽之譽豈與此外戚凡輩耽榮好位者同日而論哉商不能用○秋閏八月丁亥朔日有食之○冬十月烏桓寇雲中度遼將軍耿舉追擊不利十一月烏桓圍畢於蘭池城發兵數千人救之烏桓乃退○十二月甲寅京師地震

永和元年春正月己巳改元赦天下○冬十月丁亥承福殿火○十一月丙子太尉龐參罷○十二月象林蠻夷反○乙巳以前司空王龔爲太尉龔疾宦官專權上書極言其狀諸黃門使客誣奏龔罪上命龔亟自實李固奏記於梁商曰王公以堅貞之操橫爲讒佞所構衆人聞知莫不歎慄夫三公尊重無詖理訴冤之義纖微感槩輒引分決是以舊典不有大罪

不至重問。王公卒有他變，則朝廷獲害賢之名，羣臣無救護之節矣。語曰：善人在患，饑不及餐，斯其時也。商即言之於帝，事乃得釋。○是歲，以執金吾梁冀為河南尹，冀性嗜酒，逸遊自恣，居職多縱暴非法。父商所親客，雒陽令呂放，以告商，商以讓冀，冀遣人於道刺殺放，而恐商知之，乃推疑放之怨仇，請以放弟禹為雒陽令，使捕之，盡滅其宗親賓客百餘人。○武陵太守上書，以蠻夷率服，可比漢人，增其租賦，議者皆以為可，尚書令虞詡曰：自古聖王，不臣異俗，先帝舊典，貢賦多少，所由來久矣。今猥增之，必有怨叛，計其所得，不償所費，必有後悔。帝不從。○中書郎中蠻夷各爭貢布，非舊約，遂殺鄉吏，舉種反。

二年春，武陵蠻二萬人圍充城，八千人寇夷道。○二月，廣漢屬國都尉擊破白馬羌。○帝遣武陵太守李進擊叛蠻，破平之。進乃簡選良吏，撫循蠻夷，郡境遂安。○三月，司空王卓薨。丁丑，以光祿勳郭虔為司空。○夏四月丙申，京師地震。○五月癸丑，山陽君宋娥坐構姦誣罔收印綬，歸里舍。黃龍楊佗、孟叔、李建、張賢、史汎、王道、李元、李剛等九侯，坐與宋娥更相賂遺，求高官增邑，竝遣就國，減租四分之一。○象林蠻區憐等攻縣寺，殺長吏，交趾刺史樊演發交趾九真兵萬餘人救之，兵士憚遠役。秋七月，二郡兵反攻其府，雖擊破反者，而蠻執轉盛。○冬十月甲申，上行幸長安，扶風田弱薦同郡法真，博通內外學，隱居不仕，宜就加衰職，帝虛心欲致之。前後四徵，終不屈。友人郭正稱之曰：法真名可得聞，身難得而見，逃名而名我隨，避名而名我追，可謂百世之師者矣。真雄之子也。○丁卯，京師地震。○太尉王襲以中常侍張昉等專弄國權，欲奏誅之，宗親有以楊震行事諫之者，襲乃止。○十二月乙亥，上還自長安。

三年春二月乙亥，京師及金城隴西地震。二郡山崩。○夏閏四月己酉，京師地震。○五月吳郡丞羊珍反攻郡府，太守王衡破斬之。○侍御史賈昌與州郡并力討區憐，不尅，為所攻圍。

歲餘，兵穀不繼，帝召公卿百官及四府掾屬，問以方略，皆議遣大將發荆揚兗豫四萬人赴之。李固駁曰：若荆揚無事，發之可也。今二州盜賊盤結不散，武陵南郡蠻夷未輯，長沙桂陽數被徵發，如復擾動，必更生患，其不可一也。又兗豫之人卒被徵發，遠赴萬里，無有還期，詔書迫促，必致叛亡，其不可二也。南州水土溫暑，加有瘴氣，致死亡者十必四五，其不可三也。遠涉萬里，士卒疲勞，比至嶺南，不復堪鬪，其不可四也。軍行三十里為程，而去日南九千餘里，三百日乃到，計人稟五升，用米六十萬斛，不計將吏驢馬之食，但負甲自致，費便若此，其不可五也。設軍所在，死亡必衆，既不足禦敵，當復更發，此為刻割心腹，以補四支，其不可六也。九真日南相去千里，發其吏民，猶尚不堪，何況乃苦四州之卒，以赴萬里之難哉。其不可七也。前中郎將尹就討益州叛羌，益州諺曰：虜來尚可，尹來殺我。後就徵還，以兵付刺史張喬，喬因其將吏旬月之間，破殄寇虜，此發將無益之效。州郡可任之驗也。宜更選有勇略仁惠，任將帥者，以為刺史，太守悉使其往交趾。今日南兵單無穀，守既不足，戰又不能，可一切徙其吏民北依交趾，事靜之後，乃命歸本。還募蠻夷使自相攻，轉輸金帛，以為其資，有能反間致頭首者，許以封侯裂土之賞。故并州刺史長沙祝良，性多勇決，又南陽張喬前在益州，有破虜之功，皆可任用。昔太宗就加魏尚為雲中守，哀帝即拜龔舍為泰山守，宜即拜良等便道之官，四府悉從固議，即拜祝良為九真太守，張喬為交趾刺史，喬至，開示慰誘，竝皆降散。良到九真，單車入賊中，設方略，招以威信，降者數萬人，皆為良築起府寺，由是嶺外復平。○秋八月己未，司徒黃尚免。九月己酉，以光祿勳長沙劉壽為司徒。○丙戌，令大將軍三公舉剛毅武猛，謀謨任將帥者各二人，特進卿校尉各一人，初尚書令左雄薦冀州刺史周舉為尚書，既而雄為司隸校尉，舉故冀州刺史馮直任將帥，直嘗坐臧受罪，舉以此劾奏，雄曰：詔書使我選武猛，不使我選清高，舉曰：詔書使君選武猛，不使君選貪汙也。雄曰：進君適

所以自伐也。舉曰：昔趙宣子任韓厥為司馬，厥以軍法戮宣子僕，宣子謂諸大夫曰：「可賀我矣。吾選厥也，任其事。今君不以舉之不才，誤升諸朝，不敢阿君以爲君羞，不寤君之意，與宣子殊也。」雄悅，謝曰：「吾嘗事馮直之父，又與直善，今宣光以此奏吾，是吾之過也。天下益以此賢之。」是時，宦官競賣恩勢，唯大長秋良賀清儉退厚，及詔舉武猛，賀獨無所薦。帝問其故，對曰：「臣生自草茅，長於宮掖，既無知人之明，又未嘗交加士類，昔衛鞅因景監以見，有識知其不終，今得臣舉者，匪榮伊辱，是以不敢。帝由是賞之。」○冬十月，燒當羌那離等三千餘騎寇金城，校尉馬賢擊破之。○十二月，戊戌朔，日有食之。○大將軍商以小黃門南陽曹節等用事於中，遣子冀不疑與爲交友，而宦官忌其寵，反欲陷之。中常侍張達、蓬政、楊定等與左右連謀，共譖商。及中常侍曹騰、孟賁云：「欲徵諸王子，圖議廢立，請收商等案罪。」帝曰：「大將軍父子，我所親，騰賁我所愛，必無是。但汝曹共妒之耳。」達等知言不用，懼迫，遂出，矯詔收縛騰賁於省中。帝聞震怒，敕宦者李歙急呼騰賁釋之，收達等下獄。

四年春正月，庚辰，達等伏誅。事連弘農太守張鳳、安平相楊皓，皆坐死。辭所連染，延及在位大臣，商懼多侵枉，乃上疏曰：「春秋之義，功在元帥，罪止首惡，大獄一起，無辜者衆。死囚久繫，織微成大，非所以順迎和氣，平政成化也。宜早訖竟，以止逮捕之煩。」帝納之，罪止坐者。二月，帝以商少子虎賁中郎將不疑爲步兵校尉，商上書辭曰：「不疑童孺，猥處成人之位，昔晏平仲辭都殿以守其富，公儀休不受魚殮以定其位，臣雖不才，亦願固福祿於聖世。」上乃以不疑爲侍中奉車都尉。○三月乙亥，京師地震。○燒當羌那離等復反。夏四月癸卯，護羌校尉馬賢討斬之，獲首虜千二百餘級。○戊午，赦天下。○五月戊辰，封故濟北惠王壽子安爲濟北王。○秋八月，太原旱。

五年春二月，戊申，京師地震。○南匈奴句龍王吾斯、車紐等反，寇西河，招誘右賢王，合兵圍美稷，殺朔方代郡長吏夏五月，度遼將軍馬續與中郎將梁竝等發邊兵及羌胡合二萬餘人，掩擊破之。吾斯等復更屯聚，攻沒城邑。天子遣使責讓單于，單于本不預謀，乃脫帽避帳，詣竝謝罪，竝以病徵。五原太守陳龜代爲中郎將，龜以單于不能制下，逼迫單于及其弟左賢王皆令自殺。龜又欲徙單于近親於內郡，而降者遂更狐疑，龜坐下獄免。大將軍商上表曰：「匈奴寇畔，自知罪極，窮鳥困獸，皆知救死，況種類繁熾，不可單盡。今轉運日增，三軍疲苦，虛內給外，非中國之利。度遼將軍馬續素有謀謨，且典邊日久，深曉兵要，每得續書，與臣策合。宜令續深溝高壘，以恩信招降，宣示購賞，明爲期約。如此則醜類可服，國家無事矣。」帝從之。乃詔續招降畔虜，商又移書續等曰：「中國安寧，忘戰日久，良騎夜合，交鋒接矢，決勝當時，戎狄之所長，而中國之所短也。疆弩乘城，堅營固守，以待其衰，中國之所長，而戎狄之所短也。宜務先所長，而觀其變，設購開賞，宣示反悔，勿貪小功，以亂大謀。於是右賢王部抑鞬等萬三千口，皆詣續降。○己丑晦，日有食之。○初，那離等既平，朝廷以來機爲并州刺史，劉秉爲涼州刺史，機等天性虐刻，多所擾發，且凍傳難種羌，遂反攻金城，與雜種羌胡大寇三輔，殺害長吏，機等竝坐徵。於是拜馬賢爲征西將軍，以騎都尉耿叔爲副將，左右羽林五校士及諸州郡兵十萬人屯漢陽。○九月，令扶風漢陽築隴道塢三百所，置屯兵。○辛未，太尉王龔以老病罷。○且凍羌寇武都，燒隴關。○壬午，以太常桓焉爲太尉。○匈奴句龍王吾斯等立車紐爲單于，東引烏桓，西收羌胡等數萬人，攻破京兆虎牙營，殺上郡都尉，及軍司馬，遂寇掠并涼幽冀四州，乃徙西河，治離石。上郡治夏陽，朔方治五原，十二月，遣使匈奴，中郎將張耿將幽州烏桓諸郡營兵擊車紐等，戰於馬邑，斬首三千級，獲生口甚衆，車紐乞降，而吾斯猶率其部曲與烏桓寇鈔。○初，上命馬賢討西羌，大將軍商以爲賢老，不如太中大夫宋漢，帝不從。漢由之子也，賢到軍，稽留不進，武都太守馬融上疏曰：「今雜種諸羌轉相鈔盜，宜

及其未并。亟遣深入。破其支黨。而馬賢等處處留滯。羌胡百里望塵。千里聽聲。今逃匿避回。漏出其後。則必侵寇。三輔爲民大害。臣願請賢所不可用。關東兵五千。裁假部隊之號。盡力率厲。埋根行首。以先吏士。三旬之中。必克破之。臣又聞吳起爲將。暑不張蓋。寒不披裘。今賢野次垂幕。珍肴雜選。兒子侍妾。事與古反。臣懼賢等專守一城。賢攻於西。而羌出於東。且其將士。將不堪命。必有高克潰叛之變也。安定人皇甫規亦見賢不恤軍事。審其必敗。上書言狀。朝廷皆不從。

六年春正月丙子。征西將軍馬賢與且凍羌戰于射姑山。賢軍敗。賢及二子皆沒。東西羌遂大合。閏月。鞏唐羌寇隴西。遂及三輔。燒園陵。殺掠吏民。○二月丁巳。有星孛于營室。○三月。上巳。大將軍商大會賓客。讌于雒水。酒闌。繼以蠶露之歌。從事中郎周舉聞之。歎曰。此所謂哀樂失時。非其所也。殃將及乎。○武都太守趙冲追擊鞏唐羌。斬首四百餘級。降二千餘人。詔冲督河西四郡兵。爲節度。安定上計掾皇甫規上疏曰。臣比年以來。數陳便宜。羌戎未動。策其將反。馬賢始出。知其必敗。誤中之言。在可考校。臣每惟賢等擁衆四年。未有成功。縣師之費。且百億計。出於平民。回入姦吏。故江湖之人。羣爲盜賊。青徐荒饑。糧負流散。夫羌戎潰叛。不由承平。皆因邊將失於綏御。乘常守安。則加侵暴。苟競小利。則致大害。微勝則虛張首級。軍敗則隱匿不言。軍士勞怨。困於猾吏。進不得快戰。以徵功。退不得溫飽。以全命。餓死溝渠。暴骨中原。徒見王師之出。不聞振旅之聲。會豪泣血。驚懼生變。是以安不能久。叛則經年。臣所以搏手扣心。而增歎者也。願假臣兩營二郡屯列坐食之兵五千。出其不意。與趙冲共相首尾。土地山谷。臣所曉習。兵勢巧便。臣已更之。可不煩方寸之印。尺帛之賜。高可以滌患。下可以納降。若謂臣年少官輕。不足用者。凡諸敗將。非官爵之不高。年齒之不邁。臣不勝至誠。沒死自陳。帝不能用。○庚子。司空郭虔免。丙午。以太僕趙戒爲司空。○夏。使匈奴中郎將

張耽度遼將軍馬續率鮮卑到穀城擊烏桓於通天山大破之○鞏唐羌寇北地北地太守賈福與趙冲擊之不利○秋八月乘氏忠侯梁商病篤敕子冀等曰吾生無以輔益朝廷死何可耗費帑藏衣衾飯含玉匣珠貝之屬何益朽骨百僚勞擾紛華道路祇增塵垢耳宜皆辭之丙辰薨帝親臨喪諸子欲從其誨朝廷不聽賜以東園祕器銀鏤黃腸玉匣及葬賜輕車介士中宮親送帝幸宣陽亭瞻望車騎壬戌以河南尹乘氏侯梁冀爲大將軍冀弟侍中不疑爲河南尹

臣光曰成帝不能選任賢俊委政舅家可謂闇矣猶知王立之不材棄而不用順帝援大柄授之后族梁冀頑嚚凶暴著於平昔而使之繼父之位終於悖逆蕩覆漢室校於成帝闇又甚焉

初梁商病篤帝親臨幸問以遺言對曰臣從事中郎周舉清高忠正可重任也由是拜舉諫議大夫○九月諸羌寇武威○辛亥晦日有食之○冬十月癸丑以羌寇充斥涼部震恐復徙安定居扶風北地居馮翊十一月庚子以執金吾張喬行車騎將軍事將兵萬五千人屯三輔○荊州盜賊起彌年不定以大將軍從事中郎李固爲荊州刺史固到遣吏勞問境內赦寇盜前釁與之更始於是賊帥夏密等率其魁黨六百餘人自縛歸首固皆原之遣還自相招集開示威法半歲間餘類悉降州內清平奏南陽太守高賜等臧穢賜等重賂大將軍梁冀冀爲之千里移檄而固持之愈急冀遂徙固爲泰山太守時泰山盜賊屯聚歷年郡兵常千人追討不能制固到悉罷遣歸農但選留任戰者百餘人以恩信招誘之未滿歲賊皆弭散

漢安元年春正月癸巳赦天下改元○秋八月南匈奴句龍吾斯與莫鞬臺耆等復反寇掠并部○丁卯遣侍中河內杜喬周舉守光祿大夫周栩馮羨魏郡樂巴張綱郭遵劉班分行

州郡表賢良顯忠勤其貪汙有罪者刺史二千石驛馬上之墨綬以下便輒收舉喬等受命之外戚蒙恩居阿衡之任而專肆貪叨縱恣無極謹條其無君之心十五事斯皆臣子所切齒者也書御京師震竦時皇后寵方盛諸梁姻戚滿朝帝雖知綱言直不能用也杜喬至兗州表奏泰山太守李固政爲天下第一上徵固爲將作大匠八使所劾奏多梁冀及宦者親黨互爲請救事皆寢遏侍御史河南种嵩疾之復行案舉廷尉吳雄將作大匠李固亦上言八使所糾宜急誅罰帝乃更下八使奏章令考正其罪梁冀恨張綱思有以中傷之時廣陵賊張嬰寇亂楊徐間積十餘年二千石不能制冀乃以綱爲廣陵太守前太守率多求兵馬綱獨單車之職既到徑詣嬰壘門嬰大驚遽走閉壘綱於門罷遣吏民獨留所親者十餘人以書喻嬰請與相見嬰見綱至誠乃出拜謁綱延置上坐譬之曰前後二千石多肆貪暴故致公等懷憤相聚二千石信有罪矣然爲之者又非義也今主上仁聖欲以恩德服叛故遣太守來思以爵祿相榮不願以刑罰相加今誠轉禍爲福之時也若聞義不服天子赫然震怒荆揚兗豫大兵雲合身首橫分血嗣俱絕二者利害公其深計之嬰聞泣下曰荒裔愚民不能自通朝廷不堪侵枉遂復相聚偷生若魚游釜中知其不可久且以喘息須臾間耳今聞明府之言乃嬰等更生之辰也乃辭還營明日將所部萬餘人與妻子面縛歸降綱單車入嬰壘大會置酒爲樂散遣部衆任從所之親爲卜居宅相田疇子弟欲爲吏者皆引召之人情悅服南州晏然朝廷論功當封梁冀退之在郡一歲卒張嬰等五百餘人爲之制服行喪送到健爲負土成墳詔拜其子續爲郎中賜錢百萬是時二千石長吏有能政者有雒陽令任峻冀州刺史京兆蘇章膠東相陳留吳祐雒陽令自王渙之後皆不稱職峻能選用文武吏各盡其用發姦不旋踵民間不畏吏其威禁猛於渙而文理政教不如也章爲冀州刺

史有故人爲清河太守章行部欲案其姦賊乃請太守爲設酒肴陳平生之好甚歡太守喜曰人皆有一天我獨有二天章曰今夕蘇孺文與故人飲者私恩也明日冀州刺史案事者公法也遂舉正其罪州境肅然後以摧折權豪忤旨坐免時天下日敝民多愁苦論者日夜稱章朝廷遂不能復用也祐爲膠東相政崇仁簡民不忍欺嗇夫孫性私賦民錢市衣以進其父父得而怒曰有君如是何忍欺之促歸伏罪性慙懼詣閣持衣自首祐屏左右問其故性具談父言祐曰掾以親故受汙穢之名所謂觀過斯知仁矣使歸謝其父還以衣遺之○冬十月辛未太尉桓焉司徒劉壽免○罕羌邑落五千餘戶詣趙冲降唯燒何種據參繚未下甲戌罷張喬軍屯○十一月壬午以司隸校尉下邳趙峻爲太尉大司農胡廣爲司徒○二年夏四月庚戌護羌校尉趙冲與漢陽太守張貢擊燒當羌於參繚破之○六月丙寅立南匈奴守義王兜樓儲爲呼蘭若尸逐就單于時兜樓儲在京師上親臨軒授璽綬引上殿賜車馬器服金帛甚厚詔太常大鴻臚與諸國侍子於廣陽門外祖會饗賜作樂角抵百戲○冬閏十月趙冲擊燒當羌於阿陽破之○十一月使匈奴中郎將扶風馬寔遣人刺殺句龍吾斯○涼州自九月以來地百八十震山谷坼裂壞敗城寺民壓死者甚衆○尙書令黃瓊以前左雄所上孝廉之選專用儒學文吏於取士之義猶有所遺乃奏增孝悌及能從政爲四科帝從之

建康元年春護羌從事馬玄爲諸羌所誘將羌衆亡出塞領護羌校尉衛琚追擊玄等斬首八百餘級趙冲復追叛羌到建威鷓陰河軍度竟所將降胡六百餘人叛走冲將數百人追之遇羌伏兵與戰而歿冲雖死而前後多所斬獲羌遂衰耗詔封冲子爲義陽亭侯○夏四月使匈奴中郎將馬寔擊南匈奴左部破之於是胡羌烏桓悉詣寔降○辛巳立皇子炳爲太子改元赦天下太子居承光宮帝使侍御史种嵩監太子家中常侍高梵從中單駕出迎

太子時太傅杜喬等疑不欲從而未決。嵩乃手劍當車曰：太子國之儲副，人命所係，今常侍來，無詔信，何以知非姦邪？今日有死而已，梵辭屈，不敢對。馳還奏之，詔報太子乃得去。喬退而歎息，愧嵩臨事不惑，帝亦嘉其持重，稱善者良久。○揚徐盜賊羣起，盤互連歲。秋八月，九江范容、周生等寇掠城邑，屯據歷陽，為江淮巨患。遣御史中丞馮緄督州兵討之。○庚午，帝崩于玉堂前殿。太子即皇帝位，年二歲。尊皇后曰皇太后，太后臨朝。丁丑，以太尉趙峻為太傅，大司農李固為太尉，參錄尚書事。○九月丙午，葬孝順皇帝于憲陵，廟曰敬宗。○是日，京師及太原、鴈門地震。○庚戌，詔舉賢良方正之士策問之。皇甫規對曰：伏惟孝順皇帝初勤王政，網四方，幾以獲安，後遭姦僞，威分近習，受賂賣爵，賓客交錯，天下擾擾，從亂如歸，官民竝竭，上下窮虛，陛下體兼乾坤，聰哲純茂，攝政之初，拔用忠貞，其餘維綱，多所改正，遠近翕然，望見太平，而災異不息，寇賊縱橫，殆以姦臣權重之所致也。其常侍尤無狀者，宜亟黜遣，披掃凶黨，收入財賄，以塞痛怨，以答天誠。大將軍冀、河南尹不疑，亦宜增脩謙節，輔以儒術，省去遊娛，不急之務，割減廬第，無益之飾。夫君者舟也，民者水也，羣臣乘舟者也，將軍兄弟操楫者也。若能平志畢力，以度元元，所謂福也。如其怠弛，將淪波濤，可不慎乎？夫德不稱祿，猶鑿墉之趾，以益其高，豈量力審功，安固之道哉？凡諸宿猾、酒徒、戲客，皆宜貶斥，以懲不軌。令冀等深思得賢之福，失人之累，梁冀忿之，以規為下第，拜郎中，託疾免歸。州郡承冀旨，幾陷死者再三。遂沈廢於家，積十餘年。○揚州刺史尹耀、九江太守鄧顯討范容等於歷陽，敗歿。○冬十月，日南蠻夷復反，攻燒縣邑，交趾刺史九江夏方招誘降之。○十一月，九江盜賊徐鳳、馬勉攻燒城邑，鳳稱無上將軍，勉稱皇帝，築營於當塗山中，建年號，置百官。○十二月，九江賊黃虎等攻合肥。○是歲，羣盜發憲陵。

孝冲皇帝

永嘉元年春正月戊戌，帝崩于玉堂前殿。梁太后以揚徐盜賊方盛，欲須所徵諸王侯到，乃發喪。太尉李固曰：帝雖幼少，猶天下之父，今日崩亡，人神感動，豈有人子反共掩匿乎？昔秦皇沙丘之謀，及近日北鄉之事，皆秘不發，喪此天下大忌，不可之甚者也。太后從之，即暮發喪，徵清河王蒜及渤海孝王鴻之子續，皆至京師。蒜父曰清河恭王延平，延平及鴻皆樂安夷王寵之子，千乘貞王伉之孫也。清河王為人嚴重，動止有法度，公卿皆歸心焉。李固謂大將軍冀曰：今當立帝，宜擇長年高明有德，任親政事者。願將軍審詳大計，察周霍之立文宣，戒鄧閻之利幼弱。冀不從，與太后定策禁中。丙辰，冀持節以王青蓋車，迎續入南宮。丁巳，封為建平侯。其日，即皇帝位，年八歲，蒜罷歸國。○將卜山陵，李固曰：今處處寇賊，軍興費廣，新創憲陵，賦發非一，帝尚幼小，可起陵於憲陵塋內，依康陵制度。太后從之。己未，葬孝冲皇帝於懷陵。○太后委政宰輔，李固所言，太后多從之。宦官為惡者，一皆斥遣。天下咸望治平，而梁冀深忌疾之。初，順帝時，所除官多不以次，及固在事，奏免百餘人。此等既怨，又希望冀旨，遂共作飛章，誣奏固曰：太尉李固因公假私，依正行邪，離間近戚，自隆支黨，大行在殯，路人掩涕，固獨胡粉飾貌，搔頭弄姿，槃旋偃仰，從容治步，曾無慘怛傷悼之心。山陵未成，違矯舊政，善則稱己，過則歸君，斥逐近臣，不得侍送，作威作福，莫固之甚矣。夫子罪莫大於累父，臣惡莫深於毀君。固之過，事合誅辟。書奏，冀以白太后，使下其書。太后不聽。○廣陵賊張嬰復聚眾數千人，反據廣陵。○二月乙酉，赦天下。○西羌叛亂積年，費用八十餘億，諸將多斷盜牢，稟私自潤入，皆以珍寶貨賂左右。上下放縱，不恤軍事，士卒不得其死者，白骨相望於野。左馮翊梁竝以恩信招誘叛羌，離蒲狐奴等五萬餘戶，皆詣竝降。隴右復平。○太后以徐

揚盜賊益熾。博求將帥。三公舉涿令北海滕撫。有文武才。詔拜撫九江都尉。與中郎將趙序助馮緄合州郡兵數萬人共討之。又廣開賞募。錢邑各有差。又議遣太尉李固未及行。三月。撫等進擊衆賊。大破之。斬馬勉。范容。周生等千五百級。徐鳳以餘衆燒東城縣。夏五月。下邳人謝安應募。率其宗親。設伏擊鳳。斬之。封安爲平鄉侯。拜滕撫中郎將。督揚徐二州事。丙辰。詔曰。孝殤皇帝卽位踰年。君臣禮成。孝安皇帝承襲統業。而前世遂令恭陵在康陵之上。先後相踰。失其次序。今其正之。○六月。鮮卑寇代郡。○秋。廬江盜賊攻尋陽。又攻盱台。滕撫遣司馬王章擊破之。○九月。庚戌。太傅趙峻薨。○滕撫進擊張嬰。冬十一月。丙午。破嬰。斬獲千餘人。丁未。中郎將趙序坐畏懦。詐增首級。棄市。○歷陽賊華孟。自稱黑帝。攻殺九江太守楊岑。滕撫進擊破之。斬孟等三千八百級。虜獲七百餘人。於是東南悉平。振旅而還。以撫爲左馮翊。○永昌太守劉君世鑄黃金爲文蛇。以獻大將軍冀。益州刺史种暹糾發逮捕。馳傳上言。冀由是恨暹。會巴郡人服直聚黨數百人。自稱天王。暹與太守應承討捕。不克。吏民多被傷害。冀因此陷之。傳逮暹承。李固上疏曰。臣伏聞討捕所傷。本非暹承之意。實由縣吏懼法畏罪。迫逐深苦。致此不詳。比盜賊羣起。處處未絕。暹承以首舉大姦。而相隨受罪。臣恐沮傷州縣糾發之意。更共飾匿。莫復盡心。太后省奏。乃赦暹承罪。免官而已。金蛇輸司農。冀從大司農杜喬借觀之。喬不肯與。冀小女死。令公卿會喪。喬獨不往。冀由是銜之。

資治通鑑卷第五十二

資治通鑑卷第五十三

漢紀四十五

孝質皇帝

本初元年。夏四月。庚辰。令郡國舉明經詣太學。自大將軍以下。皆遣子受業。歲滿課試。拜官有差。又千石。六百石。四府掾屬。三署郎。四姓小侯。先能通經者。各令隨家法。其高第者。上名牒。當以次賞進。自是遊學增盛。至三萬餘生。○五月。庚寅。徙樂安王鴻爲勃海王。○海水溢。漂沒民居。○六月。丁巳。赦天下。○帝少而聰慧。嘗因朝會。目梁冀曰。此跋扈將軍也。冀聞。深惡之。閏月。甲申。冀使左右置毒於羹餅。而進之。帝苦煩盛。使促召太尉李固。固入。前問帝得患所由。帝尙能言。曰。食羹餅。今腹中悶。得水尙可活。時冀亦在側。曰。恐吐不可飲水。語未絕。而崩。固伏尸號哭。推舉侍醫。冀慮其事泄。大惡之。將議立嗣。固與司徒胡廣。司空趙戒。先與冀書曰。天下不幸。頻年之間。國祚三絕。今當立帝。天下重器。誠知太后垂心。將軍勞慮。詳擇其人。務存聖明。然愚情眷眷。竊獨有懷。遠尋先世。廢立舊儀。近見國家。踐祚前事。未嘗不詢訪公卿。廣求羣議。令上應天心。下合衆望。傳曰。以天下與人易。爲天下得人難。昔昌邑之立。昏亂日滋。霍光憂愧。發憤。悔之折骨。自非博陸忠勇。延年奮發。大漢之祀。幾將傾矣。至憂至重。可不熟慮。悠悠萬事。唯此爲大。國之興衰。在此一舉。冀得書。乃召三公。中二千石。列侯。大議所立。固。廣。戒。及大鴻臚。杜喬。皆以爲清河王蒜。明德著聞。又屬最尊親。宜立爲嗣。朝廷莫不歸心。而中常侍曹騰。嘗謁蒜。蒜不爲禮。宦者由此惡之。初。平原王翼。既貶歸河間。其父請。

分蠶吾縣以侯之。順帝許之。翼卒子志嗣。梁太后欲以女弟妻志。徵到夏門亭。會帝崩。梁冀欲立志。衆論既異。憤憤不得意。而未有以相奪。曹騰等聞之。夜往說冀曰。將軍累世有椒房之親。秉攝萬機。賓客縱橫。多有過差。清河王嚴明。若果立。則將軍受禍不久矣。不如立蠶吾侯。富貴可長保也。冀然其言。明日。重會公卿。冀意氣凶。言辭激切。自胡廣趙戒以下。莫不懼憚。皆曰。惟大將軍令。獨李固杜喬堅守本議。冀厲聲曰。罷會。固猶望衆心可立。復以書勸冀。冀愈激怒。丁亥。冀說太后。先策免固。戊子。以司徒胡廣爲太尉。司空趙戒爲司徒。與大將軍冀參錄尚書事。太僕袁湯爲司空。湯安之孫也。庚寅。使大將軍冀持節。以王青蓋車迎蠶吾侯志入南宮。其日。卽皇帝位。時年十五。太后猶臨朝政。○秋七月乙卯。葬孝質皇帝於靜陵。○大將軍掾朱穆奏記勸戒梁冀曰。明年丁亥之歲。刑德合於乾位。易經龍戰之會。陽道將勝。陰道將負。願將軍專心公朝。割除私欲。廣求賢能。斥遠佞惡。爲皇帝置師傅。得小心忠篤敦禮之士。將軍與之俱入。參勸講授。師賢法古。此猶倚南山。坐平原也。誰能傾之。議郎大夫之位。本以式序儒術。高行之士。今多非其人。九卿之中。亦有乖其任者。惟將軍察焉。又薦種嵩樂巴等。冀不能用。穆暉之孫也。○九月戊戌。追尊河間孝王爲孝穆皇。夫人趙氏曰孝穆后。廟曰清廟。陵曰樂成陵。蠶吾先侯曰孝崇皇。廟曰烈廟。陵曰博陵。皆置令丞。使司徒持節奉策書璽綬。祠以太牢。○冬十月甲午。尊帝母區氏爲博園貴人。○滕撫性方直。不交權勢。爲宦官所惡。論討賊功。當封太尉。胡廣承旨奏黜之。卒於家。

孝桓皇帝上之上

建和元年春正月辛亥朔日有食之。○戊午赦天下。○三月龍見譙。○夏四月庚寅京師地震。○立阜陵王代兄勃適亭侯便爲阜陵王。○六月太尉胡廣罷。光祿勳杜喬爲太尉。自李

固之廢朝野喪氣。羣臣側足而立。唯喬正色無所回撓。由是朝野皆倚望焉。○秋七月渤海孝王鴻薨。無子。太后立帝弟蠶吾侯惲爲渤海王。以奉鴻祀。○詔以定策功。益封梁冀萬三千戶。封冀弟不疑爲潁陽侯。蒙爲西平侯。冀子胤爲襄邑侯。胡廣爲安樂侯。趙戒爲廚亭侯。袁湯爲安國侯。又封中常侍劉廣等皆爲列侯。杜喬諫曰。古之明君皆以用賢賞罰爲務。失國之主。其朝豈無貞幹之臣。典誥之篇哉。患得賢不用。其謀韜書不施。其教聞善不信。其義聽讒不審。其理也。陛下自藩臣卽位。天人屬心。不急忠賢之禮。而先左右之封。梁氏一門。宦者微孽。竝帶無功之紱。裂勞臣之士。其爲乖濫。胡可勝言。夫有功不賞。爲善失其望。姦回不詰。爲惡肆其凶。故陳資斧。而人靡畏。班爵位。而物無勸。苟遂斯道。豈伊傷政爲亂而已。喪身亡國。可不慎哉。書奏。不省。○八月乙未。立皇后梁氏。梁冀欲以厚禮迎之。杜喬據執舊典。不聽。冀屬喬舉汜宮爲尚書。喬以宮爲臧罪。不用。由是日忤於冀。九月丁卯。京師地震。喬以災異策免。冬十月。以司徒趙戒爲太尉。司空袁湯爲司徒。前太尉胡廣爲司空。○宦者唐衡。左悺。共譖杜喬於帝。曰。陛下前當卽位。喬與李固抗議。以爲不堪。奉漢宗祀。帝亦怨之。十一月。清河劉文。與南郡妖賊劉鮪交通。妄言清河王當統天下。欲共立。恭事覺。文等遂劫清河相謝嵩。曰。當立王爲天子。以嵩爲公。嵩罵之。文刺殺嵩。於是捕文鮪誅之。有司劾奏。恭坐貶爵。爲尉氏侯。徙桂陽。自殺。梁冀因誣李固杜喬。云與文鮪等交通。請逮按罪。太后素知喬忠。不許。冀遂收固下獄。門生渤海王調。貫械。上書證固之枉。河內趙承等數十人。亦要鈇鑕詣闕。通訴。太后詔赦之。及出獄。京師市里。皆稱萬歲。冀聞之。大驚。畏固名德。終爲己害。乃更據奏前事。大將軍長史吳祐。傷固之枉。與冀爭之。冀怒不從。從事中郎馬融。主爲冀作章表。融時在坐。祐謂融曰。李公之罪。成於卿手。李公若誅。卿何面目視天下人。冀怒起入室。祐亦徑去。固遂死於獄中。臨命。與胡廣趙戒書曰。固受國厚恩。是以竭其股肱。不顧死亡。志欲扶持王

室比隆文宣何圖一朝梁氏迷謬公等曲從以吉爲凶成事爲敗乎漢家衰微從此始矣公等受主厚祿顧而不扶傾覆大事後之良史豈有所私固身已矣於義得矣夫復何言廣戒得書悲慙皆長歎流涕而已冀使人脅杜喬曰早從宜妻子可得全喬不肯明日冀遣騎至其門不聞哭者遂自太后收繫之亦死獄中冀暴固喬尸於城北四衢令有敢臨者加其罪固弟子汝南郭亮尙未冠左提章鉞右秉鈇鑕詣闕上書乞收固尸不報與南陽董班俱往臨哭守喪不去夏門亭長呵之曰卿曹何等腐生公犯詔書欲干試有司乎亮曰義之所動豈知性命何爲以死相懼邪太后聞之皆赦不誅杜喬故掾陳留楊匡號泣星行到雒陽著故赤幘託爲夏門亭吏守護尸喪積十二日都官從事執之以聞太后赦之匡因詣闕上書竝乞李杜二公骸骨使得歸葬太后許之匡送喬喪還家葬訖行服遂與郭亮董班皆隱匿終身不仕梁冀出吳祐爲河間相祐自免歸卒於家冀以劉鮪之亂思朱穆之言於是請種嵩爲從事中郎薦欒巴爲議郎舉穆高第爲侍御史○是歲南單于兜樓儲死伊陵尸逐就單于車兒立

二年春正月甲子帝加元服庚午赦天下○三月戊辰帝從皇太后幸大將軍冀府○白馬羌寇廣漢屬國殺長吏益州刺史率板楯蠻討破之○夏四月丙子封帝弟顯爲平原王奉孝崇皇祀尊孝崇皇夫人爲孝崇園貴人○五月癸丑北宮掖庭中德陽殿及左掖門火車駕移幸南宮○六月改清河爲甘陵立安平孝王得子經侯理爲甘陵王奉孝德皇祀○秋七月京師大水○三年夏四月丁卯晦日有食之○秋八月乙丑有星孛于天市○京師大水○九月己卯地震庚寅地又震○郡國五山崩○冬十月太尉趙戒免以司徒袁湯爲大尉大司農河內張歆爲司徒○是歲前朗陵侯相荀淑卒淑少博學有高行當世名賢李固李膺皆師宗之在

朗陵蒞事明治稱爲神君有子八人儉緝靖養汪爽肅竝有名稱時人謂之八龍所居里舊名西豪穎陰令渤海苑康以爲昔高陽氏有才子八人更名其里曰高陽里膺性簡亢無所交接唯以淑爲師以同郡陳寔爲友荀爽嘗就謁膺因爲其御既還喜曰今日乃得御李君矣其見慕如此陳寔出於單微爲郡西門亭長同郡鍾皓以篤行稱前後九辟公府年輩遠在寔前引與爲友皓爲郡功曹辟司徒府臨辭太守問誰可代卿者皓曰明府欲必得其人西門亭長陳寔可寔聞之曰鍾君似不察人不知何獨識我太守遂以寔爲功曹時中常侍侯覽託太守高倫用吏倫教署爲文學掾寔知非其人懷檄請見言曰此人不宜用而侯常侍不可違寔乞從外署不足以塵明德倫從之於是鄉論怪其非舉寔終無所言倫後被徵爲尙書郡中士大夫送至綸氏倫謂衆人曰吾前爲侯常侍用吏陳君密持教還而於外白署比聞議者以此少之此咎由故人畏憚彊禦陳君可謂善則稱君過則稱己者也寔固自引愆聞者方歎息由是天下服其德後爲太丘長修德清靜百姓以安鄰縣民歸附者寔輒訓導譬解發遣各令還本司官行部吏慮民有訟者白欲禁之寔曰訟以求直禁之理將何申其勿有所拘司官聞而歎息曰陳君所言若是豈有冤於人乎亦竟無訟者以沛相賦斂違法解印綬去吏民追思之鍾皓素與荀淑齊名李膺常歎曰荀君清識難尙鍾君至德可師皓兄子瑾母膺之姑也瑾好學慕古有退讓風與膺同年俱有聲名膺祖太尉脩常言瑾似我家性邦有道不廢邦無道免於刑戮復以膺妹妻之膺謂瑾曰孟子以爲人無是非之心非人也弟於是何太無阜白邪瑾嘗以膺言白皓皓曰元禮祖父在位諸宗竝盛故得然乎昔國武子好招人過以致怨惡今豈其時邪心欲保身全家爾道爲貴

和平元年春正月甲子赦天下改元○乙丑太后詔歸政於帝始罷稱制二月甲寅太后梁氏崩○三月車駕徙幸北宮○甲午葬順烈皇后○增封大將軍冀萬戶并前合三萬戶封

冀妻孫壽爲襄城君。兼食陽翟租。歲入五千萬。加賜赤紱。比長公主。壽善爲妖態。以蠱惑冀。冀甚寵憚之。冀愛監奴秦宮。官至太倉令。得出入壽所。威權大震。刺史二千石。皆謁辭之。冀與壽對街爲宅。殫極土木。互相誇競。金玉珍怪。充積藏室。又廣開園圃。採土築山。十里九阪。深林絕澗。有若自然。奇禽馴獸。飛走其間。冀壽共乘輦車。遊觀第內。多從倡伎。酣謳竟路。或連日繼夜。以騁娛恣。客到門不得通。皆請謝門者。門者累千金。又多拓林苑。周遍近縣。起兔苑於河南城西。經五數十里。移檄所在。調發生兔。刻其毛以爲識。人有犯者。罪至死刑。嘗有西域賈胡。不知禁忌。誤殺一兔。轉相告言。坐死者十餘人。又起別第於城西。以納姦亡。或取良人。悉爲奴婢。至數千口。名曰自賣人。冀用壽言。多斥奪諸梁在位者。外以示謙讓。而實崇孫氏。孫氏宗親。冒名爲侍中。卿校郡守長吏者十餘人。皆貪饕凶淫。各使私客。籍屬縣富人。被以他罪。閉獄掠拷。使出錢自贖。贖物少者。至於死徙。扶風人士孫奮。居富而性吝。冀以馬乘遺之。從貸錢五千萬。奮以三千萬與之。冀大怒。乃告郡縣。認奮母爲其守藏婢。云盜白珠十斛。紫金千斤。以叛。遂收者奮兄弟。死於獄中。悉沒其貲財。億七千餘萬。冀又遣客周流四方。遠至塞外。廣求異物。而使人復乘執橫暴。妻略婦女。毆擊吏卒。所在怨毒。侍御史朱穆。自以冀故吏。奏記諫曰。明將軍地有申伯之尊。位爲羣公之首。一日行善。天下歸仁。終朝爲惡。四海傾覆。頃者官民俱匱。加以水蟲爲害。京師諸官費用增多。詔書發調。或至十倍。各言官無見財。皆當出民。撈掠割剝。疆令充足。公賦既重。私斂又深。牧守長吏。多非德選。貪聚無厭。遇民如虜。或絕命於箠楚之下。或自賊於迫切之求。又掠奪百姓。皆託之尊府。遂令將軍結怨天下。吏民酸毒。道路歎嗟。昔永和之末。綱紀少弛。頗失人望。四五歲耳。而財空戶散。下有離心。馬勉之徒。乘敝而起。荆揚之間。幾成大患。幸賴順烈皇后。初政清靜。內外同力。僅乃討定。今百姓戚戚。困於永和。內非仁愛之心。可得容忍。外非守國之計。所宜久安也。夫將相大

臣。均體元首。共輿而馳。同舟而濟。輿傾舟覆。患實共之。豈可以去明卽昧。履危自安。主孤時困。而莫之卹乎。宜時易宰守。非其人者。減省第宅園池之費。拒絕郡國諸所奉送。內以自明。外解人惑。使挾姦之吏。無所依託。司察之臣。得盡耳目。憲度既張。遠邇清壹。則將軍身尊事顯。德耀無窮矣。冀不納。冀雖專朝縱橫。而猶交結左右宦官。任其子弟賓客。爲州郡要職。欲以自固。恩寵。穆又奏記極諫。冀終不悟。報書云。如此。僕亦無一可邪。然素重穆。亦不甚罪也。冀遣書詣樂安太守陳蕃。有所請託。不得通。使者詐稱他客。求謁蕃。蕃怒。答殺之。坐左轉脩武令。時皇子有疾。下郡縣市珍藥。而冀遣客齎書詣京兆。并貨牛黃。京兆尹南陽延篤。發書收客曰。大將軍椒房外家。而皇子有疾。必應陳進醫方。豈當使客千里求利乎。遂殺之。冀慙而不得言。有司承旨求其事。篤以病免。○夏五月庚辰。尊博園。園貴人曰孝崇。后宮曰永樂。置太僕少府以下。皆如長樂宮故事。分鉅鹿九縣爲后湯沐邑。○秋七月。梓潼山崩。元嘉元年春正月朔。羣臣朝會。大將軍冀帶劍入省。尙書蜀郡張陵呵叱令出。敕虎賁羽林奪劍。冀跪謝。陵不應。卽劾奏冀。請廷尉論罪。有詔。以一歲俸贖。百僚肅然。河南尹不疑嘗舉陵。孝廉及謂陵曰。昔舉君適所以自罰也。陵曰。明府不肖。誤見擢序。今申公憲以報私恩。不疑有愧色。○癸酉。赦天下。改元。○梁不疑好經書。喜待士。梁冀疾之。轉不疑爲光祿勳。以其子胤爲河南尹。胤年十六。容貌甚陋。不勝冠帶。道路見者莫不嗤笑。不疑自恥。兄弟有隙。遂讓位歸第。與弟蒙閉門自守。冀不欲令與賓客交通。陰使人變服至門。記往來者。南郡太守馬融。江夏太守田明。初除。過謁不疑。冀諷有司奏融在郡貪濁。及以他事陷明。皆髡笞徙朔方。融自刺不殊。明遂死於路。○夏四月己丑。上微行幸河南尹梁胤府舍。是日大風拔樹。晝昏。尙書楊秉上疏曰。臣聞天不言語。以災異譴告王者至尊。出入有常。警蹕而行。靜室而止。自非郊廟之事。則鑾旗不駕。故諸侯入諸臣之家。春秋尙列其誠。況於以先王法服。

而私出槃游。降亂尊卑等威無序。侍衛守空宮。璽紱委女妾。設有非常之變。任章之謀。上負先帝。下悔靡及。帝不納。秉震之子也。○京師旱。任城梁國饑。民相食。○司徒張歆罷。以光祿勳吳雄爲司徒。○北匈奴呼衍王寇伊吾。敗伊吾司馬毛愷。攻伊吾屯城。詔敦煌太守馬達將兵救之。至蒲類海。呼衍王引去。○秋七月。武陵蠻反。○冬十月。司空胡廣致仕。○十一月。辛巳。京師地震。詔百官舉獨行之士。涿郡舉崔寔。詣公車。稱病不對策。退而論世事。名曰政論。其辭曰。凡天下所以不治者。常由人主承平日久。俗漸敝而不悟。政寔衰而不改。習亂安危。快不自覩。或荒耽者欲。不恤萬機。或耳蔽箴誨。厭僞忽真。或猶豫岐路。莫適所從。或見信之佐。括囊守祿。或疎遠之臣。言以賤廢。是以王綱縱弛於上。智士鬱伊於下。悲夫。自漢興以來。三百五十餘歲矣。政令垢翫。上下怠懈。百姓囂然咸復思中興之救矣。且濟時拯世之術。在於補綻決壞。枝柱邪傾。隨形裁割。要措斯世於安寧之域而已。故聖人執權遭時定制。步驟之差。各有云設。不彊人以不能。背急切而慕所聞也。蓋孔子對葉公以來遠哀公以臨人。景公以節禮非其不同。所急異務也。俗人拘文牽古。不達權制。奇偉所聞。簡忽所見。烏可與論國家之大事哉。故言事者。雖合聖聽。輒見倚奪。何者。其頑士。聞於時權。安習所見。不知樂成。況可慮始。苟云率由舊章而已。其達者。或矜名妒能。恥策非己。舞筆奮辭。以破其義。寡不勝衆。遂見擯棄。雖稷契復存。猶將困焉。斯賢智之論。所以常憤鬱而不伸者也。凡爲天下者。自非上德。嚴之則治。寬之則亂。何以明其然也。近孝宣皇帝。明於君人之道。審於爲政之理。故嚴刑峻法。破姦軌之膽。海內清肅。天下密如。算計見效。優於孝文。及元帝卽位。多行寬政。卒以墮損。威權始奪。遂爲漢室基禍之主。政道得失。於斯可鑒。昔孔子作春秋。褒齊桓。懿晉文。歎管仲之功。夫豈不美文武之道哉。誠達權救敝之理也。聖人能與世推移。而俗士苦不知變。以爲結繩之約。可復治亂秦之緒。干戚之舞。足以解平城之圍。夫熊經鳥伸。雖延歷之

術。非傷寒之理。呼吸吐納。雖度紀之道。非續骨之膏。蓋爲國之法。有似理身。平則致養。疾則攻焉。夫刑罰者。治亂之藥石也。德教者。興平之梁肉也。夫以德教除殘。是以梁肉養疾也。以刑罰治平。是以藥石供養也。方今承百王之敝。值厄運之會。自數世以來。政多恩貸。馭委其轡。馬駘其銜。四牡橫奔。皇路險傾。方將拊勒。鞭轉以救之。豈暇鳴和鑾。調節奏哉。昔文帝雖除肉刑。當斬右趾者。棄市。答者往往至死。是文帝以嚴致平。非以寬致平也。寔。瑗之子也。山陽仲長統嘗見其書。歎曰。凡爲人主。宜寫一通。置之坐側。

臣光曰。漢家之法已嚴矣。而崔寔猶病其寬。何哉。蓋衰世之君。率多柔儒。凡愚之佐。唯知姑息。是以權幸之臣。有罪不坐。豪猾之民。犯法不誅。仁恩所施。止於目前。姦宄得志。紀綱不立。故崔寔之論。以矯一時之枉。非百世之通義也。孔子曰。政寬則民慢。慢則糾之以猛。猛則民殘。殘則施之以寬。寬以濟猛。猛以濟寬。政是以和。斯不易之常道矣。

閏月庚午。任城節王崇薨。無子。國絕。○以太常黃瓊爲司空。○帝欲褒崇梁冀。使中朝二千石以上。會議其禮。特進胡廣。太常羊溥。司隸校尉祝恬。太中大夫邊韶等。咸稱冀之勳德。宜比周公。錫之山川。土田附庸。黃瓊獨曰。冀前以親迎之勞。增邑萬三千戶。又其子胤。亦加封賞。今諸侯以戶邑爲制。不以里數爲限。冀可比鄧禹。合食四縣。朝廷從之。於是司奏冀入朝。不趨。劍履上殿。謁讚不名。禮儀比蕭何。悉以定陶陽成餘戶。增封爲四縣。比鄧禹。賞賜金錢奴婢。綵帛車馬。衣服甲第。比霍光。以殊元勳。每朝會。與三公絕席。十日一入。平尚書事。宣布天下。爲萬世法。冀猶以所奏禮薄。意不悅。

二年春正月。西域長史王敬。爲于寔所殺。初。西域長史趙評。在于寔病癱死。評子迎喪。道經拘彌。拘彌王成國。與于寔王建。素有隙。謂評子曰。于寔王。令胡醫持毒藥。著創中。故致死耳。評子信之。還以告敦煌太守馬達。會敬代爲長史。馬達令敬隱覈于寔事。敬先過拘彌。成國

復說云。于賓國人欲以我為王。今可因此罪誅建。于賓必服矣。敬貪立功。前到于賓。設供具。請建而陰圖之。或以敬謀告建。建不信。曰。我無罪。王長史何為欲殺我。旦日。建從官屬數十人詣敬。坐定。建起行酒。敬叱左右執之。吏士竝無殺建意。官屬悉得突走。時成國主籛秦牧隨敬。在會。持刀出曰。大事已定。何為復疑。即前斬建。于賓侯將輸樊等。遂會兵攻敬。敬持建頭上樓。宣告曰。天子使我誅建耳。輸樊不聽。上樓斬敬。縣首於市。輸樊自立為王。國人殺之。而立建子安國。馬達聞王敬死。欲將諸郡兵出塞。擊于賓。帝不聽。徵達還。而以宋亮代為敦煌太守。亮到。開募于賓。令自斬輸樊。時輸樊死已經月。乃斷死人頭。送敦煌。而不言其狀。亮後知其詐。而竟不能討也。○丙辰。京師地震。○夏。四月。甲辰。孝崇皇后閔氏崩。以帝弟平原王石為喪主。斂送制度。比恭懷皇后。五月。辛卯。葬于博陵。○秋。七月。庚辰。日有食之。○冬。十月。乙亥。京師地震。○十一月。司空黃瓊免。十二月。以特進趙戒為司空。○永興元年。春。三月。丁亥。帝幸鴻池。○夏。四月。丙申。赦天下。改元。○丁酉。濟南悼王廣薨。無子。國除。○秋。七月。郡國三十二。蝗。河水溢。百姓饑窮。流冗者數十萬戶。冀州尤甚。詔以侍御史朱穆為冀州刺史。冀部令長。聞穆濟河。解印綬去者四十餘人。及到。奏劾諸郡貪汙者。有至自殺。或死獄中。宦者趙忠。喪父。歸葬安平。僭為王。匣穆下郡案驗。吏畏其嚴。遂發墓剖棺。陳尸出之。帝聞。大怒。徵穆詣廷尉。輸作左校。太學書生潁川劉陶等數千人。詣闕上書。訟穆曰。伏見弛刑徒朱穆。處公憂國。拜州之日。志清姦惡。誠以常侍貴寵。父子兄弟。布在州郡。競為虎狼。噬食小民。故穆張理天綱。補綴漏目。羅取殘禍。以塞天意。由是。內官咸共患疾。謗讟煩興。讒隙仍作。極其刑譴。輸作左校。天下有識。皆以穆同勤禹稷。而被共鯨之戾。若死者有知。則唐帝怒於崇山。重華忿於蒼墓矣。當今。中官近習。竊持國柄。手握王爵。口銜天憲。運賞。則使餓隸富於季孫。呼噓。則令伊顏化為桀跖。而穆獨亢然。不顧身害。非惡榮而好辱。惡生而

好死也。徒感王綱之不攝。懼天網之久失。故竭心懷憂。為上深計。臣願鯨首繫趾。代穆輸作。帝覽其奏。乃赦之。○冬。十月。太尉袁湯免。以太常胡廣為太尉。司徒吳雄。司空趙戒免。以太僕黃瓊為司徒。光祿勳房植為司空。○武陵蠻詹山等反。武陵太守汝南應奉。招降之。○車師後部王阿羅多。與戊部候嚴皓。不相得。忿戾而反。攻圍屯田。殺傷吏士。後部侯炭遮。領餘民。畔阿羅多。詣漢吏降。阿羅多迫急。從百餘騎。亡入北匈奴。敦煌太守宋亮。上立後故王軍就質子卑君為王。後阿羅多復從匈奴中還。與卑君爭國。頗收其國人。戊校尉嚴詳。慮其招引北虜。將亂西域。乃開信告示。許復為王。阿羅多乃詣詳降。於是更立阿羅多為王。將卑君還敦煌。以後部人三百帳與之。○二年。春。正月。甲午。赦天下。○二月。辛丑。復聽刺史二千石。行三年喪。○癸卯。京師地震。○夏。蝗。○東海胸山崩。○乙卯。封乳母馬惠子初為列侯。○秋。九月。丁卯朔。日有食之。○太尉胡廣免。以司徒黃瓊為太尉。閏月。以光祿勳尹頌為司徒。○冬。十一月。甲辰。帝校獵上林苑。遂至函谷關。○泰山琅邪賊公孫舉。東郭寶等反。殺長吏。○永壽元年。春。正月。戊申。赦天下。改元。○二月。司隸冀州饑。人相食。○太學生劉陶。上疏陳事曰。夫天之與帝。帝之與民。猶頭之與足。相須而行也。陛下。目不視鳴條之事。耳不聞檀車之聲。天災不有。痛於肌膚。震食不即。損於聖體。故蔑三光之謬。輕上天之怒。伏念高祖之起。始自布衣。合散扶傷。克成帝業。勤亦至矣。流福遺祚。至於陛下。陛下既不能增明烈考之軌。而忽高祖之勤。妄假利器。委授國柄。使羣醜刑隸。芟刈小民。虎豹窟於麋場。豺狼乳於春囿。貨殖者為窮寇之覓。貧餒者作饑寒之鬼。死者悲於窀穸。生者戚於朝野。是愚臣所為咨嗟。長懷歎息者也。且秦之將亡。正諫者誅。諛進者賞。嘉言結於忠舌。國命出於讒口。擅閤樂於咸陽。授趙高以車府。權去己而不知。威離身而不顧。古今一揆。成敗同執。願陛下。遠覽彊秦之

傾近察哀平之變。得失昭然。禍福可見。臣又聞危非仁不扶。亂非智不救。竊見故冀州刺史南陽朱穆。前烏桓校尉。臣同郡李膺。皆履正清平。貞高絕俗。斯實中興之良佐。國家之柱石也。宜還本朝。夾輔王室。臣敢吐不時之義於諱言之朝。猶冰霜見日。必至消滅。臣始悲天下之可悲。今天下亦悲。臣之愚惑也。書奏。不省。○夏。南陽大水。○司空房植免。以太常韓續爲之。安定屬國都尉敦煌張奐。初到職。壁中唯有二百許人。聞之。卽勒兵而出。軍吏以爲力不敵。叩頭爭止之。奐不聽。遂進屯長城。收集兵士。遣將王衛。招誘東羌。因據龜茲縣。使南匈奴不得交通。東羌諸豪。遂相率與奐共擊莫鞬等。破之。伯德惶恐。將其衆降。郡界以寧。羌豪遣奐馬二十四。金鏐八枚。奐於諸羌前。以酒酹地曰。使馬如羊。不以入廐。使金如粟。不以入懷。悉以還之前。此八都尉。率好財貨。爲羌所患。苦及奐。正身潔己。無不悅服。威化大行。

二年春。三月。蜀郡屬國夷反。○初。鮮卑檀石槐。勇健有智略。部落畏服。乃施法禁。平曲直。無敢犯者。遂推以爲大人。檀石槐立庭于彈汗山。歐仇水上。去高柳北三百餘里。兵馬甚盛。東西部大人。皆歸焉。因南抄緣邊。北拒丁零。東卻夫餘。西擊烏孫。盡據匈奴故地。東西萬四千餘里。秋。七月。檀石槐寇雲中。以故烏桓校尉李膺爲度遼將軍。膺到邊。羌胡皆望風畏服。先所掠男女。悉詣塞下。送還之。○公孫舉東郭寶等。聚衆至三萬人。寇青兗徐三州。破壞郡縣。連年討之。不能克。尙書選能治劇者。以司徒掾潁川韓韶爲羸長。賊聞其賢。相戒不入羸境。餘縣流民萬餘戶。入縣界。韶開倉賑之。主者爭謂不可。韶曰。長活溝壑之人。而以此伏罪。含笑入地矣。太守素知韶名德。竟無所坐。韶與同郡荀淑。鍾皓。陳寔。皆嘗爲縣長。所至以德政稱。時人謂之潁川四長。○初。鮮卑寇遼東。屬國都尉段熲。率所領馳赴之。旣而恐賊驚去。乃使驛騎詐齎璽書。召熲。熲於道僞退。潛於還路設伏。虜以爲信然。乃入追熲。熲因大縱兵。悉斬獲之。坐詐爲璽書。當伏重刑。以有功論。司寇刑。竟拜議郎。至是。詔以東方盜賊昌熾。令公卿。選將帥。有文武材者。司徒尹頌。薦熲。拜中郎將。擊舉寶等。大破斬之。獲首萬餘級。餘黨降散。封熲爲列侯。○冬。十二月。地震。○封梁不疑子馬爲潁陰侯。梁胤子桃爲城父侯。

資治通鑑卷第五十三

漢紀 孝桓皇帝上之上永壽二年

資治通鑑卷第五十四

漢紀四十六

孝桓皇帝上之下

永壽三年春正月己未赦天下。○居風令貪暴無度。縣人朱達等與蠻夷同反。攻殺令。聚衆至四五千人。夏四月。進攻九真。九真太守兒式戰死。詔九真都尉魏朗討破之。○閏月庚辰晦。日有食之。○京師蝗。○或上言。民之貧困。以貨輕錢薄。宜改鑄大錢。事下四府。羣僚及太學能言之士議之。太學生劉陶上議曰。當今之憂。不在於貨。在乎民饑。竊見比年已來。良苗盡於蝗螟之口。杼軸空於公私之求。民所患者。豈謂錢貨之厚薄。銖兩之輕重哉。就使當今沙礫化爲南金。瓦石變爲和玉。使百姓渴無所飲。饑無所食。雖皇羲之純德。唐虞之文明。猶不能以保蕭牆之內也。蓋民可百年無貨。不可一朝有饑。故食爲至急也。議者不達農殖之本。多言鑄冶之便。蓋萬人鑄之。一人奪之。猶不能給。況今一人鑄之。則萬人奪之乎。雖以陰陽爲炭。萬物爲銅。役不食之民。使不饑之士。猶不能足。無厭之求也。夫欲民殷財阜。要在止役禁奪。則百姓不勞而足。陛下愍海內之憂戚。欲鑄錢齊貨。以救其弊。猶養魚沸鼎之中。棲鳥烈火之上。水木本魚鳥之所生也。用之不時。必至焦爛。願陛下寬鑿薄之禁。後治鑄之議。聽民庶之謠吟。問路叟之所憂。瞰三光之文耀。視山河之分流。天下之心。國家大事。粲然皆見。無有遺惑者矣。伏念當今地廣而不得耕。民衆而無所食。羣小競進。秉國之位。鷹揚天下。鳥鈔求飽。吞肌及骨。竝噬無厭。誠恐卒有役夫窮匠。起於板築之間。投斤攘臂。登高遠呼。使

愁怨之民。響應雲合。雖方尺之錢。何有能救其危也。遂不改錢。○冬十一月。司徒尹頌薨。○長沙蠻反。寇益陽。○以司空韓演爲司徒。以太常北海孫朗爲司空。○延熹元年夏五月甲戌晦。日有食之。太史令陳授因小黃門徐璜。陳日食之變。咎在大將軍冀。冀聞之。諷雒陽收考授。死於獄。帝由是怒冀。○京師蝗。○六月戊寅。赦天下。改元。○大雩。○秋七月甲子。太尉黃瓊免。以太常胡廣爲太尉。○冬十月。帝校獵廣成。遂幸上林苑。○十二月。南匈奴諸部竝叛。與烏桓鮮卑寇緣邊九郡。帝以京兆尹陳龜爲度遼將軍。龜臨行。上疏曰。臣聞三辰不軌。擢士爲相。蠻夷不恭。拔卒爲將。臣無文武之材。而忝鷹揚之任。雖歿軀體。無所云補。今西州邊鄙。土地墾墾。民數更寇虜。室家殘破。雖含生氣。實同枯朽。往歲并州水雨災螟互生。稼穡荒耗。租更空闕。陛下以百姓爲子。焉可不垂撫循之恩哉。古公西伯。天下歸仁。豈復輿金輦寶。以爲民惠乎。陛下繼中興之統。承光武之業。臨朝聽政。而未留聖意。且牧守不良。或出中官。懼逆上旨。取過目前。呼嗟之聲。招致災害。胡虜凶悍。因衰緣隙。而令倉庫單於豺狼之口。功業無銖兩之效。皆由將帥不忠。聚姦所致。前涼州刺史祝良。初除到州。多所糾罰。太守令長貶黜將半。政未踰時。功效卓然。實應賞異。以勸功能。改任牧守。去斥姦殘。又宜更選匈奴烏桓護羌中郎將校尉。簡練文武。授之法令。除并涼二州今年租更寬赦罪隸。掃除更始。則善吏知奉公之祐。惡者覺營私之禍。胡馬可不窺長城。塞下無候望之患矣。帝乃更選幽并刺史。自營郡太守都尉以下。多所革易。下詔爲陳將軍。除并涼一年租賦。以賜吏民。龜到職。州郡重足震栗。省息經用。歲以億計。詔拜安定屬國都尉張奐爲北中郎將。以討匈奴烏桓等。匈奴烏桓燒度遼將軍門。引屯赤陁。煙火相望。兵衆大恐。各欲亡去。奐安坐帷中。與弟子講誦。自若。軍士稍安。乃潛誘烏桓。陰與通。遂使斬匈奴屠各渠帥。襲破其衆。諸胡悉降。奐以南單于車兒不能統理國事。乃拘之。奏立左谷蠡王爲單于。詔曰。春秋

大居正。車兒一心向化。何罪而黜。其遣還庭。○大將軍冀與陳龜素有隙。譖其沮毀國威。挑取功譽。不爲胡虜所畏。坐徵還。以種嵩爲度遼將軍。龜遂乞骸骨。歸田里。復徵爲尚書。冀暴虐日甚。龜上疏言其罪狀。請誅之。帝不省。龜自知必爲冀所害。不食七日而死。種嵩到營所。先宣恩信。誘降諸胡。其有不服。然後加討。羌虜先時有生見獲質於郡縣者。悉遣還之。誠心懷撫。信賞分明。由是羌胡皆來順服。嵩乃去。烽燧除。候望邊方晏然無警。入爲大司農。二年春二月。鮮卑寇鴈門。○蜀郡夷寇蠶陵。○三月。復斷刺史二千石行三年喪。○夏。京師大水。○六月。鮮卑寇遼東。○梁皇后恃姊兄蔭。執恣極奢靡。兼倍前世。專寵妬忌。六宮莫得進見。及太后崩。恩寵頓衰。后既無嗣。每宮人孕育。鮮得全者。帝雖迫畏梁冀。不敢譴怒。然進御轉希。后益憂恚。秋七月丙午。皇后梁氏崩。乙丑。葬懿獻皇后於懿陵。梁冀一門前後七侯。三皇后六貴人。二大將軍。夫人女食邑稱君者七人。尚公主者三人。其餘卿將尹校五十七人。冀專擅威柄。凶恣日積。宮衛近侍。竝樹所親。禁省起居。纖微必知其四方調發。歲時貢獻。皆先輸上第。於冀乘輿。乃其次焉。吏民齎貨求官請罪者。道路相望。百官遷召。皆先到冀門。賤微謝恩。然後敢詣尚書。下邳吳樹爲宛令。之官辭冀。冀賓客布在縣界。以情託樹。樹曰。小人姦蠹比屋可誅。明將軍處上將之位。宜崇賢善。以補朝闕。自侍坐以來。未聞稱一長者。而多託非人。誠非敢聞。冀默然不悅。樹到縣。遂誅殺冀客爲人害者數十人。樹後爲荊州刺史。辭冀。冀鳩之。出死車上。遼東太守侯猛初拜。不謁冀。冀託以他事。腰斬之。郎中汝南袁著。年十九。詣闕上書曰。夫四時之運。功成則退。高爵厚寵。鮮不致災。今天將軍位極功成。可爲至戒。宜遵縣車之禮。高枕頤神。傳曰。木實繁者。披枝害心。若不抑損盛權。將無以全其身矣。冀聞而密遣掩捕。著乃變易姓名。託病僞死。結蒲爲人。市棺殮送。冀知其詐。求得笞殺之。太原郝梨。胡武。好危言高論。與著友善。梨武嘗連名奏記三府。薦海內高士。而不詣冀。冀追怒之。敕

中都官移檄禽捕。遂誅武家死者六十餘人。梨初逃亡。知不得免。因輿檣。奏書冀門。書入。仰藥而死。家乃得全。安帝嫡母耿貴人薨。冀從貴人從子林慮侯承。求貴人珍玩。不能得。冀怒。并族其家十餘人。涿郡崔琦。以文章爲冀所善。琦作外戚箴。白鶴賦。以風冀。怒。琦曰。昔管仲相齊。樂聞譏諫之言。蕭何佐漢。乃設書過之吏。今將軍屢世台輔。任齊伊周。而德政未聞。黎元塗炭。不能結納貞良。以救禍敗。反欲鉗塞士口。杜蔽主聽。將使玄黃改色。鹿馬易形乎。冀無以對。因遣琦歸。琦懼而亡匿。冀捕得殺之。冀秉政。幾二十年。威行內外。天子拱手。不得有所親與。帝既不平之。及陳授死。帝愈怒。和熹皇后從兄子郎中鄧香妻宣。生女猛。香卒。宣更適梁紀。紀孫壽之舅也。壽以猛色美。引入掖庭。爲貴人。冀欲認猛爲其女。易猛姓爲梁。冀恐猛姊婿議郎郗尊沮敗宣意。遣客刺殺之。又欲殺宣。宣家與中常侍袁赦相比。冀客登赦屋。欲入宣家。赦覺之。鳴鼓會衆。以告宣。宣馳入白帝。帝大怒。因如廁。獨呼小黃門史唐衡問。左右與外舍不相得者誰乎。衡對。中常侍單超。小黃門史左悺。與梁不疑有隙。中常侍徐璜。黃門令具瑗。常私忿疾。外舍放橫。口不敢道。於是帝呼超。悺入室。謂曰。梁將軍兄弟。專朝迫脅內外。公卿以下。從其風旨。今欲誅之。於常侍意如何。超等對曰。誠國姦賊。當誅日久。臣等弱劣。未知聖意如何耳。帝曰。審然者。常侍密圖之。對曰。圖之不難。但恐陛下腹中狐疑。帝曰。姦臣脅國。當伏其罪。何疑乎。於是召璜。瑗五人。共定其議。帝齧超臂。出血爲盟。超等曰。陛下今計已決。勿復更言。恐爲人所疑。冀心疑超等。八月丁丑。使中黃門張暉。入省宿。以防其變。具瑗。赦。吏收暉。以輒從外入。欲圖不軌。帝御前殿。召諸尚書入。發其事。使尚書令尹勳持節。勒丞郎以下。皆操兵守省。閤。斂諸符節。送省中。使具瑗將左右。廐騶。虎賁。羽林。都候。劍戟士。合千餘人。與司隸校尉張彪。共圍冀第。使光祿勳袁盱持節。收冀大將軍印綬。徙封比景。都鄉侯。冀及妻壽。即日皆自殺。不疑。蒙。先卒。悉收梁氏孫氏中外宗親。送詔獄。無少長。皆棄市。他所連

及公卿列校刺史二千石死者數十人。太尉胡廣、司徒韓續、司空孫朗皆坐阿附梁冀不衛宮。止長壽亭。滅死一等。免爲庶人。故吏賓客免黜者三百餘人。朝廷爲空。是時事猝從中發。使者交馳。公卿失其度。官府市里鼎沸。數日乃定。百姓莫不稱慶。收冀財貨。縣官斥賣。合三千餘萬。以充王府用。滅天下稅租之半。散其苑囿。以業窮民。○壬午。立梁貴人爲皇后。追廢懿陵爲貴人冢。帝惡梁氏。改皇后姓爲薄氏。久之。知爲鄧香女。乃復姓鄧氏。○詔賞誅梁冀之功。封單超、徐璜、具瑗、左悺、唐衡皆爲縣侯。超食二萬戶。璜等各萬餘戶。世謂之五侯。仍以悺衡爲中常侍。又封尚書令尹勳等七人皆爲亭侯。○以大司農黃瓊爲太尉。光祿大夫中山祝恬爲司徒。大鴻臚梁國盛允爲司空。是時新誅梁冀。天下想望異政。黃瓊首居公位。乃舉奏州郡素行暴汙。至死徙者十餘人。海內翕然稱之。瓊辟汝南范滂。滂少厲清節。爲州里所服。嘗爲清詔使。案察冀州。滂登車攬轡。慨然有澄清天下之志。守令臧汙者皆望風解印綬去。其所舉奏。莫不厭塞衆議。會詔三府掾屬舉謠言。滂奏刺史二千石權豪之黨二十餘人。尚書責滂所劾猥多。疑有私故。滂對曰。臣之所舉。自非叨穢姦暴。深爲民害。豈以汙簡札哉。問以會日迫促。故先舉所急。其未審者。方更參實。臣聞農夫去草。嘉穀必茂。忠臣除姦。王道以清。若臣言有貳。甘受顯戮。尚書不能詰。○尚書令陳蕃上疏。薦五處士。豫章徐穉。彭城姜肱。汝南袁閔。京兆韋著。潁川李曇。帝悉以安車玄纁。備禮徵之。皆不至。穉家貧。常自耕稼。非其力不食。恭儉義讓。所居服其德。屢辟公府不起。陳蕃爲豫章太守。以禮請署功曹。穉不之免。既謁而退。蕃性方峻。不接賓客。唯穉來。特設一榻。去則縣之。後舉有道。家拜太原太守。皆不就。穉雖不應諸公之辟。然聞其死。輒負笈赴弔。常於家。豫炙雞一雙。以一兩綿絮漬酒中。暴乾。以裹雞。徑到所赴冢。隧外。以水漬綿。使有酒氣。斗米飯。白茅爲藉。以雞置前。醢酒畢。留謁則去。不見喪主。肱與二弟仲海、季江俱以孝友著聞。常同被而寢。不應徵聘。肱嘗與

弟季江俱詣郡。夜於道爲盜所劫。欲殺之。肱曰。弟年幼。父母所憐。又未聘娶。願殺身濟弟。季江曰。兄年德在前。家之珍寶。國之英俊。乞自受戮。以代兄命。盜遂兩釋焉。但掠奪衣資而已。既至郡中。見肱無衣服。怪問其故。肱託以他辭。終不言盜。盜聞而感悔。就精廬求見。徵君叩頭謝罪。還所略物。肱不受。勞以酒食。而遣之。帝既徵肱不至。乃下彭城。使畫工圖其形狀。肱臥於幽閨。以被韜面。言患眩疾。不欲出風。工竟不得見之。閔安之玄孫也。苦身脩節。不應辟召。著隱居講授。不脩世務。曇母苦烈。曇奉之逾謹。得四時珍玩。未嘗不先拜而後進。鄉里以爲法。帝又徵安陽魏桓。其鄉人勸之行。桓曰。夫于祿求進。所以行其志也。今後宮千數。其可損乎。廐馬萬匹。其可減乎。左右權豪。其可去乎。皆對曰。不可。桓乃慨然歎曰。使桓生行死歸於諸子。何有哉。遂隱身不出。○帝既誅梁冀。故舊恩私。多受封爵。追贈皇后父鄧香爲車騎將軍。封安陽侯。更封后母宣爲昆陽君。兄子康、秉皆爲列侯。宗族皆列校郎。將賞賜以巨萬計。中常侍侯覽上織五千匹。帝賜爵關內侯。又託以與議誅冀。進封高鄉侯。又封小黃門劉普、趙忠等八人爲鄉侯。自是權執專歸宦官矣。五侯尤貪縱。傾動內外。時災異數見。白馬令甘陵李雲露布上書。移副三府曰。梁冀雖恃權專擅。虐流天下。今以罪行誅。猶召家臣。搃殺之耳。而猥封謀臣萬戶以上。高祖聞之。得無見非。西北列將。得無解體。孔子曰。帝者諦也。今官位錯亂。小人諂進。財貨公行。政化日損。尺一拜用。不經御省。是帝欲不諦乎。帝得奏震怒。下有司逮雲。詔尚書都護劍戟。送黃門北寺獄。使中常侍管霸與御史廷尉雜考之。時弘農五官掾杜衆傷雲以忠諫獲罪。上書願與雲同日死。帝愈怒。遂并下廷尉。大鴻臚陳蕃上疏曰。李雲所言。雖不識禁忌。于上逆旨。其意歸於忠國而已。昔高祖忍周昌不諱之諫。成帝赦朱雲腰領之誅。今日殺雲。臣恐剖心之譏。復議於世矣。太常楊秉、雒陽市長沐茂、郎中上官資。竝上疏請雲。帝恚甚。有司奏以爲大不敬。詔切責蕃秉。免歸田里。茂資貶秩二等。時帝在

濯龍池管霸奏雲等事。霸跪言曰：李雲、草澤愚儒，杜衆郡中小吏，出於狂蠱，不足加罪。帝謂霸曰：帝欲不誅，是何等語？而常侍欲原之邪？顧使小黃門可其奏，雲衆皆死獄中。於是嬖寵益橫，太尉瓊自度力不能制，乃稱疾不起。上疏曰：陛下即位以來，未有勝政，諸梁秉權，豎宦充朝，李固杜喬既以忠言橫見殘滅，而李雲杜衆復以直道繼踵受誅，海內傷懼，益以怨結。朝野之人，以忠爲諱，尚書周永素事梁冀，假其威勢，見冀將衰，乃陽毀示忠，遂因姦計，亦取封侯。又黃門挾邪，羣輩相黨，自冀興盛，腹背相親，朝夕圖謀，共構姦軌，臨冀當誅，無可設巧，復託其惡，以要爵賞。陛下不加清徵，審別真僞，復與忠臣並時顯封，粉墨雜糅，所謂抵金玉於砂礫，碎珪璧於泥塗，四方聞之，莫不憤歎。臣世荷國恩，身輕位重，敢以垂絕之日，陳不諱之言，書奏不納。○冬十月壬申，上行幸長安。○中常侍單超、疾、病、壬寅，以超爲車騎將軍。○十二月己巳，上還自長安。○燒當、燒何當、煎勒姐等八種羌寇隴西金城塞，護羌校尉段熲擊破之，追至羅亭，斬其酋豪以下二千級，獲生口萬餘人。○詔復以陳蕃爲光祿勳，楊秉爲河南尹，單超兄子匡爲濟陰太守，負執貪放，兖州刺史第五種使從事衛羽案之，得賊五六千萬，種即奏匡并以劾超，匡窘迫，賂客任方、刺羽，羽覺其姦，捕方，囚繫雒陽，匡慮楊秉窮竟其事，密令方等突獄亡走，尚書召秉詰責，秉對曰：方等無狀，釁由單匡，乞檻車徵匡，考覈其事，則姦慝蹤緒，必可立得。秉竟坐論作左校，時泰山賊叔孫無忌寇暴徐兗州郡，不能討，單超以是陷第五種，坐徙朔方，超外孫董援爲朔方太守，稽怒以待之，種故吏孫斌知種必死，結客追種，及於太原，劫之以歸，亡命數年，會赦得免，種倫之曾孫也。是時封賞踰制，內寵猥盛，陳蕃上疏曰：夫諸侯上象四七，藩屏上國，高祖之約，非功臣不侯，而聞追錄河南尹鄧禹、萬世父遵之微功，更爵尚書，令黃雋先人之絕封，近習以非義授邑，左右以無功傳賞，至乃一門之內，侯者數人，故緯象失度，陰陽謬序，臣知封事已行，言之無及，誠欲陛下從是而止，又

采女數千，食肉衣綺，脂油粉黛，不可貲計。鄙諺言：盜不過五女門，以女貧家也。今後宮之女，豈不貧國乎？帝頗采其言，爲出宮女五百餘人，但賜舊爵關內侯，而封萬世南鄉侯。帝從容問侍中陳留爰延，爰延何如主也？對曰：陛下爲漢中主，帝曰：何以言之？對曰：尚書令陳蕃任事，則治，中常侍黃門與政，則亂。是以陛下可與爲善，可與爲非。帝曰：昔朱雲廷折欄檻，今侍中面稱朕違，敬聞闕矣。拜五官中郎將，累遷大鴻臚，會客星經帝坐，帝密以問延，延上封事曰：陛下以河南尹鄧禹世有龍潛之舊，封爲通侯，恩重公卿，惠豐宗室，加頃引見，與之對博，上下蝶躄，有虧尊嚴，臣聞之，帝左右者，所以咨政德也。善人同處，則日聞嘉訓，惡人從游，則日生邪情。惟陛下遠讒諛，融通之人，納睿睿之士，則災變可除，帝不能用，延稱病免。歸。三年春正月丙申，赦天下。詔求李固後嗣，初固既策罷，知不免禍，乃遣三子基、燮，皆歸鄉里。時燮年十三，姊文姬爲同郡趙伯英妻，見二兄歸，具知事本，默然獨悲曰：李氏滅矣，自太公已來，積德累仁，何以遇此密與二兄謀，豫藏匿燮，託言還京師，人咸信之，有頃難作。州郡收基，基皆死獄中。文姬乃告父門生王成曰：君執義先公，有古人之節，今委君以六尺之孤，李氏存滅，其在君矣。成乃將燮乘江東下，入徐州界，燮姓名爲酒家傭，而成賣卜於市，各爲異人，陰相往來，積十餘年，梁冀既誅，燮乃以本末告酒家，酒家具車重，厚遣之，燮皆不受。遂還鄉里，追行喪服，姊弟相見，悲感傍人。姊戒燮曰：吾家血食將絕，弟幸而得濟，豈非天邪？宜杜絕衆人，勿妄往來，慎無一言加於梁氏。加梁氏則連主上，禍重至矣。唯引咎而已。燮謹從其誨，後王成卒，差以禮葬之。每四節爲設上賓之位，而祠焉。○丙午，新豐侯單超卒，賜東園祕器，棺中玉具及葬，發五營騎士，將作大匠起冢塋，其後四侯轉橫，天下爲之語曰：左回天，具獨坐，徐臥虎，唐雨墮，皆競起第宅，以華侈相尚，其僕從皆乘牛車，而從列騎，兄弟姻戚，宰州臨郡，辜較百姓，與盜無異，虐徧天下，民不堪命，故多爲盜賊焉。中常侍侯覽、小黃門段珪

皆有田業。近濟北界，僕從賓客，劫掠行旅。濟北相滕延，一切收捕，殺數十人。陳尸路衢，覽珪以事訴帝，延坐徵詣廷尉。免左官，兄勝爲河東太守，皮氏長京兆趙岐，恥之，即日棄官西歸。唐衡，兄玳，爲京兆尹，素與岐有隙，收岐家屬宗親，陷以重法，盡殺之。岐逃難四方，靡所不歷，自匿姓名，賣餅北海市中。安丘孫嵩見而異之，載與俱歸，藏於複壁中。及諸唐死，遇赦乃敢出。○閏月，西羌餘衆復與燒何大豪寇張掖，晨薄校尉段熲軍，熲下馬大戰，至日中，刀折矢盡，虜亦引退。熲追之，且鬪且行，晝夜相攻，割肉食雪，四十餘日，遂至積石山，出塞二千餘里，斬燒何大帥，降其餘衆而還。○夏五月甲戌，漢中山崩。○六月辛丑，司徒祝恬薨。○秋七月，以司空盛允爲司徒，太常虞放爲司空。○長沙蠻反，屯益陽，零陵蠻寇長沙。○九月，餘賊屯據日南，衆轉強盛，詔復拜桂陽太守夏方爲交趾刺史，方威惠素著。冬十一月，日南賊二萬餘人相率詣方降。○勒姐零吾種羌圍允街，段熲擊破之。○泰山賊叔孫無忌攻殺都尉侯章，遣中郎將宗資討破之，詔徵皇甫規拜泰山太守，規到官，廣設方略，寇虜悉平。四年春正月辛酉，南宮嘉德殿火。戊子，丙署火。大疫。○二月壬辰，武庫火。○司徒盛允免，以大司農種彞爲司徒。○三月，太尉黃瓊免。○夏四月，以太常沛國劉矩爲太尉，初矩爲雍丘令，以禮讓化民，有訟者，常引之於前，提耳訓告，以爲忿恚可忍，縣官不可入，使歸更思，訟者感之，輒各罷去。○甲寅，封河間孝王子參戶亭侯博爲任城王，奉孝王後。○五月辛酉，有星孛于心。○丁卯，原陵長壽門火。○己卯，京師雨雹。○六月，京兆扶風及涼州地震。○庚子，岱山及博尤來山並積裂。○己酉，赦天下。○司空虞放免，以前太尉黃瓊爲司空。○犍爲屬國夷寇鈔百姓益州刺史山昱擊破之。○零吾羌與先零諸種反，寇三輔。○秋七月，京師零滅公卿已下奉賁王侯半租，占賣關內侯，虎賁羽林，緹騎營士，五大夫，錢各有差。○九月，司空黃瓊免，以大鴻臚東萊劉寵爲司空，寵嘗爲會稽太守，簡除煩苛，禁察非法，郡中大治，徵爲

將作大匠。山陰縣有五六老叟，自若邪山谷間出，人齎百錢以送寵，曰：山谷鄙生，未嘗識郡朝，他守時吏發求民間，至夜不絕，或狗吠竟夕，民不得安，自明府下車以來，狗不夜吠，民不見吏，年老遭值聖明，今聞當見棄去，故自扶奉送寵，曰：吾政何能及公言邪？勤苦父老，爲人選一大錢受之。○冬，先零沈氏羌與諸種羌寇并涼二州，校尉段熲將湟中義從討之。涼州刺史郭閎貪其功，稽固，熲軍使不得進，義從役久，戀鄉舊，皆悉叛歸，郭閎歸罪於熲，熲坐徵下獄，輸作左校。以濟南相胡閎代爲校尉，胡閎無威略，羌遂陸梁，覆沒營塢，轉相招結，唐突諸郡，寇患轉盛。泰山太守皇甫規上疏曰：今猾賊就滅，泰山略平，復聞羣羌並皆反逆，臣生長邠岐，年五十有九，昔爲郡吏，再更叛羌，豫籌其事，有誤中之言，臣素有痼疾，恐犬馬齒窮，不報大恩，願乞冗官，備單車一介之使，勞來三輔，宣國威澤，以所習地形兵執，佐助諸軍，臣窮居孤危之中，坐觀郡將，已數十年，自鳥鼠至于東岱，其病一也，力求猛敵，不如清平，勸明孫吳，未若奉法，前變未遠，臣誠感之，是以越職，盡其區區，詔以規爲中郎將，持節監關西兵，討零吾等。十一月，規擊羌破之，斬首八百級，先零諸種羌慕規威信，相勸降者十餘萬。五年春正月壬午，南宮丙署火。○三月，沈氏羌寇張掖酒泉，皇甫規發先零諸種羌共討隴右，而道路隔絕，軍中大疫，死者十三四，規親入庵廬，巡視將士，三軍感悅，東羌遂遣使乞降。涼州復通，先是安定太守孫雋受取狼藉，屬國都尉李翕督軍御史張稟多殺降羌，涼州刺史郭閎漢陽太守趙熹竝老弱不任職，而皆倚恃權貴，不遵法度，規到悉條奏其罪，或免或誅，羌人聞之，翕然反善。沈氏大豪滇昌飢恬等十餘萬口復詣規降。○夏四月，長沙零陵賊入桂陽，蒼梧。○乙丑，恭陵東闕火。戊辰，虎賁掖門火。五月，康陵園寢火。○長沙零陵賊入桂陽，蒼梧南海交趾刺史及蒼梧太守望風逃奔，遣御史中丞盛脩督州郡募兵討之，不能克。○乙亥，京師地震。○甲申，中藏府丞祿署火。秋七月己未，南宮承善闕火。○烏吾羌寇漢陽隴西

金城諸郡兵討破之。○艾縣賊攻長沙郡縣，殺益陽令，衆至萬餘人。謁者馬睦督荊州刺史劉度、擊之，軍敗。睦度奔走，零陵蠻亦反。冬十月，武陵蠻反，寇江陵。南郡太守李肅奔走，主簿胡爽扣馬首，諫曰：「蠻夷見郡無備，故敢乘間而進。明府爲國大臣，連城千里，舉旗鳴鼓，應聲十萬，奈何委符守之重而爲逋逃之人乎？」肅拔刃向爽曰：「掾促去，太守今急，何暇此計？」爽抱馬固諫，肅遂殺爽而走。帝聞之，徵肅棄市。度睦減死一等，復爽門閭，拜家一人爲郎。尚書朱穆舉右校令山陽度尙，爲荊州刺史。辛丑，以太常馮緄爲車騎將軍，將兵十餘萬討武陵蠻。先是，所遣將帥，宦官多陷以折耗軍資，往往抵罪。緄願請中常侍一人監軍財費，尙書朱穆奏：「緄以財自嫌，失大臣之節，有詔勿劾。」緄請前武陵太守應奉與俱，拜從事中郎。十一月，緄軍至長沙，賊聞之，悉詣營乞降。進擊武陵蠻夷，斬首四千餘級，受降十餘萬人。荊州平定，詔書賜錢一億，固讓不受。振旅還京師，推功於應奉，薦以爲司隸校尉，而上書乞骸骨。朝廷不許。○滇那羌寇武威，張掖、酒泉。○太尉劉矩免，以太常楊秉爲太尉。○皇甫規持節爲將，還督鄉里，既無他私惠，而多所舉奏，又惡絕宦官，不與交通。於是中外竝怨，遂共誣規，貨賂羣羌，令其文降。帝璽書誚讓相屬，規上書自訟曰：「四年之秋，戎醜蠢戾，舊都懼駭，朝廷西顧，臣振國威靈，羌戎稽首，所省之費一億以上，以爲忠臣之義，不敢告勞，故恥以片言自及微效。然比方先事，庶免罪悔，前踐州界，先奏孫雋、李翁、張稟、旋師南征，又上郭閔、趙熹、陳其過惡，執據大辟。凡此五臣，支黨半國，其餘墨綬，下至小吏，所連及者，復有百餘。吏託報將之怨，子思復父之恥，載贄馳車，懷糧步走，交構豪門，競流謗讒。云：臣私報諸羌，讎以錢貨。若臣以私財則家無擔石，如物出於官，則文簿易考。就臣愚惑，信如言者，前世尙遺匈奴，以宮姬、鎮烏孫以公主，今臣但費千萬，以懷叛羌，則良臣之才略，兵家之所貴，將有何罪，負義違理乎？自永初以來，將出不少，覆軍有五，動資巨億，有旋車完封，寫之權門，而名成功立，厚加爵封。今

臣還督本土，糾舉諸郡，絕交離親，戮辱舊故，衆謗陰害，固其宜也。帝乃徵規還，拜議郎，論功當封，而中常侍徐璜、左悺欲從，求貨數遣賓客，就問功狀，規終不答。璜等忿怒，陷以前事，下之於吏。官屬欲賦斂請謝，規誓而不聽，遂以餘寇不絕，坐繫廷尉。論輸左校，諸公及太學生張鳳等三百餘人詣闕訟之，會赦歸家。

六年春二月戊午，司徒種暠薨。○三月戊戌，赦天下。以衛尉潁川許栩爲司徒。○夏四月辛亥，康陵東署火。○五月，鮮卑寇遼東屬國。○秋七月甲申，平陵園寢火。○桂陽賊李研等寇郡界，武陵蠻復反。太守陳奉討平之。宦官素惡馮緄，八月，緄坐軍還盜賊復發，免。○冬十月丙辰，上校獵廣成，遂幸函谷關，上林苑，光祿勳陳蕃上疏諫曰：「安平之時，遊畋宜有節，況今有三空之厄哉！田野空，朝廷空，倉庫空，加之兵戎未戢，四方離散，是陛下焦心毀顏，坐以待旦之時也。豈宜揚旗曜武，騁心與馬之觀乎？又前秋多雨，民始種麥，今失其勸種之時，而令給驅禽除路之役，非賢聖恤民之意也。書奏，不納。○十一月，司空劉寵免。十二月，以衛尉周景爲司空。景，榮之孫也。時宦官方熾，景與太尉楊秉上言：「內外吏職，多非其人，舊典中臣子弟不得居位秉執，而今枝葉賓客，布列職署，或年少庸人，典據守宰，上下忿患，四方愁毒，可遵用舊章，退貪殘，塞災謗，請下司隸校尉，中二千石，城門五營校尉，北軍中候，各實覈所部，應當斥罷，自以狀言。」三府廉察，有遺漏，續上。帝從之。於是秉條奏牧守、青州刺史羊亮等五十餘人，或死或免。天下莫不肅然。○詔徵皇甫規爲度遼將軍，初張奐坐梁冀故吏，免官，禁錮。凡諸交舊，莫敢爲言，唯規薦舉。前後七上，由是拜武威太守。及規爲度遼，到營數月，上書薦奐，才略兼優，宜正元帥，以從衆望。若猶謂愚臣宜充舉事者，願乞冗官，以爲奐副。朝廷從之。以奐代規爲度遼將軍，以規爲使匈奴中郎將。○西州吏民守闕，爲前護羌校尉段熲訟冤者甚衆，會滇那等諸種羌益熾，涼州幾亡，乃復以熲爲護尉校尉。○尙書朱穆疾宦官恣

橫上疏曰。按漢故事。中常侍參選士人。建武以後。乃悉用宦者。自延平以來。浸益貴盛。假貂璫之飾。處常伯之任。天朝政事。一更其手。權傾海內。寵貴無極。子弟親戚。竝荷榮任。放濫驕溢。莫能禁禦。窮破天下。空竭小民。愚臣以為可悉罷省。遵復往初。更選海內清淳之士。明達國體者。以補其處。即兆庶黎萌。蒙被聖化矣。帝不納。後穆因進見。復口陳曰。臣聞漢家舊典。置侍中。中常侍各一人。省尚書事。黃門侍郎一人。傳發書奏。皆用姓族。自和熹太后。以女主稱制。不接公卿。乃以閹人為常侍。小黃門通命兩宮。自此以來。權傾人主。窮困天下。宜皆罷遣。博選耆儒宿德。與參政事。帝怒不應。穆伏不肯起。左右傳出良久。乃趨而去。自此中官數因事稱詔。詆毀之。穆素剛。不得意。居無幾。憤懣發疽卒。

資治通鑑卷第五十四

資治通鑑卷第五十五

漢紀四十七

孝桓皇帝中

延熹七年春二月丙戌。邠鄉忠侯黃瓊薨。將葬。四方遠近名士。會者六七千人。初瓊之教授於家。徐穉從之。咨訪大義。及瓊貴。穉絕不復交。至是。穉往弔之。進爵哀哭而去。人莫知者。諸名士推問喪宰。宰曰。先時有一書生來。衣蠹薄。而哭之哀。不記姓字。衆曰。必徐孺子也。於是選能言者。陳留茅容。輕騎追之。及於塗。容為沽酒。市肉。穉為飲食。容問國家之事。穉不答。更問稼穡之事。穉乃答之。容還以語諸人。或曰。孔子云。可與言而不與言。失人。然則孺子其失人乎。太原郭泰曰。不然。孺子之為人。清潔高廉。飢不可得食。寒不可得衣。而為季偉飲酒食肉。此為已知季偉之賢故也。所以不答國事者。是其智可及其愚不可及也。泰博學善談論。初游雒陽。時人莫識。陳留符融一見嗟異。因以介於河南尹李膺。膺與相見曰。吾見士多矣。未有如郭林宗者也。其聰識通朗。高雅密博。今之華夏。鮮見其儔。遂與為友。於是名震京師。後歸鄉里。衣冠諸儒。送至河上。車數千兩。膺唯與泰同舟而濟。衆賓望之。以為神仙焉。泰性明知人。好獎訓士類。周遊郡國。茅容年四十餘。耕於野。與等輩避雨樹下。衆皆夷踞相對。容獨危坐愈恭。泰見而異之。因請寓宿。旦日。容殺雞為饌。泰謂為己設。容分半食。母餘半度置。自以草蔬與客同飯。泰曰。卿賢哉。遠矣。郭林宗猶減三牲之具。以供賓旅。而卿如此。乃我友也。起對之揖。勸令從學。卒為盛德。鉅鹿孟敏。客居太原。荷甔墮地。不顧而去。泰見而問其意。對

曰。甌已破矣。視之何益。泰以爲有分決。與之言。知其德性。因勸令游學。遂知名當世。陳留申屠蟠家貧。備爲漆工。鄆陵庾乘少給事縣廷。爲門士。泰見而奇之。其後皆爲名士。自餘或出於屠沽卒伍。因泰獎進。成名者甚衆。陳國童子魏昭請於泰曰。經師易遇。人師難遭。願在左右。供給灑掃。泰許之。泰嘗不佳。命昭作粥。粥成。進泰。泰呵之曰。爲長者作粥。不加意敬。使不可食。以杯擲地。昭更爲粥。重進。泰復呵之。如此者三。昭姿容無變。泰乃曰。吾始見子之面。而今而後知卿心耳。遂友而善之。陳留左原爲郡學生。犯法見斥。泰遇諸路。爲設酒肴以慰之。謂曰。昔顏涿聚。梁甫之巨盜。段干木。晉國之大跽。卒爲齊之忠臣。魏之名賢。遽瑗顏回。尚不能無過。況其餘乎。慎勿恚恨。責躬而已。原納其言而去。或有譏泰不絕惡人者。泰曰。人而不仁。疾之已甚。亂也。原後忽更懷忿。結客欲報諸生。其日。泰在學。原愧負前言。因遂罷去。後事露。衆人咸謝服焉。或問范滂曰。郭林宗何如人。滂曰。隱不違親。貞不絕俗。天子不得臣。諸侯不得友。吾不知其它。泰嘗舉有道不就。同郡宋冲素服其德。以爲自漢元以來。未見其匹。嘗勸之仕。泰曰。吾夜觀乾象。晝察人事。天之所廢。不可支也。吾將優游卒歲而已。然猶周旋京師。誨誘不息。徐穉以書戒之曰。大木將顛。非一繩所維。何爲栖栖不遑寧處。泰感寤曰。謹拜斯言。以爲師表。濟陰黃允。以雋才知名。泰見而謂曰。卿高才絕人。足成偉器。年過四十。聲名著矣。然至於此際。當深自匡持。不然。將失之矣。後司徒袁隗欲爲從女求姻。見允。歎曰。得婿如是。足矣。允聞而黜遣其妻。妻請大會宗親爲別。因於衆中攘袂。數允隱隱十五事而去。允以此廢於時。初允與漢中晉文經。竝恃其才智。曜名遠近。徵辟不就。託言療病。京師不通賓客。公卿大夫。遣門生。旦暮問疾。郎吏雜坐其門。猶不得見。三公所辟召者。輒以詢訪之。隨所臧否。以爲與奪。符融謂李膺曰。二子行業無聞。以豪桀自置。遂使公卿問疾。王臣坐門。融恐其小道破義。空譽違實。特宜察焉。膺然之。二人自是名論漸衰。賓徒稍省。旬日之間。慙歎逃去。

後竝以罪廢棄。陳留仇香。至行純嘿。鄉黨無知者。年四十。爲蒲亭長。民有陳元。獨與母居。母詣香。告元不孝。香驚曰。吾近日過元舍。廬落整頓。耕耘以時。此非惡人。當是教化未至耳。母守寡養孤。苦身投老。柰何以一旦之忿。棄歷年之勤乎。且母養人遺孤。不能成濟。若死者有知。百歲之後。當何以見亡者。母涕泣而起。香乃親到元家。爲陳人倫孝行。譬以禍福之言。元感悟。卒爲孝子。考城令河內王奐。署香主簿。謂之曰。聞在蒲亭。陳元不罰而化之。得無少鷹鷂之志邪。香曰。以爲鷹鷂。不若鸞鳳。故不爲也。奐曰。枳棘之林。非鸞鳳所集。百里非大賢之路。乃以一月奉資。香使入太學。郭泰符融。齎謁之。因留宿。明旦。泰起下牀拜之曰。君泰之師。非泰之友也。香學畢。歸鄉里。雖在宴居。必正衣服。妻子事之。若嚴君。妻子有過。免冠自責。妻子庭謝。思過。香冠。妻子乃敢升堂。終不見其喜怒聲色之異。不應徵辟。卒於家。○三月癸亥。隕石于鄂。○夏五月己丑。京師雨雹。○荊州刺史度尚。募諸蠻夷。擊艾縣賊。天破之。降者數萬人。桂陽宿賊卜陽。潘鴻等。逃入深山。尚窮追數百里。破其三屯。多獲珍寶。陽鴻黨衆猶盛。尚欲擊之。而士卒驕富。莫有鬪志。尚計緩之。則不戰。逼之。必逃亡。乃宣言。卜陽潘鴻。作賊十年。習於攻守。今兵寡少。未易可進。當須諸郡所發。悉至。乃并力攻之。申令軍中。恣聽射獵。兵士喜悅。大小皆出。尚乃密使所親客。潛焚其營。珍積皆盡。獵者來還。莫不泣涕。尚人人慰勞。深自咎責。因曰。卜陽等財寶。足富數世。諸卿但不并力耳。所亡少少。何足介意。衆咸憤踊。尚敕令秣馬蓐食。明旦。徑赴賊屯。陽鴻等。自以深固。不復設備。吏士乘銳。遂破平之。尚出兵三年。羣寇悉定。封右鄉侯。○冬十月壬寅。帝南巡。庚申。幸章陵。戊辰。幸雲夢。臨漢水。還幸新野。時公卿貴戚。車騎萬計。徵求費役。不可勝極。護駕從事桂陽胡騰。上言。天子無外。乘輿所擾。郡縣。帝在南陽。左右竝通姦利。詔書多除人爲郎。太尉楊秉。上疏曰。太微積星。名爲郎位。

入奉宿衛。出牧百姓。宜割不忍之恩。以斷求欲之路。於是詔除乃止。○護羌校尉段熲擊當煎羌破之。○十二月辛丑。車駕還宮。○中常侍汝陽侯唐衡。武原侯徐璜。皆卒。○初。侍中寇榮。恂之曾孫也。性矜潔。少所與。以此爲權寵所疾。榮從兄子。尙帝妹益陽長公主。帝又納其從孫女於後宮。左右益忌之。遂共陷以罪。與宗族免歸。故郡吏承望風旨。持之浸急。榮恐不免。詣闕自訟。未至。刺史張敬追劾榮。以擅去邊。有詔捕之。榮逃竄數年。會赦。不得除。積窮困。乃自亡命中。上書曰。陛下統天理物。作民父母。自生齒以上。咸蒙德澤。而臣兄弟。獨以無辜。爲專權之臣所見。批抵青蠅之人。所共構會。令陛下忽慈母之仁。發投杼之怒。殘諂之吏。張設機網。竝驅爭先。若赴仇敵。罰及死沒。髡剔墳墓。欲使嚴朝。必加濫罰。是以不敢觸突天威。而自竄山林。以俟陛下。發神聖之聽。啓獨觀之明。救可濟之人。援沒溺之命。不意滯怒。不爲春夏息。淹悲不爲歲時。遂馳使郵驛。布告遠近。嚴文剋剝。痛於霜雪。逐臣者窮人途。追臣者極車軌。雖楚購伍員。漢求季布。無以過也。臣遇罰以來。三赦再贖。無驗之罪。足以蠲除。而陛下疾臣愈深。有司咎臣甫力。止則見埽滅。行則爲亡虜。苟生則爲窮人。極死則爲冤鬼。天廣大怒。足以陳原野。備刀鋸。陛下當班布臣之所坐。以解衆論之疑。臣思入國門。坐於肺石之上。使三槐九棘。平臣之罪。而閹闔九重。陷穿步設。舉趾觸罟。宜動行絀羅網。無緣至萬乘之前。永無見信之期。悲夫。久生亦復何聊。蓋忠臣殺身以解君怒。孝子殞命以寧親怨。故大舜不避塗廩。浚井之難。申生不辭姬氏。讒邪之謗。臣敢忘斯義。不自斃以解明朝之忿哉。乞以身塞責。願陛下。句兄弟死命。使臣一門。頗有遺類。以崇陛下寬饒之惠。先死陳情。臨章泣血。帝省章。愈怒。遂誅榮。寇氏由是衰廢。

八年春正月。帝遣中常侍左悺之苦縣祠老子。○勃海王惲。素行險僻。多僭傲不法。北軍中候陳留史弼。上封事曰。臣聞帝王之於親戚。愛雖隆。必示之以威。體雖貴。必禁之以度。如是和睦之道興。骨肉之恩遂矣。竊聞勃海王惲。外聚剽輕不逞之徒。內荒酒樂。出入無常。所與羣居。皆家之棄子。朝之斥臣。必有羊勝伍被之變。州司不敢彈糾。傅相不能匡輔。陛下隆於友于。不忍遏絕。恐遂滋蔓。爲害彌大。乞露臣奏。宣示百僚。平處其法。法決罪定。乃下不忍之詔。臣下固執。然後少有所許。如是則聖朝無傷親之譏。勃海有享國之慶。不然。懼大獄將興矣。上不聽。惲果謀爲不道。有司請廢之。詔貶爲瘞陶王。食一縣。○丙申晦。日有食之。詔公卿校尉舉賢良方正。○千秋萬歲殿火。○中常侍侯覽兄參。爲益州刺史。殘暴貪婪。累臧億計。太尉楊秉奏。檻車徵參。參於道自殺。閱其車重三百餘兩。皆金銀錦帛。秉因奏曰。臣案舊典。宦者本在給使省闔。司昏守夜。而今猥受過寵。執政操權。附會者因公褒舉。違忤者求事中傷。居法王公。富擬國家。飲食極肴膳。僕妾盈執素。中常侍侯覽弟參。貪殘元惡。自取禍滅。覽顧知釁重。必有自疑之意。臣愚以爲不宜復見親近。昔懿公刑邴鄆之父。奪閭職之妻。而使二人參乘。卒有竹中之難。覽宜急屏斥。投畀有虎。若斯之人。非思所有。請免官。送歸本郡。書奏。尙書召對秉掾屬。詰之曰。設官分職。各有司存。三公統外。御史察內。今越奏近官。經典漢制。何所依據。其開公具對。秉使對曰。春秋傳曰。除君之惡。唯力是視。鄧通懈慢。申屠嘉召通詰責。文帝從而請之。漢世故事。三公之職。無所不統。尙書不能詰。帝不得已。竟免覽官。司隸校尉韓續。因奏左悺罪惡。及其兄太僕南鄉侯稱。請託州郡。聚斂爲姦。賓客放縱。侵犯吏民。悺稱皆自殺。續又奏。中常侍具瑗。兄沛相恭。臧罪徵詣廷尉。瑗詣獄謝。上還東武侯印綬。詔貶爲都鄉侯。超及璜。衡襲封者。竝降爲鄉侯。子弟分封者。悉奪爵土。劉普等貶爲關內侯。尹勳等亦皆奪爵。○帝多內寵。宮女至五六千人。及驅役從使。復兼倍於此。而鄧后恃尊驕忌。與帝所幸郭貴人。更相譖訴。癸亥。廢皇后鄧氏。送暴室。以憂死。河南尹鄧萬世。虎賁中郎將。

鄧會皆下獄誅。○護羌校尉段熲擊罕姐羌破之。○三月辛巳赦天下。○宛陵大姓羊元羣罷北海郡。臧汙狼籍。郡舍溷軒有奇巧。亦載之以歸。河南尹李膺表按其罪。元羣行賂宦官。膺竟反坐。單超弟遷爲山陽太守。以罪擊獄。廷尉馮緄考致其死。中官相黨。共飛章誣緄以罪。中常侍蘇康管霸固天下良田美業。州郡不敢詰。大司農劉祐移書所在依科品沒入之。帝大怒。與膺緄俱輸作左校。○夏四月甲寅安陵園寢火。○丁巳詔壞郡國諸淫祀。特留雒陽王渙密縣卓茂二祠。○五月丙戌太尉楊秉薨。秉爲人清白寡欲。嘗稱我有三不惑。酒色財也。秉既沒。所舉賢良廣陵劉瑜。乃至京師。上書言中官不當比肩裂土。競立胤嗣。繼體傳爵。又嬖女充積。宥食空宮。傷生費國。又第舍增多。窮極奇巧。掘山攻石。促以嚴刑。州郡官府各自考事。姦情賂賂。皆爲吏餌。民愁鬱結。起入賊黨。官輒興兵誅討其罪。貧困之民。或有賣其首級。以要酬賞。父兄相代。殘身妻孥。相視分裂。又陛下好徵行近習之家。私幸宦者之舍。賓客市買。熏灼道路。因此暴縱。無所不容。惟陛下開廣諫道。博觀前古。遠佞邪之人。放鄭衛之聲。則政致和平。德感祥風矣。詔特召瑜問災咎之徵。執政者欲令瑜依違其辭。乃更策以它事。瑜復悉心對。八千餘言。有切於前。拜爲議郎。○荆州兵朱蓋等叛。與桂陽賊胡蘭等復攻桂陽。太守任胤棄城走。賊衆遂至數萬。轉攻零陵。太守下邳陳球固守拒之。零陵下溼。編木爲城。郡中惶恐。掾史白球。遣家避難。球怒曰。太守分國虎符。受任一邦。豈顧妻孥。而沮國威乎。復言者斬。乃拉大木爲弓。羽矛爲矢。引機發之。多所殺傷。賊激流灌城。球輒於內因地執。反決水淹賊。相拒十餘日。不能下。時度尙徵還京師。詔以尙爲中郎將。率步騎二萬人救球。發諸郡兵。并執討擊。大破之。斬蘭等首三千餘級。復以尙爲荆州刺史。蒼梧太守張鈜爲賊所執。及任胤皆徵棄市。胡蘭餘黨南走蒼梧。交趾刺史張磐擊破之。賊復還入荆州界。度尙懼爲己負。乃僞上言。蒼梧賊入荆州界。於是徵磐下廷尉。辭狀未正。會赦見原。磐不肯出。

獄。方更牢持械節。獄吏謂磐曰。天恩曠然而君不出。可乎。磐曰。磐備位方伯。爲尙所枉。受罪牢獄。夫事有虛實。法有是非。磐實不辜。赦無所除。如忍以苟免。永受侵辱之恥。生爲惡吏。死爲敝鬼。乞傳尙詣廷尉。面對曲直。足明真僞。尙不徵者。磐埋骨牢檻。終不虛出。望塵受枉。廷尉以其狀上。詔書徵尙到廷尉。辭窮受罪。以先有功。得原。○閏月甲午。南宮朔平署火。○段熲擊破西羌。進兵窮追。展轉山谷間。自春及秋。無日不戰。虜遂敗散。凡斬首二萬三千級。獲生口數萬人。降者萬餘落。尉頽都鄉侯。○秋七月。以太中大夫陳蕃爲太尉。蕃讓於太常胡廣。議郎王暢。弛刑徒李膺。帝不許。暢。龔之子也。嘗爲南陽太守。疾其多貴戚豪族。下車奮厲。威猛。大姓有犯。或使吏發屋伐樹。墮井夷竈。功曹張敞奏諫曰。文翁召父卓茂之徒。皆以溫厚爲政。流聞後世。發屋伐樹。將爲嚴烈。雖欲懲惡。難以開遠。郡爲舊都。侯甸之國。園廟出於章陵。三后生自新野。自中興以來。功臣將相。繼世而隆。愚以爲懇懇用刑。不如行恩。孳孳求姦。未若禮賢。舜舉皋陶。不仁者遠。化人在德。不在用刑。暢深納其言。更崇寬政。教化大行。○八月戊辰。初令郡國有田者。畝斂稅錢。○九月丁未。京師地震。○冬十月。司空周景免。以太常劉茂爲司空。茂。愷之子也。郎中竇武。融之玄孫也。有女爲貴人。采女田聖有寵於帝。帝將立之爲后。司隸校尉應奉。上書曰。母后之重。興廢所因。漢立飛燕。胤祀泯絕。宜思開雖之所求。遠五禁之所忌。太尉陳蕃。亦以田氏卑微。竇族良家。爭之甚固。帝不得已。辛巳。立竇貴人爲皇后。拜武爲特進。城門校尉。封槐里侯。○十一月壬子。黃門北寺火。○陳蕃數言李膺。馮緄。劉祐之枉。請加原宥。升之爵任。言及反覆。誠辭懇切。以至流涕。帝不聽。應奉上疏曰。夫忠賢武將國之心膂。竊見左校弛刑徒馮緄。劉祐李膺等。誅舉邪臣。肆之以法。陛下既不聽察。而猥受譖訴。遂令忠臣同愆。元惡自春迄冬。不蒙降恕。遐邇觀聽。爲之歎息。夫立政之要。記功忘失。是以武帝捨安國於徒中。宣帝徵張敞於亡命。緄前討蠻荆。均吉甫之功。祐數臨。

督司有不吐茹之節。膺著威幽并。遣愛度遼。今三垂蠢動。王旅未振。乞原膺等。以備不虞。書奏。乃悉免其刑。久之。李膺復拜司隸校尉。時小黃門張讓弟朔。爲野王令。貪殘無道。畏膺威嚴。逃還京師。匿於兄家。柱中膺知其狀。率吏卒破柱取朔。付雒陽獄。受辭畢。即殺之。讓訴冤於帝。帝召膺詰。以不先請便。加誅之意。對曰。昔仲尼爲魯司寇。七日而誅少正卯。今臣到官。已積一旬。私懼以稽留爲愆。不意獲速疾之罪。誠自知覺責。死不旋踵。特乞留五日。尅殄元惡。退就鼎鑊。始生之願也。帝無復言。顧謂讓曰。此汝弟之罪。司隸何愆。乃遣出。自此諸黃門常侍。皆鞠躬屏氣。休沐不敢出宮省。帝怪問其故。竝叩頭泣曰。畏李校尉。時朝廷日亂。綱紀頹弛。而膺獨持風裁。以聲名自高。士有被其容接者。名爲登龍門云。○徵東海相劉寬。爲尚書令。寬崎之子也。歷典三郡。溫仁多恕。雖在倉卒。未嘗疾言遽色。吏民有過。但用蒲鞭罰之。示辱而已。終不加苦。每見父老。慰以農里之言。少年勉以孝悌之訓。人皆悅而化之。九年春正月辛卯朔日。有食之。詔公卿郡國舉至孝。太常趙典所舉荀爽。對策曰。昔者聖人建天地之中。而謂之禮。衆禮之中。昏禮爲首。陽性純而能施。陰體順而能化。以禮濟樂。節宣其氣。故能豐子孫之祥。致老壽之福。及三代之季。淫而無節。陽竭於上。陰隔於下。故周公之戒曰。時亦罔或克壽。傳曰。截趾適屨。孰云其愚。何與斯人。追欲喪軀。誠可痛也。臣竊聞後宮采女五六千人。從官侍使。復在其外。空賦不辜之民。以供無用之女。百姓窮困於外。陰陽隔塞於內。故感動和氣。災異屢臻。臣愚以爲諸未幸御者。一皆遣出。使成妃合。此誠國家之大福也。詔拜郎中。○司隸豫州饑死者什四五。至有滅戶者。○詔徵張奐爲大司農。復以皇甫規代爲度遼將軍。規自以爲連在大位。欲求退避。數上病。不見聽。會友人喪至。規越界迎之。因令客密告并州刺史胡芳。言規擅遠軍營。當急舉奏。芳曰。威明欲避。第仕塗。故激發我耳。吾當爲朝廷愛才。何能由此子計邪。遂無所問。○夏四月。濟陰東郡。濟北平原河水清。○司徒

許栩免。五月。以太常胡廣爲司徒。○庚午。上親祠老子於濯龍宮。以文屬爲壇飾。淳金鈿器。設華蓋之坐。用郊天樂。○鮮卑聞張奐去。招結南匈奴。及烏桓同叛。六月。南匈奴烏桓鮮卑數道入塞。寇掠緣邊九郡。秋七月。鮮卑復入塞。誘引東羌。與共盟誼。於是上郡沈氏安定先零諸種。共寇武威張掖。緣邊大被其毒。詔復以張奐爲護匈奴中郎將。以九卿秩督幽并涼三州。及度遼烏桓二營。兼察刺史二千石能否。○初帝爲蠶吾侯。受學於甘陵周福。及卽位。擢福爲尚書。時同郡河南尹房植。有名當朝。鄉人爲之謠曰。天下規矩房伯武。因師獲印。周仲進。二家賓客。互相譏揣。遂各樹朋徒。漸成尤隙。由是甘陵有南北部黨人之議。自此始矣。汝南太守宗資。以范滂爲功曹。南陽太守成瑨。以岑晷爲功曹。皆委心聽任。使之褒善糾違。肅清朝府。滂尤剛勁。疾惡如讐。滂甥李頌。素無行。中常侍唐衡以屬資。資用爲吏。滂寢而不召。資遷怒。捶書佐朱零。零仰曰。范滂清裁。今日寧受笞而死。滂不可違。資乃止。郡中。中人以下。莫不怨之。於是二郡爲謠曰。汝南太守范孟博。南陽宗資主畫諾。南陽太守岑公孝。弘農成瑨但坐嘯。太學諸生三萬餘人。郭泰及潁川賈彪。爲其冠。與李膺陳蕃王暢。更相褒重。學中語曰。天下模楷李元禮。不畏強禦陳仲舉。天下俊秀王叔茂。於是中外承風。競以臧否相尙。自公卿以下。莫不畏其貶議。屣履到門。宛有富賈張汎者。與後宮有親。又善雕鏤。玩好之物。頗以賂遺中官。以此得顯位。用執縱橫。岑晷與賊曹史張牧。勸成瑨收捕汎等。既而遇赦。瑨竟誅之。并收其宗族賓客。殺二百餘人。後乃奏聞。小黃門晉陽趙津。貪暴放恣。爲一縣巨患。太原太守平原劉瓊。使郡吏王允討捕。亦於赦後殺之。於是中常侍侯覽。使張汎妻。上書訟冤。宦者因緣。譖瓊瑨。帝大怒。徵瓊瑨。皆下獄。有司承旨。奏瓊瑨罪當棄市。山陽太守翟超。以郡人張儉爲東部督郵。侯覽家在防東。殘暴百姓。覽喪母還家。大起塋冢。儉舉奏覽罪。而覽伺候遮截。章竟不上。儉遂破覽冢宅。籍沒資財。具奏其狀。復不得御。徐璜兄子宜。爲下

邳令暴虐尤甚。嘗求故汝南太守李嵩女，不能得，遂將吏卒至嵩家，載其女歸，戲射殺之。東海相汝南黃浮聞之，收宣家屬，無少長，悉考之。掾史以下固爭，浮曰：「徐宣國賊，今日殺之，明日坐死，足以瞑目矣。」即案宣罪，棄市。暴其尸，於是宦官訴冤於帝，帝大怒。超浮竝坐髡鉗，輸作右校。太尉陳蕃司空劉茂共諫，請瑯瑁超浮等罪，帝不悅。有司劾奏之，茂不敢復言。蕃乃獨上疏曰：「今寇賊在外，四支之疾，內政不理，心腹之患，臣寢不能寐，食不能飽。實憂左右日親，忠言日疎。內患漸積，外難方深。陛下超從列侯，繼承天位，小家畜產，百萬之資，子孫尚恥，愧失其先業。況乃產兼天下，受之先帝，而欲懈怠，以自輕忽乎？誠不愛己，不當念先帝得之勤苦邪？前梁氏五侯，毒徧海內，天啓聖意，收而戮之。天下之議，冀當小平。明鑒未遠，覆車如昨。而近習之權，復相扇結，小黃門趙津，大猾張汎等，肆行貪虐，姦媚左右。前太原太守劉瑁，南陽太守成瑨，糾而戮之。雖言赦後不當誅殺，原其誠心，在乎去惡。至於陛下，有何悞悞，而小人道長，熒惑聖聽，遂使天威爲之發怒，必加刑誅，已爲過甚。況乃重罰，令伏歐刀乎？又前山陽太守翟超，東海相黃浮，奉公不撓，疾惡如讎，超沒侯覽財物，浮誅徐宣之罪，竝蒙刑坐。不逢赦，恕覽之從橫，沒財已幸。宜犯釁過，死有餘辜。昔丞相申屠嘉，召責鄧通，雒陽令董宣，折辱公主，而文帝從而請之，光武加以重賞。未聞二臣有專命之誅，而今左右羣豎，惡傷黨類，妄相交構，致此刑誅。聞臣是言，當復嗾訴。陛下深宜割塞，近習與政之源，引納尚書朝省之士，簡練清高，斥黜佞邪。如是，天和於上，地洽於下，休禎符瑞，豈遠乎哉？帝不納。宦官由此疾蕃彌甚，選舉奏議，輒以中詔譴卻。長史以下，多至抵罪，猶以蕃名，臣不敢加害。平原襄楷詣闕上疏曰：「臣聞皇天不言，以文象設教。臣竊見太微天廷，五帝之座，而金火罰星，揚光其中。於占，天子凶，又俱入房心，法無繼嗣。前年冬，大寒，殺鳥獸，害魚鼈，城傍竹柏之葉，有傷枯者。臣聞於師曰：「柏傷竹枯，不出二年，天子當之。今自春夏以來，連有霜雹，及大雨雷電，臣作

威作福，刑罰急刻之所感也。太原太守劉瑁，南陽太守成瑨，志除姦邪，其所誅翦，皆合人望。而陛下受閹豎之譖，乃遠加考逮，三公上書乞哀，瑁等不見採察，而嚴被譴讓，愛國之臣，將遂杜口矣。臣聞殺無罪，誅賢者，禍及三世。自陛下卽位以來，頻行誅罰，梁冠孫鄧，竝見族滅。其從坐者，又非其數。李雲上書明主所不當諱，杜衆乞死，諒以感悟聖朝，曾無赦宥，而竝被殘戮。天下之人，咸知其冤。漢興以來，未有拒諫誅賢，用刑太深如今者也。昔文王一妻，誕至十子，今宮女數千，未聞慶育，宜修德省刑，以廣螽斯之祚。案春秋以來，及古帝王，未有河清。臣以爲河者，諸侯位也。清者，屬陽濁者，屬陰。河當濁而反清者，陰欲爲陽，諸侯欲爲帝也。京房易傳曰：「河水清，天下平。今天垂異，地吐妖，人癘疫，三者竝時。而有河清，猶春秋麟不當見而見，孔子書之，以爲異也。願賜清問，極盡所言，書奏不省。十餘日，復上書曰：「臣聞殷紂好色，妲己是出，葉公好龍，真龍游廷。今黃門常侍，天刑之人，陛下愛待，兼倍常寵，係嗣未兆，豈不爲此。又聞宮中立黃老浮屠之祠，此道清虛，貴尚無爲，好生惡殺，省慾去奢，今陛下者，欲不去，殺罰過理，既乖其道，豈獲其祚哉？浮屠不三宿桑下，不欲久生，恩愛精之至也。其守一如此，乃能成道。今陛下淫女艷婦，極天下之麗，甘肥飲美，單天下之味，柰何欲如黃老乎？書上卽召入，詔尚書問狀，楷言：「古者本無宦官，武帝末數游後宮，始置之耳。尚書承旨，奏楷不正，辭理而違背經藝，假借星宿，造合私意，誣上罔事，請下司隸正楷罪法，收送雒陽獄。帝以楷言雖激切，然皆天文恒象之數，故不誅。猶司寇論刑，自永平以來，臣民雖有習浮屠術者，而天子未之好。至帝始篤好之，常躬自禱祠。由是其法浸盛，故楷言及之。符節令汝南蔡衍，議郎劉瑜，表救成瑨，劉瑁言甚切厲，亦坐免官。瑯瑁竟死獄中。瑯瑁素剛直，有經術，知名當時。故天下惜之。岑暉，張牧，逃竄獲免，暉之亡也，親友競匿之，賈彪獨閉門不納。時人望之，彪曰：「傳言相時而動，無累後人。公孝以要君，致釁，自遺其咎，吾已不能奮戈相待，反可容隱之乎？」

於是咸服其裁正。彪嘗卿爲新息長，小民困貧，多不養子。彪嚴爲其制，與殺人同罪。城南有盜劫害人者，北有婦人殺子者，彪出案驗，掾吏欲引南，彪怒曰：「賊寇害人，此則常理。母子相殘，逆天違道，遂驅車北行，案致其罪，城南賊聞之，亦面縛自首，數年間，人養子者以千數。曰：此賈父所生也，皆名之爲賈。」○河南張成，善風角，推占當赦，教子殺人，司隸李膺督促收捕，既而逢宥獲免，膺愈懷憤疾，竟案殺之。成素以方伎交通宦官，帝亦頗訊其占，宦官教成弟子牢修，上書告膺等，養太學游士，交結諸郡生徒，更相驅馳，共爲部黨，誹訕朝廷，疑亂風俗。於是天子震怒，班下郡國，逮捕黨人，布告天下，使同忿疾。案經三府，太尉陳蕃卻之曰：「今所案者，皆海內人譽，憂國忠公之臣，此等猶將十世有也，豈有罪名不章而致收掠者乎？不肯平署，帝愈怒，遂下膺等於黃門北寺獄，其辭所連及太僕潁川杜密、御史中丞陳翔及陳寔、范滂之徒二百餘人，或逃遁不獲，皆懸金購募，使者四出相望。陳寔曰：「吾不就獄，衆無所恃，乃自往請囚。」范滂至獄，獄吏謂曰：「凡坐繫者，皆祭臯陶，滂曰：「臯陶古之直臣，知滂無罪，將理之於帝，如其有罪，祭之何益？衆人由此亦止。」陳蕃復上書極諫，帝諱其言切，託以蕃辟召非其人，策免之。時黨人獄所染逮者，皆天下名賢，度遼將軍皇甫規自以西州豪桀，恥不得與，乃自上言，臣前薦故大司農張奐是附黨也，又臣昔論輸左校，時太學生張鳳等上書訟臣，是爲黨人所附也，臣宜坐之。朝廷知而不問，杜密素與李膺名行相次，時人謂之李杜，故同時被繫，密嘗爲北海相，行春到高密，見鄭玄爲鄉嗇夫，知其異器，即召署郡職，遂遣就學，卒成大儒，後密去官還家，每謁守令，多所陳託，同郡劉勝亦自蜀郡告歸鄉里，閉門掃軌，無所干及。太守王昱謂密曰：「劉季陵清高士，公卿多舉之者，密知昱以激己，對曰：「劉勝位爲大夫，見禮上賓，而知善不薦，聞惡無言，隱情惜己，自同寒蟬，此罪人也。今志義力行之賢，而密達之，違道失節之士，而密糾之，使明府賞刑得中，令問休揚，不亦萬分之一乎？」昱慙服，待之彌厚。」○九月，以光祿勳周景爲太尉。○司空劉茂免。○冬十二月，以光祿勳汝南宣豐爲司空。○以越騎校尉竇武爲城門校尉，武在位，多辟名士，清身疾惡，禮賂不通，妻子衣食裁充足而已，得兩宮賞賜，悉散與太學諸生，及均施貧民，由是衆譽歸之。○匈奴烏桓聞張奐至，皆相率還降，凡二十萬口，奐但誅其首惡，餘皆慰納之，唯鮮卑出塞去，朝廷患檀石槐不能制，遣使持印綬封爲王，欲與和親，檀石槐不肯受，而寇抄滋甚，自分其地爲三部，從右北平以東至遼東，接夫餘濊貊二十餘邑，爲東部，從右北平以西至上谷，十餘邑，爲中部，從上谷以西至敦煌烏孫二十餘邑，爲西部，各置大人領之。

資治通鑑卷第五十五

漢紀 孝桓皇帝中延熹九年

宣統三年正月十五日

續國譯漢文大成經子史部第三卷
（岡山製本）
【非賣品】

昭和三年七月五日印刷
昭和三年七月八日發行
昭和四年三月十五日再版發行

續國譯漢文大成經子史部第三卷

（岡山製本）

【非賣品】

著者權所有

編輯者兼	國民文庫刊行會	東京市神田區小川町一番地
右代表者	鶴田久作	東京市本郷區西片町十番地
印刷者	君島潔	東京市小石川區久堅町百八番地
印刷所	共同印刷株式會社	東京市小石川區久堅町百八番地

發行所

電話神田一八五三三五番
振替東京一八五七二番

國民文庫刊行會

發行所

東京一八五十二番
雷澤山(八三三番)

國日文報發行會

東京市小石川區大塚町八番

共同印刷社 會報

東京市本郷區西長町十番

東京市神田區小川下一番

開成四年三月十五日
開成三年三月八日
開成三年三月五日

發行所

東京市神田區小川下一番
國日文報發行會

開成四年三月十五日

東京市

654
56



